

# LUK

## Jiysis Krays Minim Tep Luk Tikak

### Minim Nind Niņep

Baybol buk day “Luk” apun biy, bi Jiwda mer bap tikak. Yimb nuk ak Luk. Nuk dokta ak pen; Pol yip tanġiy, Jiysis nup tikey yomb giy, yerer gindand apiy kumiy tikjak Nop ker amnak ak, kesim dey niņrep gak rek, biynimb nuk Jiwda mer Jiysis nup gosimb niņyak gok kuyip tikak.

Nuk Jiysis Yisrel biynimb kuyip nep mer, Jiwda mer gok kuyip kunep Gor ker diniņg awak minim ak anġrep gak (Luk 2:32, 3:6, 24:47).

Bi kun ak nep Baybol buk day “Apasol” apun ak kunep tikak.

### Minim Ar Keykey Mindip Rek:

Minim nind anġgak ak mindip, chapta 1:1-4.

Jon bi niņg piknemb ak yip Jiysis yip kuyip tikyak minim ak mindip, chapta 1:5–2:52.

Jon bi niņg piknemb ak woņg kiņiņ gi gak minim ak mindip, chapta 3:1-20.  
Jon Jiysis nup niņg piknāk ak sek, Seytan Jiysis nup tom gak minim ak sek mindip, chapta 3:21–4:13.

Jiysis miņmon Galiyliy woņg kiņiņ gi gak minim ak mindip, chapta 4:14–9:50.

Jiysis Galiyliy nimb woņg gindand Jerusalem amnak minim ak mindip, chapta 9:51–19:27.

Jiysis niņ nuk ak maņ giy wiyk nokom bap mindakniņ, Jerusalem sek, yep maņ kun okok sek anġniरणgek minim ak mindip, chapta 19:28–23:56.

Jiysis kumiy tikjakek biynimb kuņaynep nup misiņ niņyak ak sek, arachak Nop ker amnak minim ak sek mindip, chapta 24:1-53.

### Luk Biyomb Tiyooylas Nup Minj Tikak

**1** <sup>1-2</sup> Biyomb Tiyooylas. Krays nup namb chinup biy tikey yomb giy, gak gak rek, bi gunap windin niñiy aḡḡeyak, bi gunap niñiy, kesim nokom kun ak nep ar keykey tikyak. <sup>3</sup> Pen biyomb niñan: Jiysis nind gek owak rek, yand per kiñiy piyowniy tep gipiyn ak mey, kunep tikniḡ gispiyn. <sup>4</sup> Kun giy tiken mey, minim nip aḡgey niñban ak, niñind yimb nep apay aḡgiy niñniḡgamban.

### Jon Bi Niñiḡ Pikñemb Ak Tikniḡgamb Aḡgak

<sup>5</sup> Nind Herot Jiwdiya propens kond mindyḡḡip ñin ak, binak Sekaraya, Gor nup simbongep wong ak gi mindyḡḡip. Bi layn nuk yip wong jimñiy giyḡḡipay gok kuyip, Abayja Layn aḡgyḡḡipay. Pen bi Sekaraya kun ak biynuk yimb ak Eliysabet. Nup kunep bi Gor nup tap simbongep Eron kiñiy ak tik dand amiy tikyak.

<sup>6</sup> Kiykber Gor minim ar ak maḡgiyseḡ kisen giy minder; Gor niñek minim bap ma mindek. <sup>7</sup> Pen Sekaraya biynuk Eliysabet ñapan wom ak mey; ñapan bap tikiy mer, pisnep yimb tokiy ayrik.

<sup>8-9</sup> Niñ bap Sekaraya binuk yip wong jimñiy giyḡḡipay gok, ap Gor nup simbongep wong ak tip giniḡ aḡgyak, “Wong giniḡgambun kun ak, bi chin an rek biyomb aḡgayon chinup gunap kond mindeniḡgamb aḡgiy,” sandiw rek ak giy mey, Sekaraya nuk wiyn giy, kuyip kond mindyḡḡip. Tap kuyrep apyḡḡip gok Gor aḡḡniḡep korip miḡḡan ak amiy, daḡgiyḡḡip. <sup>10</sup> Pen niñ bap, tap kuyrep daḡgiyep won ak apeḡ, biynimb kuḡaynep ap mis biyaḡ nan-giy lotiw mindyakiñiy, Sekaraya nuk tap kuyrep wak kun ak daḡgiyning, korip ñiluk miḡḡan ak amniḡ saḡḡak. <sup>11</sup> Amjakakiñiy, enjol bap ap tap kuyrep wip daḡgiy ayiḡḡipay niñ yipund kind okok ken miseḡ gak. <sup>12-13</sup> Sekaraya niñiy jiwdiy piriḡek, enjol ak nup aḡgak, “Ma piriḡnimin! Gor nup minim aḡḡniñban ak niñimb. Biynak Eliysabet ñi bap tikniḡgamb. Tikeḡ yimb nup Jon aḡḡnimin. <sup>14-15</sup> Nuk Gor nup wong gek; Gor nup tep giy, nip key tep giy, biynimb gok kuyip tep giy giniḡgamb. Nonim nup tikeḡ, Gor Kawnan ak yip nep mindeniḡgamb ak mey; niñiḡ wayn akaḡ, niñiḡ kilis gunap ma niñnimuḡ. <sup>16</sup> Kisen Yiḡrel biynimb Gor nup kirpay gok kuḡaynep aḡḡrep gek, Gor nup Biyomb chin aḡgiy diniḡgambay. <sup>17</sup> Pen niñ nand kun ak, Gor Yilayja nup kilis niñiyḡḡip rek ñakiñiy, nop sikop kuyip diy, ñapan nuk sikop kuyip diy di jimñiy ayniḡgamb. Biynimb Gor nup alemb alemb niñbay gok aḡḡ tep gek; biynimb nup gosimb niñiy suḡ-tep mindpay gok yip mind tep giyḡḡ, Biyomb anup kond mindyakiñiy winiḡgamb aḡgak.”

<sup>18</sup> Enjol ak kun aḡḡek, Sekaraya aḡgak, “Chir tokiy yimb aypur ak, yergiy ñapan tikniḡgambur? Kun ak yergiy niñiy, niñind yimb apan aḡḡniḡgayn aḡgak.” <sup>19</sup> Aḡḡek, enjol ak Sekaraya nup aḡgak, “Yand

Gebriyel, Gor windin yirik ar ak minden yip yokek, minim tep kun ak dand opiyn. <sup>20</sup>Pen niñind angip angiy ma niñban rek, joñimb nip ak miker gek, minim angiyng ma mindeningamban. Yikop nep mind mind, ñi ak tikiy nep, tip ak minim angningamban angak.”

<sup>21</sup>Pen biynimb mis biyañ mindeyak gok, Sekaraya Gor angniñep korip ñiluk miñgan ak am tapin yimb mindek niñiy, gos kuñay yimb nep niñyak. <sup>22</sup>Kisen nuk mis apiy, yip kun kun gip angiy, ñin anep yomek; korip miñgan biyañ am mindiy, tap bap key niñiy wip angiy niñyak.

<sup>23</sup>Pen Sekaraya Gor angniñep korip woñg ak gi mindek, ñin nuk ak day jiwakniñ, bi gunap ap tip nup ak diyakniñ, nuk andkind korip amnak.

<sup>24-25</sup>Mind dand amiy, biynuk Eliysabet ñapan koñgiy mindiy angak, “Biyn ñapan wom minden yip nambiñ gak ak pen, miñiy Biyomb ak yip simb niñiy kond mindek, ñapan koñgiy mindpiyn ak; yip tep gip rek, nambiñ ma giniñgamb angak.” Kun angiy, takin onep mamind ak, kapkap korip miñgan okok nep mindiyngip.

### Jiysis Nup Tikniñgamb Angak

<sup>26</sup>Takin kanjol ak, Gor enjol Gebriyel nup angyokek, pañ Mariya nup niñning miñmon sikoy Nasaret amnak. <sup>27</sup>Pañ kun ak, binak Josep nup diniñgamb angiy minim angyak. Bi Josep kun ak, kiyñ Depiyt tikek, tik dand amiy tikyak. <sup>28</sup>Enjol Gebriyel pañ Mariya mindek ak amjakiy angak, “Mariya mindpan? Gor nip direp gip. Nuk yip mindpiyr angak.”

<sup>29</sup>Kun angkek, Mariya minim kun ak niñiy, yip yenen kun asap angiy gos kuñay niñek, <sup>30</sup>enjol ak nup angak, “Ma piriknimin! Gor nip direp yimb gip. <sup>31</sup>Nand ñapan koñgiy mindiy, ñi bap tikniñgamban. Tikiy yimb nup Jiysis angnimin. <sup>32</sup>Pen nuk biyomb yimb mindek, Gor Ñinuk angningambay. Gor gek, nusind yes Depiyt, kiyñ yomb mindiyngip rek mindiy, <sup>33</sup>nimbip Jekop tikek tikey mindpim gok mangiysek, perper yimb kond mindeningamb angak.”

<sup>34</sup>Enjol ak kun angkek, Mariya angak, “Yand bi bap yip ma mindpur ak, yergiy ñapan kun ak tikniñgayn?”

<sup>35</sup>Angkek, enjol ak nup angak, “Gor Kawnan ak nep gek, ñapan suñ-tep yimb ak tikniñgamban ak mey, nup Gor Ñinuk angningambay.

<sup>36</sup>“Niñan! Namind Eliysabet nup biyn ñapan wom angiyngipay ak pen; miñiy tokiy yimb ay, ñapan koñgiy mindip. Takin omiñal omiñal mindiy, ñi bap tikniñgamb. <sup>37</sup>Gor tap ma ginimuñ rek bap ma mindip; tap okok mangiysek ginimuñ rek anep mindip angak.”

<sup>38</sup>Kun angkek, Mariya angak, “Yand Gor nup woñg giñemb pañ bap ak, aspan rek nep yip ginimuñ angak.” Kun angakniñ, enjol ak nup kirgiy amnak.

### Mariya Am Numind Eliysabet Nup Niñak

<sup>39-40</sup>Pen Mariya kasek amniyn angiy, Jiwdiya propens yirik okok kinjeñ par ak am am, Sekaraya korip ak amjakak. Amjakiy, numind

Eliysabet nup angak, “Nand mindpan?” <sup>41</sup> Anggek, numind Eliysabet ñapan mindek ak kawin ayak. Pen Gor Kawnan ak Eliysabet nup gek, <sup>42</sup> menj miŋgan dand araniy Mariya nup angak, “Gor biyn gunap kuyip kond mindip ak pen; nip key yimb direp gip. Ñapan kongiy mindpan kayan ak kunep kond mindip. <sup>43</sup> Yergiy rek minden, Gor yip direp giyŋ, Biyomb chin nonim ak yip ker apek niŋsiy? <sup>44</sup> Nand ap yip ‘Mindpan?’ angey, ñapan koŋiy mindpiyn ak, tep gakniŋ kawin ayip. <sup>45</sup> Pen Gor nip angip rek giniŋgamb angyi niŋban ak, tep yimb gipan angak.”

### Mariya Kamep Rek Angyŋ, Gor Nup Yimb Ak Dand Aranak

<sup>46</sup> Eliysabet kun anggek, Mariya Gor nup gosimb niŋyŋ, tep gakniŋ angak:

<sup>47-48</sup> “Yand pisnep kumemb rek mindenik, Gor yip simb niŋy tungasik dak ak, nup niŋen yip tep gip. Yand yikop pañ nup woŋg giñimbiyn ak pen; yip sakiy ma gip. Kun gip ak, miñiy tikiy, biynimb gok maŋgiysek, Gor biyn kun ak nup direp yimb gak angniŋgambay.

<sup>49</sup> “Gor Biyomb tap okok maŋgiysek gip ak, yip direp yimb gip. Nuk bi suŋ-tep kun ak key yimb mindip. <sup>50</sup> Biynimb minim nup niŋy ñawil diy, kisen giniŋgambay gok, kuyip simb niŋy diniŋgamb. Ñapan kiy tikenŋgambay tikey amniŋgamb gok, kunep giniŋgamb. <sup>51</sup> Nuk bi ñin paryomb yimb. Biynimb chin key biynimb yomb mindpun apay gok kuyip, yuk yokip.

<sup>52</sup> “Kun ak, biynimb yimb mindip gok keykey amey, biynimb yimb ma mindip gok tip kuyip ak dipay. <sup>53</sup> Pen biynimb yiwani gip gok kuyip niŋy, tap ñimb; biynimb tap kuŋay mindip gok niŋy, yikop angyokek ambay.

<sup>54</sup> “Apis basind yes chin gok kuyip minim angak ak sakiy ma giy, chinup Yisrel biynimb per simb niŋy kond mindrep gip.

<sup>55</sup> “Basind Ebrahim sek, basind chin gunap sek ñapan tikenŋgambay tikey amniŋgamb gok, kuyip kond mindeniŋgayn angyi angak rek chinup gip angak.”

<sup>56</sup> Mariya minim kun ak angyi, numind Eliysabet yip takin omiŋal nokom mindiy, andkind korip nuk amnak.

### Eliysabet Ñinuk Jon Bi Ñiŋ Pikñemb Anup Tikak

<sup>57</sup> Mind dand amiy, Eliysabet ñi won ak tikak. <sup>58</sup> Gor nup kond mindek, tokiy yimb ay ñapan tikak kun ak; biynimb nuk gok niŋy, nuk yip miñmiñ yimb giyak.

<sup>59</sup> Pen ñi ak tikiy ñin onep ar ak mindiy, ñin jiy ak kumbak nup ak tikiy angyak, “Ñi kun biy, nop Sekaraya yimb ak tiŋy yinj gep angyak.”

<sup>60</sup> Angey, nonim angak, “Mer. Yimb nup Jon angep angak.” <sup>61</sup> Anggek,

biynimb nuk gok angyak, “Binuk gok, Jon yimb bap ma mindip angyak.”  
 62Kun angyi, nop Sekaraya nup ñin anep yomiy angnineyak, 63nuk ñin anep yomiy angak, “Yip tap pisband bap sek, kil tikep tap par bap sek dowim angak.” Angek, dand apey, ar kun ak yimb tikiy, enjol ak nind angak rek, “Yimb nup ak Jon angak.” Kun giy tikek niñiy, kiyk gos kuñay yimb niñyak. 64Pen Sekaraya jonimb miker gak kun ak awan amnakniñ, day minim angyiñg, Gor nup yimb ak dand aranak. 65Biynimb mindeyak gok, gak kun ak niñiy, minim kun ak ying dand miñmon Jiwdiya yirik okok mangiysek yimb amniyak. 66Biynimb gok minim kun ak niñiy angyak, “Gor gek ñapan kun giy tikip ak, kisen yergiy rek mindeningamb angyak.”

### Sekaraya Gor Nup Kamep Rek Angak

67Jon nop Sekaraya, Gor Kawnan ak bak ayek, Gor nup minim tep gunap kamep rek angyi angak:

68 “Chin Yisrel biynimb, Bapiy Gor nup yimb ak dand aranjun.

“Chinup pisnep kirgiyn angyi gos ak ma niñimb; simb niñiy dingingamb.

69-70 “Kun ak bi minim nup angep gok wosrey angyak rek, Biyomb bap yokek apiy, chinup kond mindek, kim amningambun.

“Biyomb kun ak, basind Depiyt Gor nup wong giñiyiñgip bi ak ñapan tikek; kiy pen tik dand amiy apiy giy, nup tikniñ gispay.

71 “Gor angak, ‘Yand mindpiyn rek, nimbip miluk niñiy, timey giniñgiy rek ma ayningamb angak.’

72 “Nuk chinup simb niñiy direp gip kun ak, basind sikop kuyip sakiy ma giy, giniñgayn angyi angyak rek nep gip.

73 “Nuk basind Ebrahim nup minim angyak angak, 74-75 ‘Nimbip kond minden biynimb miluk niñbay gok, nimbip timey giniñgiy rek ma ayningamb. Ma pirikniñgambim; gos yip ak niñiy, wong yip ak giy, biynimb tep yand gok nep mindiy, mind tep giniñgambim angak.’

76 “Pen ñi yand. Nand wong giniñgamban rek niñiy, angningambay, Gor Biyomb yimb ak, bi minim angep nuk angningambay. Yenen, nand nind amiy, biynimb gok kuyip angrep gey, Biyomb anup kond mindyakniñ, nuk winiñgamb. 77Nand kuyip angrep gey, Biyomb ak apiy, tap siy tap timey gipay gach ak wiykyokiy, kuyip dingingamb.

78-79 “Gor bi tep biynimb simb niñimb ak, melik tep semb biyon nimb ak chinup yokeningamb mey; kisyimnamb okok tangiy, gi dam pikiy, kumemb rek ayip ak kirgiy, kinjeñ tep ar ak tangeningambun angak.”

80Pen Sekaraya ñinuk Jon, miñmon nep namb okok mind mind, pisnep yomb gi day tikiy apek, Yisrel biynimb nup niñyak.

**Jiysis Nup Tikak**  
(*Mat 1:18-25*)

**2** <sup>1</sup>Pen Jon nup tikyak ñin namb kun ak, gapman biyomb Siysa Ogastas, low ay aᅅgak, “Biyimb yand kond mind asikpiyn rek, maᅅgiysek yimb diniᅅgiy aᅅgak.” <sup>2</sup>Nind kiᅅiᅅ giy, yimb dinimimb aᅅgiy diyak ñin kun ak, gapman biyomb Sayriyniyas, Siyriya biynimb kuyip kond mindek. <sup>3</sup>Pen biynimb miᅅmon paryomb okok nimb ap yikop mindeyak gok yimb diniᅅᅅ, andkind miᅅmon kiyk key okok amniyak. <sup>4</sup>Kun gey niᅅiy, Josep nup Depiyt kiᅅiᅅ ak tik dand amiy tikyak rek; Mariya nup poᅅind, miᅅmon sikoy Nasaret Galiyliy propens ak kirgiy, Jiwiya propens amiy, kiyᅅ Depiyt nup tikey mindyᅅᅅᅅip miᅅmon sikoy Betliyheme amnak. <sup>5</sup>Pen biyn nup minim aᅅgyak kun ak, ᅅapan koᅅgiy sek mindakniᅅ, poᅅind yimb diniᅅᅅ amnak. <sup>6-7</sup>Amjakiy niᅅak; maniᅅ tawiy kinyᅅᅅipay korip ak pisnep timbik dak ak mey, kaw mokyᅅᅅipay korip ak mindiy, Mariya ᅅapan nind won ak tikak. Tikiy chech kom kom giy, di kaw tap kaskas ayey ᅅimbyᅅᅅipay kes miᅅgan ak ayak.

**Enjol Ak Kanj Siypsiyp Mokep Bi Gok Kuyip Aᅅᅅak**

<sup>8</sup>Pen Mariya Jiysis nup tikak ñin kun ak, bi kanj siypsiyp mokep gok, gunap kisyimken ak kond mindeyak miᅅmon kun okok. <sup>9</sup>Gor enjol bap melik sek yokek, melik kun ak ap kuyip pikniᅅek niᅅiy, piriᅅyak. <sup>10</sup>Pirikey, enjol ak kuyip aᅅgak, “Ma piriᅅnimimb! Yand nimbip biynimb okok maᅅgiysek, minim tep miᅅmiᅅ gep ak dand opiyn. <sup>11</sup>Miᅅiy biyn bap, Biyomb chin per kond mindpun ak tikip; Depiyt mindyᅅᅅᅅip miᅅmon ak. Kisen nuk Biyomb mindiy, tap siy tap timey gipim gach ak wiykyokiy, nimbip di Gor yip jimᅅiy aᅅniᅅᅅamb. <sup>12</sup>Nup am piyow niᅅiy niᅅniᅅᅅambim: nonim nup chech kom kom giy, di kaw tap kaskas ayey ᅅimbay kes miᅅgan ak ayek mindeniᅅᅅamb aᅅgak.” <sup>13</sup>Kun aᅅgakniᅅ, enjol kuᅅay yimb nep semb biyoᅅ nimb apiy, Gor nup yimb ak dand aranyᅅᅅ aᅅgyak, <sup>14</sup>“Gor yimb nup ak dand yiy ar biyoᅅ aranemb aᅅgyak.”

**Bi Kanj Siypsiyp Mokyak Gok Am Jiysis Nup Niᅅyak**

<sup>15</sup>Enjol gok andkind semb biyoᅅ amniyakniᅅ, bi kanj siypsiyp mokep gok minim aᅅᅅniᅅ aᅅᅅniᅅ giy aᅅgyak, “Gor aᅅᅅamb, chinup minim kun giy apay ak, kasek Betliyheme amiy niᅅun aᅅgyak.” <sup>16</sup>Aᅅᅅiy, amiy niᅅyak: Josep yip, Mariya yip ᅅapan aᅅgyak kun ak, chech kom kom giy, kaw tap kaskas ayey ᅅimbay kes miᅅgan ak ayer mindek. <sup>17</sup>Niᅅiy aᅅgyak, “Enjol gok, kisen ᅅapan kun ak nimbip kond mindeniᅅᅅamb apay ak, mey biyey! aᅅgyak.” <sup>18</sup>Bi kanj siypsiyp mokep gok minim kun ak aᅅᅅey, biynimb gok niᅅiy, gos kuᅅay yimb niᅅyak. <sup>19</sup>Pen Mariya nup tap key yimb ak gak

rek, tep gek gos niŋyŋg nep mindyŋgip. <sup>20</sup>Bi kanj siypsiyp mokep gok, Gor enjol nuk gok aŋgyak rek nep gek, windin key niŋiy, yimb nup ak dand aranyŋg, andkind korip amniyak.

### Jiysis Nup Tikiy Yimb Ayak

<sup>21</sup>Mariya ñi ak tikiy ñin onep ar ak mindiy, minek jiy ak kumbak tikiy yimb ayniŋg, enjol ak nind nonim nup, yimb ak kun giy aynimin aŋgak rek, yimb nup ak Jiysis aŋgyak.

### Bi Simiyon Yip Biyn Ana Yip Jiysis Nup Niŋrik

<sup>22-23</sup>Pen Mosis Gor low minim ak tikiy, ñi nind tikniŋgambay gok, Gor nup aŋgniŋgambay aŋgak ak mey, Mariya ñapan ak tikiy, Jiwda biynimb giyŋgipay rek, Gor aŋgniŋep korip ak asikiy mindek suŋ ayakniŋ, Josep yip, Gor ñapan nup ak aŋgniŋg, dand Jerusalem amiy, Gor aŋgniŋep korip amnirik. <sup>24</sup>Pen low minim bap tikiy, “Biyn ñapan tikniŋgiy gok suŋ ayek, yakir maliŋg akan, kochir omiŋal dand Gor aŋgniŋep korip mis ar ak amiy, pik Gor nup simboŋg ñiy mey, suŋ ayip aŋgiy, Gor aŋgniŋep korip miŋgan ak amniŋgambay aŋgyak.” Gos kun ak kunep niŋiy mey, yakir omiŋal sek dand amnirik.

<sup>25-26</sup>Pen Jerusalem amiy, yakir omiŋal ak Gor nup simboŋg ñiy, korip miŋgan amiy niŋrik: bi mind tep yimb giy, Gor nup nep aŋgniŋyŋgip bap mindek. Yimb nuk ak Simiyon. Nuk Gor Kawnan ak yip mindyŋgip ak mey; nup nind aŋgak, “Biyomb Gor yokek Yisrel biynimb kuyip diy kond mindeniŋgamb ak apek niŋiy, kisen kumniŋgamban aŋgek,” niŋmindyŋgip.

<sup>27</sup>Pen ñin kun ak, Gor Kawnan ak Simiyon nup gos ñek, Gor nup aŋgniŋep korip ak amiy niŋak; Josep ber, Jiysis nup dand apiy, Mosis aŋgak rek giniŋ ap minderik. <sup>28</sup>Kuyip niŋiy, Jiysis nup di kaygiy, Gor nup yimb ak dand aranyŋg aŋgak:

<sup>29-30</sup> “Biyomb. Ñapan biy yomb giy, chinup di nip yip jimñiy ayniŋgamb ak, tep yokey miseŋ niŋsiyiyn. Kun ak yip aŋgnak rek yepyey, tep gakniŋ kumnim.

<sup>31-32</sup> “Ñapan kun biy, biynimb nand Yisrel kuyip nep daŋ aŋgiy ma yokpan; biynimb yikop okok kuyip kunep daŋ aŋgiy yokpan.

“Pen melik tep nand ak kuyip niŋakniŋ, chinup Yisrel biynimb yimb ak dand araniŋgambay aŋgak.”

<sup>33</sup> Simiyon Jiysis nup kaygiy, minim kun ak aŋgakniŋ, Josep ber gos kuŋay niŋrik. <sup>34</sup>Pen nuk kuyip bilesiyim giyŋg, Jiysis nonim Mariya nup aŋgak, “Ñi nand kun biy mindakniŋ, Yisrel biynimb kuŋaynep namb ak anjilakiy, kinjeŋ tep diy amniŋgambay gok, Gor ker amniŋgambay; kinjeŋ timey diy amniŋgambay gok, apyap pikniŋgambay. Niŋyaŋ aŋgiy, nup yokak ak pen, nup ma diy

anġjiwningambay. <sup>35</sup>Kun giy mey, yerer giy gos niñiy mindpay rek, biynimb niñningambay. Pen mindmangiy nip ak kalaw yimb giningamb anġak.”

<sup>36</sup>Pen ñin kun ak, biyn Gor minim anġep bap kunep ap mindek. Yimb nuk ak Ana. Nop yimb ak Pañiwel. Biynimb Esa anġyিংgipay kiñiñ ak tik dand apiy mey, Ana nup tikyak. Pen Ana simiy nuk ñin jiwiy omiñal nokom, andikiy onep anġip piskind ak yinak. Nind bi diy, nunġumiy yip minder simiy yin ayak ar ak. <sup>37</sup>Pen nunġumiy kumakniñ, Gor nup gos anep ayek, ñin gunap tap ñimbiy mer, Gor anġniñep korip ak amiy, pumbnamb kisyimken anġniñ mindyিংgip.

<sup>38</sup>Pen nuk Jiysis nup di mindeyak mañ siñak apiy, Gor nup tep anġiy, biynimb Gor chinup diy kond mindeningamb anġiy niñyak gok kuyip anġak, “Ñapan biy yomb giy, chinup di Nop yip jimñiy ayingamb anġak.”

### Jiysis Nup Dand Andkind Nasaret Amnirik

<sup>39</sup>Josep ber Gor low minim anġiy tikyak rek giy, tip ak andkind Galiyliy propens amiy, miñmon kiyk Nasaret amnirik. <sup>40</sup>Am mindiy Jiysis yomb giy, Gor nup kond mindakniñ, gos tep yimb niñiy, mind tep gak.

### Jiysis Gor Anġniñep Korip Amnak

<sup>41</sup>Nop nonim ber simiy ak simiy ak, enjol ak Yijip biynimb kuyip pikaying, chinup Jiwda biynimb gok kirkak ñin yomb Pasopa ak miñiy anġiy, am Jerusalem nan-giyingipay. <sup>42</sup>Kun giy mey, Jiysis simiy nuk yin wimiñgan ak ayek, nop nonim yip Jerusalem am mindey, <sup>43-44</sup>ñin yomb kiyk kun ak apiy pandikakniñ, korip amġipun anġiy, andkind kinjeñnamb ak apiy niñrik: Jiysis yip ma apeyak. Nuk Jerusalem nep mindek ak pen, kiyk ma niñiy anġrik, nuk biynimb gunap yip asaw anġiy niñrik. Pen kinjeñnamb ak kiniy, nup ma nep niñiy, <sup>45-48</sup>numiy numam sikop yip mindip akañ anġiy, piyow andkind Jerusalem amiy niñrik: nuk am Gor nup anġniñep korip ak mindiy, biyomb low tiysa gok yip minim anġ mindek. Biynimb ap niñmindeyak gok, Jiysis anġak rek niñiy, ñi gos kind anġiy niñiy, minim anġ tep yimb gip ak anġiy, wal anġyak. Pen nop nonim ber nup kunep niñiy, ñi ak gos nuk ak key niñiy kun gamb, nup ñin omiñal nokom ma niñbur anġiy, wal anġrik. Nonim pen, Jiysis nup anġak, “Nap chirup yenen kun gey, mindmangiy kalaw gakniñ, nip piyow niñraspur?” <sup>49</sup>Anġek, Jiysis anġak, “Yenen yip piyow tangying aspiyr? Bapiy yand korip mindeningayn ak ma niñbiyr?” <sup>50</sup>Jiysis kun anġak ak pen, minim asap ak anġiy ma tik niñrik.

<sup>51</sup>Pen ñin kun ak, Jiysis nup poñind andkind miñmon kiyk Nasaret amerik, nuk kun okok mindying, nop nonim anġyিংgipiyr rek nep niñiy kindik giyিংgip. Pen nonim, nuk yerer gak ak niñying nep mindyিংgip.



<sup>52</sup> Jiysis miñmon Nasaret mindiy, pisnep yomb giy, gos niñrep yimb gek, Gor sek, biynimb gok sek nup niñey tep gak.

**Jon Bi Ñiñg Pikñemb Ak Minim Angyñgip**  
(*Mat 3:1-12; Mak 1:2-8; Jon 1:19-28*)

**3** <sup>1</sup>Rom gapman biyomb yimb Siysa Taybiyriyas, miñmon okok kond mindek, simiy ak yin ayak anjip piskind ak. Pen nuk paryomb okok mindiy, bi kond mindep namb kayañ nuk gunap anjek, am miñmon sikoy gunap kond mindeyak. Binuk Ponsis Paylat, Jiwdiya biynimb gok kuyip kond mindek. Binuk Herot, Galiyliy biynimb gok kuyip kond mindek. Herot numam nuk Piyliyp, Yitiwriya biynimb gok sek, Trakonaytis biynimb gok sek kond mindek. Layseniyas, miñmon Abiyliyniy biynimb gok kuyip kond mindek. <sup>2</sup>Pen won kun ak, binak Anas yip, Kayapas yip, biyomb Gor nup simboñgep omiñal ak Jerusalem minderik.

Pen ñin namb kun ak, Sekaraya ñinuk Jon, biynimb kuñay ma mindeyak namb okok kin mindakniñ, Gor nup gos ñek, <sup>3</sup>Joden ñiñg gol okok amiy, biynimb gok kuyip minim angnñiyñg angyñgip, “Tap siy tap timey gipim ak, yenen kun gipun angyi kirgiy, Gor nup nep gosimb niñem, nimbip ñiñg pikñen mey; Gor niñiy kirginingamb angyñgip.”

<sup>4</sup>Jon kuyip Gor minim angnñak kun ak, bi Gor minim anjep Asaya, giningamb angyi tikak rek nep gak. Asaya minim tikiy angak:

“Bi bap biynimb kuñay ma mindpay namb okok menj miñgan dand araniy angnñgamb, ‘Per, biyomb asaw angyi, kinjen pindrep giy kond mindpay. <sup>5</sup>Kun ak, dum okok piñiysak tep giy, giw miñgan okok lum ñi tep giy, kinjen tind mand giy mindonimuj gok; pind yipund giy, kamb gok diyok tep giy, tap siy tap timey gipim ak kirgiy, Biyomb anup kond mindenimimb. <sup>6</sup>Kun giy mey, biynimb okok mangyisek, Gor binuk yokek biynimb dingingamb anup niñrep giniñgiy angnñgamb’ angyi” tikak.

<sup>7</sup>Jon Asaya angyi tikak rek angakniñ, biynimb kuñaynep mindek ak apiy angyak, “Chinup ñiñg pikñan anjep,” kuyip angyi angak, “Siy saraw ñapan nuk guniy. Yerip gos ak niñiy pirik opim? ‘Ñiñg pikon, Gor biynimb gunap kuyip angyi giningamb ñin ak, chinup ma angyi giningamb angyi’ pirik opim? <sup>8</sup>Ñiñg pikniñg, tap siy tap timey gipim gok yenen kun gipun angyi kirgem mey, Gor nup gosimb niñbay angyi, nimbip ñiñg pikñinim! Pen gos bap niñiy, chin Ebrahim ñapan nuk angyi, Ebrahim nup nep gos ak ma niñnimimb. Nuk tikek, tikey wak gok chin mindpun apim ak, tap yikop. Gor kamb guniy diy, Ebrahim ñapan nuk gunap giniñg gipkop. Kun ak bi tep Ebrahim tikek; tikey amiy apiy gek chinup tikpay apim ak, Gor niñek minim rek ma apim.

<sup>9</sup>“Pen niñrep ginimimb! Gor mon mangyi ma piyip gok timb dangyiniñg, tiw ak mamb giy mindip angak.”

<sup>10</sup> Jon minim kun ak rek angakniŋ, nup pen angniŋiy angyiŋgipay, “Chinup yergiyaŋ angiy apan?” Angey, kuyip angyiŋgip, <sup>11</sup> “Biynimb tingliys omiŋal mindonimuŋ gok, bap biynimb tingliys ma mindonimuŋ gok kuyip ŋiniŋiy. Pen biynimb tap keŋmaŋgiy mindonimuŋ gok, gunap biynimb tap ma mindonimuŋ gok kuyip ŋiniŋiy angak.”

<sup>12</sup> Pen bi takes dep gok, Jon chinup ŋiŋ pikŋaŋ angiy, ap nup angniŋiy angyiŋgipay, “Tiysa. Chin yerginjun?” <sup>13</sup> Angey, kuyip angyiŋgip, “Takes ak diniŋg, gapman kay apay rek nep dinimimb. Yesek gunap ma dinimimb angyiŋgip.”

<sup>14</sup> Rom biynimb, amiybi kiyk ap poliys rek mindyiŋgipay gok, Jon nup minim kun ak rek nep angniŋiy angyiŋgipay, “Chin yerginjun?” Angey, kuyip angyiŋgip, “Biynimb gok kuyip timey ma giy, kor yesek giy maniy kuyip ak ma dinimimb. Woŋg gipim rek nep dinimimb angyiŋgip.”

<sup>15</sup> Pen kun gi mind dand amiy, biynimb gok gos ar bap niŋiy angyak, “Bi biy, Kiyŋ yomb key yimb per kond mindpun ak rek ayip angyak.”

<sup>16</sup> Angey, nuk minim kun ak niŋiy kuyip angak, “Yand nimbip yikop ŋiŋ pikŋimbiyn; Biyomb yimb ak kisen winiŋgamb. Nuk Biyomb yimb; yand bi yikop. Nup niŋen yip nambiŋ gip. Tomb tirup nup gok tuŋgasikyŋg, tap nup gok marik ginim rek ma ayip. Nuk apiy, Gor Kawnan yipund giy, mon maŋlaŋ rek ak nimbip yokniŋgamb.

<sup>17</sup> “Pen nuk wiyt maŋgiy pikgek gipay rek ak giniŋgamb. Wiyt maŋgiy ŋiŋemb gok key ay, wiyt cheŋg gok key ay giniŋgamb. Kun giy, wiyt maŋgiy ŋiŋemb gok dand korip nuk amniŋgamb, cheŋg gok dam mon per yin mindip ak yokniŋgamb angak.”

### Herot Jon Nup Kalambis Ayak

<sup>18</sup> Jon biynimb gok kuyip, Gor minim tep ak ar gunap anŋen niŋrep giyaŋ angiy, minim tep kun ak rek sikoy ma angyiŋgip. <sup>19-20</sup> Pen gapman biyomb Herot, tap siy tap timey okok gi dand amiy, numam Piyliyp biynuk Herodiyas nup kunep di gek, Jon, ak girep ma gip angek, Herot niŋiy, nup dam kalambis ayak. Herot kisen timey gak ar bap mey kun ak.

### Jon Jiysis Nup ŋiŋ Pikŋak (*Mat 3:13-17; Mak 1:9-11*)

<sup>21-22</sup> Pen Jon nup kalambis ma ayak won ak, biynimb gok kuyip ŋiŋ pikŋiyiŋgip. Jiysis nup kunep ŋiŋ pikŋek, nuk Nop Gor nup angniŋ mindakniŋ, semb biyoŋ liŋg keykey amek, Gor Kawnan ak yakir kochir rek Jiysis ker wakniŋ, minim bap semb biyoŋ nimb apiy angak, “Ni tep yand! Nip niŋen yip tep yimb gip angak.”

**Jiysis Nusind Sikop**  
(*Mat 1:1-17*)

<sup>23</sup>Pen Jiysis simiy nuk ak ñin jiwiy, andikiy onep ar ak amnakniŋ, tikjak Nop Gor nup woŋg ak gak. Biynimb gok Jiysis nup aŋgniŋyak-eŋ, “Nop nuk mey; binak Josep aŋgniŋyak.”

Josep nop ak Heliy.

<sup>24</sup>Heliy nop ak Matat.

Matat nop ak Liypay.

Liypay nop ak Melkay.

Melkay nop ak Janay.

Janay nop ak Josep.

<sup>25</sup>Josep nop ak Matatayas.

Matatayas nop ak Emos.

Emos nop ak Neyam.

Neyam nop ak Eslay.

Eslay nop ak Nagay.

<sup>26</sup>Nagay nop ak Mat.

Mat nop ak Matatayas.

Matatayas nop ak Semen.

Semen nop ak Josek.

Josek nop ak Joda.

<sup>27</sup>Joda nop ak Jowanan.

Jowanan nop ak Resa.

Resa nop ak Serababel.

Serababel nop ak Siyaltiyel.

Siyaltiyel nop ak Neray.

<sup>28</sup>Neray nop ak Melkay.

Melkay nop ak Eday.

Eday nop ak Kosam.

Kosam nop ak Elmandam.

Elmandam nop ak Yer.

<sup>29</sup>Yer nop ak Josiwa.

Josiwa nop ak Eliysa.

Eliysa nop ak Jorim.

Jorim nop ak Matat.

Matat nop ak Liypay.

<sup>30</sup>Liypay nop ak Simiyon.

Simiyon nop ak Jiwda.

Jiwda nop ak Josep.

Josep nop ak Jonam.

Jonam nop ak Eliyakim.

- 31 Eliyakim nop ak Meliya.  
Meliya nop ak Mena.  
Mena nop ak Matata.  
Matata nop ak Netan.  
Netan nop ak Depiyt.
- 32 Depiyt nop ak Jesiy.  
Jesiy nop ak Obet.  
Obet nop ak Bowas.  
Bowas nop ak Salmon.  
Salmon nop ak Nason.
- 33 Nason nop ak Amiynadap.  
Amiynadap nop ak Atmiyn.  
Atmiyn nop ak Anay.  
Anay nop ak Hesron.  
Hesron nop ak Peres.  
Peres nop ak Jiwda.
- 34 Jiwda nop ak Jekop.  
Jekop nop ak Aysek.  
Aysek nop ak Ebrahim.  
Ebrahim nop ak Tera.  
Tera nop ak Nowa.
- 35 Nowa nop ak Seruk.  
Seruk nop ak Reyiw.  
Reyiw nop ak Pelek.  
Pelek nop ak Ebey.  
Ebey nop ak Sela.
- 36 Sela nop ak Keynan.  
Keynan nop ak Apaksat.  
Apaksat nop ak Siyem.  
Siyem nop ak Nowa.  
Nowa nop ak Lamek.
- 37 Lamek nop ak Metiwsala.  
Metiwsala nop ak Yinok.  
Yinok nop ak Jaret.
- 38 Jaret nop ak Makalalel.  
Makalalel nop ak Keynan.  
Keynan nop ak Enos.  
Enos nop ak Set.  
Set nop ak Andam.  
Andam nup mey, Gor gayak.

### Seytan Jiysis Nup Yesek Anggak

(Mat 4:1-11; Mak 1:12-13)

**4** <sup>1-2</sup>Pen Jiysis Joden ñiņg mindiy andkind owakniņ, Gor Kawnan ak nup bak ay, dand miñmon nep namb okok amek, nuk tap ñimbiy mer; yikop nep mindek ñin omiņal jiwak. Pen nuk kun okok girangakniņ, Seytan minim yip ak niņaņ anggiy, ap nup anggak, <sup>3</sup>“Nand Gor Ñinuk mindiy ker, kamb biy angey biret rek ayek ñiņan anggak.” <sup>4</sup>Anggek, Jiysis nup pen anggak, “Baybol buk ak tikiy anggyak, ‘Biyimb gok biret nep ñimbiy ma mindeniņgambay anggyak.’ ”

<sup>5</sup>Anggek, Seytan Jiysis nup dand miñmon yirik paryomb yimb bap amiy, miñmon okok maņgiysek yimb yomiy <sup>6-7</sup>anggak, “Miñmon teprep guniy niņan! Biyomb keykey kond mindpay. Yand miñmon kun gok maņgiysek kond mindpiyn rek, bi bap nup angniņg angniņgayn. Kun ak nand koņgim yimiy yip angniņeniņgamban, miñmon kun guniy maņgiysek nip angen, yimb yomb mindakniņ kond mindeniņgamban anggak.”

<sup>8</sup>Anggek, Jiysis pen anggak, “Nip ma nep angniņniņgayn! Baybol buk ak tikiy anggyak, ‘Biyomb chin Gor nup nep angniņiy, woņg nup anep giñinimimb anggyak’ anggak.”

<sup>9</sup>Kun anggek, Seytan Jiysis nup poņind Jerusalem amiy, dand Gor angniņep korip yiy akyoņ giyak ar ak amiy anggak, “Nand Gor Ñinuk mindpiyn anggiy, pindeng man biyaņ ayan! <sup>10</sup>Baybol buk ak tikiy anggyak, ‘Gor enjol nuk gok anggek nip kond mindeniņgambay.’ <sup>11</sup>Minim bap pen tikiy anggyak, ‘Apyap pikniņg gey, nip dand araney, kamb tomb nip ak ma pikniņgamb anggyak’ anggak.”

<sup>12</sup>Seytan kun anggek, Jiysis anggak, “Biyomb Gor windin yirik ar ak, ñiñloņ ay kun ak rek ma giniņgayn. Baybol buk ak, ‘Nup ñiñloņ ma ayep anggiy tikiyak’ anggak.”

<sup>13</sup>Seytan Jiysis nup minim tom gi mer niņiy, kiriņg amiy, gos nuk okok nep, ‘Minek gunap, nup tip ak tom ginim anggiy’ kasek ma andkind owak.

### Jiysis Miñmon Galiyliy Kiñiņ Giy Minim Anggak

(Mat 4:1-11; Mak 1:12-13)

<sup>14</sup>Pen Gor Kawnan ak Jiysis nup kond mindakniņ, andkind ap miñmon Galiyliy mindiy, key yimb gek niņiy, minim nup ak ying dand, miñmon Galiyliy namb okok maņgiysek amniyak. <sup>15</sup>Nuk Jiwda nan-gep korip okok amiy, minim angrep gek, nup bi tep yimb anggiy, miñmiñ yimb giyak.

### Nasaret Biynimb Jiysis Nup Ma Diyak

(Mat 13:53-58; Mak 6:1-6)

<sup>16</sup>Pen Jiysis nuk miñmon Galiyliy namb okok girang diy, miñmon sikoy mindiy yomb gak Nasaret am mindek. Jiwda lotiw ñin ak apek,

per giyinjip rek, nan-gep korip ak amiy, tikjakiy Baybol buk ak riytiym gining gek, <sup>17</sup>nup bi Gor minim anjep Asaya tikak buk band ak dap ñey, di wisikiy, minim angning gak day ak niñiy, kuyip riyt giy anggak:

<sup>18</sup> “Biyomb ak, wong nuk gunap yip gan anggiy, Kawnan nuk ak yokek yand yip mindip. Kun ak biynimb simbgeprek gok angrep gen niñningambay. Biynimb kalambis rek mindipay gok wisik yoken amningambay. Biynimb windin koy rek mindipay gok gen niñningambay. Biynimb kosyam mindipay gok direp giningayn.

<sup>19</sup>Pen Gor biynimb diniñgamb ñin tep ak, miñiy owip anggiy, biynimb gok kuyip angñiningayn anggak.”

<sup>20</sup>Jiysis minim kun ak riyt gi day jiwiy, buk band ak kom kom giy, bi buk kond mindyinjip anup tip ak ñiy bisgek, biynimb mindeyak gok mangiysek windin ak jiwiy nup nep niñeyak, kuyip anggak, <sup>21</sup>“Asaya Biyomb anjek, per kond mindpim kun ak miñiy miseñ niñsipim anggak.”

<sup>22</sup>Kun anjek, minim tep yimb nuk anggak ak niñiy, yimb nup ak dand araniyak. Pen gos bap niñiy angyak, “Bi kun biy Josep ñinuk rek?”

<sup>23</sup>Kun anjeay, Jiysis kuyip anggak, “Pen yand niñbiyn! Yip angningambim, ‘Nand Kiyñ yomb key yimb per kond mindpun ak, miñmon Kapaniyam mindiy, tap mageprek gey, yind achimal apek niñbun rek ak, miñmon nak biy kunep gey niñjun angningambim.’ <sup>24</sup>Pen nimbip niñind aspiyn. Bi Gor minim anjep gok, miñmon bapik okok tangiy, minim tep ak anjeay, niñind apay anggiy dipay. Pen miñmon kiyk ak key ap anjeay, bi chin gok key aspay anggiy minim kuyip ak ma dipay.

<sup>25</sup>“Pen niñim! Bi Gor minim anjep Yilayja mindek ñin ak, simiy omiñal nokom takin onep kangol ak, miñmon ma yimb pikiy, tap ma jakiy, yiwan yomb sikerek yimb ak gak. <sup>26</sup>Yisrel biyn yandiw yiwan gak gok, kuñaynep mindeyak ak pen; Gor Yilayja nup yokek, am miñmon yomb Saydon miñmon sikoy Sareypar amiy, tap mageprek ak gek, biyn yandiw bap keñmangiy nuk kuñaynep mindek. <sup>27</sup>Pen ar kun ak rek, kisen, bi Gor minim anjep Yilayja mindek ñin ak, Yisrel biynimb soy ayndik ayak gok, kuñay yimb mindeyak ak pen; kuyip gunap gek suñ ma ayak; bi Neman miñmon paryomb Siyriya nimb ak nep gek suñ ayak anggak.”

<sup>28</sup>Jiysis kun anjek, biynimb lotiw korip mindeyak gok niñey miluk timey yimb yapek, <sup>29-30</sup>nup yuk dam minduñ okok yokon kumañ anggiy, yukey amnakniñ, biynimb kuñay mindeyak namb okok amiy kapkap amnak.

### Jiysis Kichekiy Anj Mis Yokak

(Mak 1:21-28)

<sup>31</sup>Nuk miñmon sikoy Kapaniyam Galiyliy propens ak am mindiy, Jiwda lotiw ñin ak apek, tikjakiy kuyip minim angñak. <sup>32</sup>Gor minim ak yiñrimey

giy, yipund giy yimb nep angek, wal yimb angyak. <sup>33</sup>Pen nan-gep korip namb kun ak, bi kichekiy amban ayak bap mindek. Nuk suk yomb angyi angak, <sup>34</sup>“Bi Jiysis Nasaret nimb! Yergining opan? Chinup timey gining opan rek ayip. Yand nip niñbiy; Gor bi suñ-tep nuk anep opan angak.”

<sup>35</sup>Pen Jiysis kichekiy amban ay mindek kun anup angak, “Minim ma angyi, bi ak kirgiy mis amnon.” Angek, mis amying, bi nonim yipund giy anup, biynimb mindeyak namb siñak diyokiy amnak ak pen, nup tapin ma pikak.

<sup>36</sup>Kun gek, biynimb niñmindeyak gok, kiyk nep angnin angnin giy angyak, “Bi kalrimey kun biy, minim kun ak akay nimb dand apiy angek, kichekiy gok mis ambay angyak.” <sup>37</sup>Pen Jiysis gak minim kun ak, ying dand miñmon kun okok mangyisek amniyak.

### **Jiysis Biynimb Gek Suñ Ayak**

*(Mat 8:14-15; Mak 1:29-31)*

<sup>38</sup>Pen Jiysis Jiwda nan-gep korip ak kirgiy, Saymon korip ak amnak. Saymon biyn numok nuk ak tap yomb giy, mumbwak okok mangyisek mon rek yinek mey, biynimb gok apiy Jiysis nup angyak, “Apiy, Saymon numok nup gey, jak amnan angyak.” <sup>39</sup>Angey, nuk biyn tap gek kum mindek man siñak apiy angak “Tap gip biy suñ ayan angak” Kun angakniñ, won anep suñ ayek, tikjakiy biynimb ap mindeyak gok kuyip tap keñmangyi gak. <sup>40</sup>Biynimb kun okok mindeyak gok, minim kun ak niñiy, pumb pañind amnak won ak, biynimb kiyk tap gak gok mangyisek dand Jiysis mindek ak apeyak, kuyip nokom nokom diniñakniñ suñ ayak. <sup>41</sup>Pen biynimb malñiluk akan, tap yerip amban ay mindek gok, angek mis amying, nup niñyak rek suk yomb angyi angyak, “Nand Gor Ninuk.” Kun angey, kuyip kun ma angnimimb angek, angak rek niñiy mis amniyak.

### **Jiysis Miñmon Wikan Gunap Amiy Kuyip Minim Angñak**

*(Mak 1:35-39)*

<sup>42</sup>Minek miñmon yowakniñ, Jiysis miñmon kun ak kirgiy, key minden angyi, miñmon nep namb okok amnak. Amek, biynimb gok kisen amiy, nup piyow niñiy angyak, “Okok ma amninin; chin yip mindon angyak.” <sup>43</sup>Kun angey, Jiysis angak, “Gor yip angyokamb opiyn rek, am biynimb wikan gunap kuyip kunep, Gor biynimb diy kond mindeningamb rek minim ak angningayn angak.” <sup>44</sup>Kun angyi, okok girangying, am Jiwda nan-gep korip okok amiy, minim tep kun ak kuyip angñiyngip.

### **Jiysis Angek Piys Kuñay Diyak**

*(Mat 4:18-22; Mak 1:16-20)*

**5** <sup>1</sup>Jiysis ñin bap am ñing Galiyliy chemb gol ak mindiy, Gor minim tep ak angñakniñ, biynimb kuñay yimb nep, minim tep kun ak

niñun anġiy, chichmiy yimyiñg wiyak. <sup>2</sup>Kun giy wiyakniñ, Jiysis niñak, bi piys dep gok, bot omiñal dap ñiñg chemb gol kun siñak ay, piys dep wimben gok wasyim gi mindeyak. <sup>3</sup>Nuk Saymon Piyta bot ar ak pindeng ay anġak, “Yip di nembnemb gey, ñiñg namb siñbindoñ amnañ anġak.” Anġek, Saymon Piyta bot ak di nembnemb gek, ñiñg namb siñak amek, Jiysis bot ar kun ak bisinġ mindyiñg, biynimb gok kuyip minim anġñak. <sup>4</sup>Minim anġjiwiy, Saymon Piyta nup anġak, “Bot biy pul gi dand ñiñg namb yomb siñbindoñ amiy, wimben ak yokiy piys dim anġak.”

<sup>5</sup>Anġek, Saymon Piyta anġak, “Biyomb. Miñiy kisyim biyañ piys nen tanġon tanġon, miñmon yowip ak pen; piys gunap ma dipun. Nand kun apan ak, wimben ak monmon yokniñun anġak.”

<sup>6</sup>Kun anġiy, wimben yokyakniñ, piys kuñaynep apiy wimben miñgan ak amey, wimben ak aranjakiy puñgrikniñg rek gak. <sup>7</sup>Kun gek niñiy, numam bot ar bap mindeyak gok kuyip ñinan gek apeyak; piys kun gok diy, bot omiñal kun ak ayey, pisnep aranjakiy, poñgek yowniñg rek gak. <sup>8-10</sup>Kun gek niñiy, Saymon Piyta binuk yip bot ar mindeyak gok gos kuñay yimb niñyak. Pen Sebediy ñinuk Jemis yip, Jon yip, bot bap diy Saymon yip woñg jimñiy giyiñgipiyr ak, kunep gos kuñay niñrik. Pen Saymon am Jiysis mindek mañ siñak koñgim yimiy anġak, “Biyomb. Yand bi tap siy tap timey gipiyn ak, nand key okok amnoñ anġak.” Anġek, Jiysis anġak, “Ma piriknimin. Miñiy ñin biy tikiy, bi piys dep ak kirgiy, bi biynimb dand Gor ker owep ak mindeniñgamban anġak.” <sup>11</sup>Kun anġek, bot omiñal ak dam ñiñg gol okok ay, piys tap gok kirgiy, Jiysis nup gosimb niñiy, yip amiy tanġyiñgipay.

### **Jiysis Bi Soy Ayndik Ayak Bap Gek Suñ Ayak**

<sup>12</sup>Pen kisen Jiysis am miñmon yomb bap mindek, bi soy ayndik mumbwak okok mañgiysek ayak bap, ap mindek mañ siñak koñgim yimiy anġak, “Nand yip gey suñ ayning, gey suñ aynimuñ anġak.”

<sup>13</sup>Anġek, nip gen suñ ayningamb anġiy, nup diniñakniñ, suñ ayak. <sup>14</sup>Suñ ayek, bi kun anup anġak, “Jiysis yip diniñek suñ ayip ma anġnimin. Mosis Baybol buk ak tikiy anġak rek, soy ayndik yip ak suñ ayip anġiy, am bi Gor nup simboñgipay gok kuyip yomey, kiyk niñiy, niñind apan anġey, am siypsiyp ñiluk bap kim tiwning dap kuyip ñiyiñg anġnimin, ‘Yip suñ ayip rek, Gor nup simboñgim anġiy, siypsiyp ñiluk biy daswiyn anġnimin.’ Kun gey, biynimb mañgiysek niñiy anġniñgambay, ‘Nup suñ ayip rek kun gip anġniñgambay.’”

<sup>15</sup>Pen Jiysis nup minim ak, miñmon okok kind kind amek, biynimb kuñaynep, nup niñun anġiy apyiñgipay. Biynimb kun gok, gunap minim tep nup ak niñning apyiñgipay; gunap chinup gek suñ ayañ anġiy apyiñgipay. <sup>16</sup>Apey, kuyip minim tep anġñiy, gek suñ ayiñgip. Pen ñin gunap nuk am tip bap key mindiy, Nop Gor nup anġniñ mindyiñgip.



### Jiysis Bi Ñin Tomb Kalaw Gak Ak Gek Suŋ Ayak

<sup>17</sup>Ñin bap Jiysis biynimb gok kuyip minim aŋŋñi mindek. Pen namb kun ak, bi Peresiy gunap, bi low tiysa gunap ap bising mindeyak. Bi kun gok, gunap miñmon yomb Galiyliy keykey okok nimb; gunap Jiwdiya keykey okok nimb, gunap Jerusalem nimb wiyak. Pen Jiysis Nop kond mindek ak mey, biynimb tap gak gok gek suŋ aynimuŋ rek ayak.

<sup>18</sup>Pen bi gunap, bi ñin tomb kalaw gak bap nup, Jiysis mindek korip miŋgan ak dand amon, gek suŋ ayaŋ aŋgiy, <sup>19</sup>yirar ay dand amiy niŋyak: biynimb gok korip miŋgan kun ak pisnep timbikdak. Kun gek, bi yirar ay dand wiyak kun ak, dand korip ar biyoŋ amiy, korip ak tuŋgyikiy, Jiysis mindek namb siŋak yokey amnak. <sup>20</sup>Kiyk nuk gek suŋ aynimuŋ rek ayip aŋgiy niŋeyak, Jiysis bi ñin tomb kalaw gak anup aŋgak, “Mam. Tap siy tap timey gach nip chingip ak, niŋiy kirsipiyn aŋgak.”

<sup>21</sup>Kun aŋgek, bi Peresiy gok sek, bi low tiysa gok sek, gos namb kiyk okok nep key niŋiy aŋgyak, “Bi kun biy an? Nuk Gor nup aŋgjiwying asap. Gor nep mey, tap siy tap timey gach ak, niŋiy kirginimuŋ rek ayip aŋgyak.”

<sup>22</sup>Pen gos niŋyak kun ak, Jiysis key tik niŋiy aŋgak, “Nimb yenen yip gos timey niŋiy kun aspim? <sup>23</sup>Yand bi ñin tomb kalaw gip biy nup, ‘Tap siy tap timey nip chingip gach ak, wiykyokpiyn aŋgnim?’ Akaŋ; ‘Nip suŋ ayip nen; tikjakiy amnoŋ aŋgnim?’ Akaŋ, minim yerip ak aŋgen, nimbip tep giniŋgamb? <sup>24</sup>Pen niŋrep yimb ginimimb! Minim nup apiyn kun ak, kiñiŋ ak mindip. Bi bap Ñinuk Nop minim ak diy mey; man ar biy apiy, tap siy tap timey gipay gach ak wiykyokniŋgamb aŋgak.”

Kun aŋgiy, bi ñin tomb kalaw gak anup aŋgak, “Miñiy nip suŋ ayip nen; tikjakiy yirar band ak dand andkind korip amnoŋ aŋgak.”

<sup>25</sup>Kun aŋgek, biynimb gok niŋmindyakniŋ, won kun anep tikjakiy, nup yirar ay dand wiyak band ak diy, Gor nup tep aŋgying, korip nuk amnak. <sup>26</sup>Kun gek, niŋiy jiwdiy, Gor nup yimb ak dand aranying, miñiy key yimb gamb niŋsipun aŋgiy wal aŋgyak.

### Jiysis Liypay Nup Dak (Mat 9:9-13; Mak 2:13-17)

<sup>27</sup>Pen kisen Jiysis amiy niŋak: bi takes dep ak, takes pikyŋgipay korip miŋgan ak bising mindek. Yimb nuk ak Liypay. Jiysis nup niŋiy aŋgak, “Apey, yand yip taŋgor aŋgak.” <sup>28</sup>Aŋgek, woŋg giyŋgip kun ak kirgiy, tap nuk gok maŋgiyse kirgiy, Jiysis yip taŋgyŋgipiy.

<sup>29</sup>Pen Liypay, Jiysis nup tap yomb ak korip nuk ak daŋgiy ay, bi takes dep gunap, biynimb yikop gunap suk aŋgek apeyak, kiy yip bisgiy tap niŋyak. <sup>30</sup>Pen Jiysis kiy yip tap ñimbek niŋiy, bi Peresiy gunap, low tiysa kiyk gok sek ap, Jiysis binuk gok kuyip aŋgyak, “Nimb yenen bi tap siy diy, bi takes diying maniy siy dipay gok yip bisgiy tap ñimbim?”

<sup>31</sup>Kun anḡeyak, Jiysis kuyip anḡak, “Biynimb kim mindpun apay gok, dokta niḡning ma ambay; biynimb tap gip gok nep, chinup gek suḡ ayan anḡiy, dokta niḡning ambay. <sup>32</sup>Kun ak rek, yand biynimb tep tep gok kuyip diniḡ ma opiyn; biynimb tap siy tap timey giy, mindrep ma gipun anḡiy niḡningambay biynimb gok kuyip diniḡ opiyn anḡak.”

**Lotiw Gos Ak Nep Niḡiy Tap Ma Niḡyak**

*(Mat 9:14-17; Mak 2:18-22)*

<sup>33</sup>Biynimb gunap Jiysis nup anḡyak, “Jon binuk gok yip, Peresiy bi kiyk gok yip ḡin gunap, Gor nup gos nokom niḡjun anḡiy, tap ma ḡimbiy yiwan nep mindiy, Gor nup anḡniḡbay. Pen binak gok yenen tap ḡimbying, ḡiḡ ḡimbying nep mindpay?”

<sup>34</sup>Kun anḡeyak, Jiysis kuyip tikdam ay anḡak, “Chin Jiwda biynimb gipun ar ak; bi bap biyn diniḡ gek, binuk gunap tap yomb ḡiḡning geniḡgambay, biynimb gunap pen tikjakiy, yenen kun gispim anḡiy, ma anḡniḡgambay. <sup>35</sup>Pen kisen biyomb kiyk ak nup ḡanḡ ayeniḡgambay mey, simb gek tap ma ḡiḡningambay anḡak.”

<sup>36</sup>Pen Jiysis, Jiwda biynimb minim nind anḡyiniḡipay ak, minim yand kisen dand ownik ak sesek wopsakniḡiy rek ayip anḡiy, kuyip minim gunap paydoḡ ay anḡak, “Chech nindnimb ak talikek, chech kisenimb bap tuḡgralikiy, dap ḡanḡdey, andip andip ma mindeniḡgamb. Keykey yimb ay, omiḡal giy timey yimb giniḡgamb. <sup>37</sup>Pen ḡiḡ wayn ak kunep; ḡiḡ wayn kim ak diy, kanj meymey wak milip miḡan ak ma sopay. Yenen: soḡiy simjen ḡeniḡgambay, tan araniy, biḡ timey yimb anḡiy puḡgrikiy soḡgek, meymey wak ak timey giniḡgamb. <sup>38</sup>Kun ak niḡiy mey, ḡiḡ wayn kim ak diy, meymey wak kim miḡan ak nep soḡ ayep. <sup>39</sup>Pen biynimb ḡiḡ wayn nindnimb ḡimbay gok apay, ‘Niḡ wayn nindnimb ak tep yimb anḡiy,’ ḡiḡ wayn kim kisenimb ak niḡey, kuyip tep ma gip anḡak.”

**Lotiw Niḡin Ak Yenen Kun Gispim Anḡyak**

*(Mat 12:1-8; Mak 2:23-28)*

**6** <sup>1</sup>Kisen Jiwda lotiw ḡin bap, Jiysis binuk gok yip wiyt woḡ namb ak amyiḡ, binuk gok wiyt maḡiy kun gok gunap tik ḡin beḡ okok ay, wak pikyokiḡ ḡimbying ḡimbying amniyak. <sup>2</sup>Kun geyak, bi Peresiy gunap niḡiy anḡyak, “Nimb yenen lotiw ḡin woḡ magep biy, wiyt maḡiy wak pik yoksipim?”

<sup>3-4</sup>Anḡeyak, Jiysis binuk gok giyak kun ak timey ma giyak ak niḡiy, bi Peresiy kun gok kuyip anḡak, “Depiyt wosrey binuk gok yip yiwan gek, Gor anḡniḡep korip ak amjakiy, biret Gor windin yirik ar ak ay, bi yikop ma ḡimbay; bi Gor nup simboḡipay gok nep ḡimbay biret ak, Depiyt anḡniḡek, nup ḡey, binuk gok yip niḡyak. Kuyip yiwan gek giyak kesim

kun ak, Baybol buk tikyak ak, nimb ma niñbim? <sup>5</sup>Pen lotiw ñin apim ak, bi bap Ñinuk nep kond mindip angak.”

**Jiysis Bi Ñin Pipich Gak Ak Gek Suñ Ayak**

*(Mat 12:9-14; Mak 3:1-6)*

<sup>6-7</sup>Pen Jiwda lotiw ñin kisen bap, Jiysis Jiwda nan-gep korip ak amiy, kuyip minim angniyiñg mindek. Korip miñgan kun ak, bi ñin pipich gak bap ap mindek. Bi Peresiy gok sek, bi low tiysa gok sek bi kun ak nup niñyak rek, Jiysis lotiw ñin biy gek suñ ayningamb akan yergek, nup anñ gun angyi, niñyinjsek ay mindeyak. <sup>8</sup>Pen gos niñyak kun ak, Jiysis key niñy, bi ñin pipich gak anup angak, “Nand jakiy namb siñbiy owan angak.” <sup>9</sup>Angek, jakiy owakniñ, nuk bi Peresiy gok sek, bi low tiysa gok sek kuyip angak, “Yikop mindep ñin biy rek, biynimb gok kuyip direp giningambun akan; lotiw ñin angyi kuyip kirginingambun? Akan pen, kuyip gon ma jak amniñgiy; kirgon kumniñgiy?”

<sup>10</sup>Kun angyi, kuyip niñkuskus giy, bi ñin timey gak anup angak, “Ñin ak almil ayan!” Angek, almil ayakniñ, day suñ ayak. <sup>11</sup>Jiysis bi kun anup gek suñ ayek niñy, bi Peresiy gok sek, bi low tiysa gok sek kuyip miluk yimb yapek, Jiysis nup yerginjun angyi, angnin angnin gi mindeyak.

**Jiysis Binuk Onep Wimiñgan Ak Dak**

*(Mat 10:1-4; Mak 3:13-19)*

<sup>12</sup>Pen ñin namb kun siñak ñin bap, Jiysis Nop nup angniniñy angyi, dum akyon amiy, Nop nup angnin mindek mindek, miñmon yowak.

<sup>13</sup>Minek pumb wakniñ, biynimb nuk gok mañgiysek angek apeyak, binuk onep wimiñgan ak kuyip tungasik key ay, kuyip bi minim yip dand amemb gok mindeningambim angyi, angyak.

<sup>14-15</sup>Binuk angyak kun gok yimb kiyk mey;

Bap Saymon. Jiysis yimb nup bap ay, “Piyta” angak.

Bap Enjriw. Saymon numam nuk ak.

Bap Saymon yimb along, Saymon Selot angyak.

Bap Jemis.

Bap “Jemis Alpiyas” angyak.

Bap Jon.

Bap Piyliyp

Bap Batlomiyy.

Bap Matyiw

Bap Tomas.

<sup>16</sup>Bap Jiwdas. Nop yimb ak Jemis.

Bap “Jiwdas Yiskariyot” angyak. Nuk nep mey, kisen Jiysis nup ñanngyan angyi mimunñgak.

**Biynimb Kuḡaynep Jiysis Amnakniḡ Kisen Amniyak**  
(*Mat 4:23-25*)

<sup>17</sup>Pen Jiysis biynimb nuk kun gok yip, dum biyoḡ kirgiy, am giw tep biyaḡ mindyakniḡ, biynimb kuḡay yimb nep, nup niḡun aḡgiy ap nan-giyak. Biynimb kun gok gunap Jerusalem nimb, gunap Jiwdiya namb okok nimb, gunap miñmon nambiys Taya nimb, gunap miñmon nambiys Saydon nimb. <sup>18</sup>Pen biynimb wiyak kun gok, gunap Jiysis minim nup ak niḡniḡ wiyak; gunap tap gek, chinup gek suḡ ayaḡ aḡgiy wiyak. Pen biynimb kichekiy ambaḡ ayek mindrep ma giyak gok, chinup gek suḡ ayaḡ aḡgiy, kunep wiyak. <sup>19</sup>Kiyk kun giy apiy mey, Jiysis nup diniḡon, chinup suḡ ayaḡniḡamb aḡgiy, ap diniḡyakniḡ kuyip suḡ ayak.

**Biynimb Simb Gip Gok Kisen Miñmiñ Giniḡgambay**  
(*Mat 5:1-12*)

<sup>20</sup>Jiysis binuk gok kuyip niḡyiḡ aḡgak, “Nimb biynimb simbgeprek mindpim gok, Gor nimbip diy kond mindeniḡamb!

<sup>21</sup>“Nimb Gor biynimb tep nuk mindenjun aḡgiy, mindmaḡgiy piḡiyñimb gok, biynimb nuk yimb mindeniḡgambim!

“Nimbip miñiy yiwan yomb gip gok, kisen yiwan ma giniḡgamb!

“Nimbip simb gek siy aḡgmindpim gok, kisen tep gakniḡ, miñmiñ giyiḡ mindeniḡgambim!

<sup>22</sup>“Bi bap Ñinuk nup chiḡgiy mindem, nimbip yiruk niḡiy, ‘Biynimb timey kun guniy, an yip mindeniḡgambim aḡgiy,’ nimbip yimb timey ay aḡgjiweniḡgiy, miñmiñ yimb ginimimb. <sup>23</sup>Giniḡgambay kun ak nusind yes kiyk gok, bi Gor minim aḡgep gok kuyip, giyiḡgipay rek nep nimbip giniḡgambay. Kun ak niḡiy, Gor chinup direp yimb giniḡgamb miñmon nuk biyoḡ aḡgiy tep gakniḡ, ñin beḡ pikyiḡ, miñmiñ giyiḡ mindenimimb!

<sup>24</sup>“Pen nimb biynimb maniy tap okok kuḡay mindip gok, niḡrep yimb ginimimb! Tap nimbik dep rek ak man ar biy pisnep dipim. <sup>25</sup>Pen nimb miñiy tap rek ñimb gem gem koḡgiy tanimb ak, kisen yiwan yomb giniḡgamb ak niḡ-tep ginimimb! Pen miñiy sik minim aḡgyiḡ mindpim ak, kisen simb gek siy aḡgmindeneniḡgambim!

<sup>26</sup>“Pen nimbip yimb dand aranyiḡ nep mindeniḡgambay ak, niḡrep yimb ginimimb. Nusind yes kiyk gok, bi Gor minim yesek aḡgyiḡgipay gok kuyip, kun ak rek giyiḡgipay aḡgak.”

**Biynimb Ñaḡgep Nimb Gok Kuyip Wasemb Aynimimb**  
(*Mat 5:38-48*)

<sup>27</sup>“Pen biynimb minim yand aḡgen niḡsipim guniy. Biynimb nimb yip penpen gep gok kuyip wasemb aynimimb.

Biynimb nimbip miluk niṅbay gok kuyip direp ginimimb.

28 “Biynimb gunap, nimbip kunj timey geniṅgiy, kuyip pen wasemb aynimimb.

“Biynimb gunap, Gor nimbip timey ginimuṅ aṅgeniṅgiy, nup aṅgniṅem, kuyip kond mindonimuṅ.

29 “Pen biynimb gunap, nimbip mikem pis ak pikeniṅgiy, andikem, piskind ak kunep pikniṅgiy.

“Pen biynimb gunap, kolsiyor nimbip ak deniṅgiy; tiṅgliys ak kunep dim aṅgiy, monmon ñinimimb.

30 “Biynimb gunap, tap nen asimb aṅgeniṅgiy, niṅind apim aṅgiy ñinimimb.

“Pen tap nimbip bap niṅiy deniṅgiy, chinup jiwñan aṅgiy ma aṅgnimimb.

31 “Chinup giyaṅ aṅgiy niṅbim rek nep, biynimb gok kuyip ginimimb.

32 “Biynimb nimbip wasemb aypay gok nep wasemb ayniṅgambim ak, yergiy Gor nup tep giniṅgamb. Biynimb tap siy tap timey gipay gok, biynimb kiyk key gok penpen wasemb aypay.

33 “Pen biynimb nimbip direp gipay gok nep direp giniṅgambim ak, Gor nimbip yergiy niṅek tep giniṅgamb. Giniṅgambim kun ak, biynimb tap siy tap timey gipay gok, gipay rek nep giniṅgambim.

34 “Tap ñon pen ñiniṅgambay aṅgiy, gos anep niṅiy tap ñiniṅgambim ak; Gor nimbip yergiy niṅek tep giniṅgamb. Giniṅgambim kun ak, biynimb tap siy tap timey gipay gok, gipay rek nep giniṅgambim.

35 Kun ak biynimb nimb yip penpen ñaṅgep gok wasemb ay, direp giy, tap monmon ñinimimb. Chinup pen ñiniṅgambay aṅgiy, gos ak ma niṅnimimb. Nap yomb jel gip ak gip rek geniṅgambim mey; nimbip sakiy ma giniṅgamb. Nuk biynimb tap siy tap timey gipay gok sek, nup tep ma apay gok sek kuyip kond mindip.

36 “Nuk biynimb simb niṅiy dip rek, nimb kunep ginimimb.

### **Chin Biyomb Aṅgiy Biynimb Gok Kuyip Ma Aṅgjiwnimimb**

37 “Pen chin biynimb tep aṅgiy, biynimb gunap kuyip gos timey niṅniṅgambim ak, minim kun ak andkind nimbip ker winiṅgamb.

“Biynimb nimbip timey gipay gok niṅiy kirgeniṅgambim, Gor pen tap timey nimb gipim gok niṅiy kirginiṅgamb.

38 “Tap nimb gok mapin kamb ma giy, biynimb gok kuyip monmon ñeniṅgambim mey; Gor nimbip pen kunep ñiniṅgamb. Pen mapin kamb giy, sikoy sikoy nep ñeniṅgambim, Gor nimbip pen kunep giniṅgamb aṅgak.”

39 Pen Jiysis minim bap paydoṅ ay aṅgak, “Bi windin koy bap, bi windin koy bap nup kinjeṅ ak mindip kun aṅgiy, ma yomniṅgamb. Yenen, nuk kun gek, omiṅal giy kaw miṅgan ak apyap pikniṅgayr.

40 “Biynimb sikul apay gok, am sikul apay won ak, tiysa kiyk gok kuyip wiyniym ma gipay. Pen kisen sikul ak ang tep giy mey; tiysa kiyk gok yip andip andip mindeniḡambay.

41 “Yenen mon bopis windin nimbip pik yiw giy mindip ak niḡangiy mer, namam tap achip windin nup mindip anep niḡapim? 42 Mon bopis yomb nimbip pik yiw giy mindip ak diyokem, windin yimb ayek rek, yesek namam tap achip sikoy windin nup mindip ak ‘Diyokan angiy apim.’

**Mon Bind Tep Akan Timey Angiy Niḡningambay**  
(*Mat 7:17-20; 12:33-35*)

43 “Pen mon teprep bind ak maḡgiy timey ma piyp. Mon timey bind ak, maḡgiy tep ma piyp. 44 Kun ak mon gok piyek niḡiy, mon ak tep; mon ak timey angiy niḡbay. Mon niwñiw sek saḡgandlem rek gok, mon tep kondyap rek ma piyningamb. 45 Biynimb mindrep gipay gok, namb kuyip biyaḡ tep mindip rek, mind tep gipay. Biynimb mindrep ma gipay gok, namb kuyip biyaḡ mindrep ma gip rek, mind tep ma gipay. Pen biynimb yerip rek mindpay ak, minim kiyk aḡgey niḡiy; biynimb gok tep, biynimb gok timey angiy niḡningambun.

**Bi Korip Gep Omiḡal**  
(*Mat 7:24-27*)

46 “Yip Biyomb chin, Biyomb chin, apim ak pen; minim apiyn ak kisen ma gipim. 47 Biynimb minim yip ak niḡiy, apiyn rek gipay gok; 48 bi man kilis ar ak korip gek, niḡ wilik apiy ma dand amnak rek ak mindpay. 49 Pen minim yip niḡiy kisen ma gipay gok, bi man sayn ar ak korip gek, niḡ wilik apiy, pisnep tuḡḡispuk giy, dand amnak rek ak mindpay aḡgak.”

**Jiysis Bi Wong Giḡemb Bap Gek Suḡ Ayak**  
(*Mat 8:5-13*)

**7** <sup>1</sup> Jiysis biynimb kun gok kuyip minim aḡḡindiy, Kapaniyam amnak. <sup>2-3</sup> Pen miḡmon tiḡgoḡ kun okok, biyomb amiybi kuḡaynep kond mindyḡip bap mindek. Nuk minim bap niḡak: Jiysis ap Kapaniyam mindek. Kun ak niḡiy, Jiwdiya miḡmon nop nimb biyomb gunap aḡgyokiy aḡgak, “Bi tep wong yip giḡemb ak, tap giy kumniḡ gisap nen, nimb am Jiysis nup poḡind apem, gek suḡ ayaḡ aḡgak.”

<sup>4-5</sup> Aḡgek, Jiysis mindek ak apiy, kilis giy aḡgyak, “Amiybi kond mindep ak, bi tep yimb. Chinup Jiwdiya biynimb gok per kond mind tep giy, nan-gep korip chinup bap gak. Kun ak nand bi wong giḡemb nup ak am gey, suḡ aynimuḡ aḡgyak.”

<sup>6</sup> Aḡgey, Jiysis bi kun gok yip am am korip siḡak maḡ maḡ giyakniḡ, amiybi kond mindep kun ak, minim bap pen, buḡgiy nuk gunap kuyip

an̄gyokek, am Jiysis nup namb pikiy an̄gyak, “Biyomb ak nip an̄gip, ‘Biyomb! Yand bi tep mer, korip yip ak tomb yiwur ma winimuŋ. <sup>7</sup>Yand bi tep rek nip ker ninim. Pen yand niŋbiyn; Gor nip bak ay mindip ak, suŋ ayaŋ an̄giy minim anep an̄genimin, bi yip tap gip biy suŋ aynimuŋ. <sup>8</sup>Kond mindep yomb yimb yand ak yip kond mindek; yand pen, amiybi gok kuyip kond mindiy, “Amnim!” an̄gen ambay; “Wim!” an̄gen opay; wonŋ ak kun kun giy gim an̄gen gipay an̄gip’ an̄gyak.”

<sup>9</sup>Kun an̄geyak Jiysis, bi kun ak gos nuk key niŋiy an̄gip an̄giy, wal an̄gyiŋ, biynimb nup kisen giy apeyak gok kuyip an̄gak, “Amiybi Rom nimb ak, yip gosimb niŋmindiy, chingrep yimb gip. Yisrel biynimb gunap, yip gos niŋrep giy gip kun ak rek gey, ma niŋbiyn an̄gak.”

<sup>10</sup>Pen amiybi kond mindep ak, binuk gok andkind amiy niŋyak; Jiysis par okok nep mindiy an̄gek, bi tap gak kun ak pisnep suŋ ayak.

### **Jiysis Biyn Yandiw Ak Ñinuk Nup Gek Tip Ak Tikjakak**

<sup>11</sup>Ñin namb kun siŋak nep, Jiysis dawin sikoy Nayn amniyn an̄giy amnakniŋ, binuk gok sek, biynimb yikop gok sek kuŋaynep, nup kisen giy amniyak. <sup>12</sup>Am am miñmon kun ak, kinjeŋ day ak amjakyakniŋ, biyn yandiw bap ñi nokom tikak ak kumek, biynimb kuŋaynep yirar ay dand apeyak. <sup>13</sup>Jiysis biyn yandiw kun anup niŋek, simb gek an̄gak, “Siy ma an̄gan!” <sup>14</sup>Kun an̄giy, chip yirar ay dand apeyak ak am diniŋakniŋ, lum siŋak dayak. Day niŋmindyakniŋ, Jiysis bi paranj kun anup an̄gak, “Ñi tikjakan!” <sup>15</sup>An̄gek, tikjak bisgiy minim an̄gakniŋ, nonim nup, “Ñinak ak biy an̄gak.”

<sup>16</sup>Pen biynimb niŋmindeyak gok gos kuŋay niŋiy, Gor nup yimb ak dand aranyiŋ an̄gyak, “Gor bi minim nup an̄gep yomb bap yokamb, chinup ker wip. Gor chinup ay mindniŋ wip an̄gyak.” <sup>17</sup>Pen Jiysis gak kun ak niŋiy, kesim dey, miñmon Jiwdiya amiy, miñmon yikop okok amiy gak.

### **Jon Bi Ñiŋg Pikñemb Binuk Omiŋal Jiysis Nup Niŋniŋ Amnirik (Mat 11:2-6)**

<sup>18</sup>Jon binuk gok, Jiysis gak rek maŋgiysek niŋiy, am Jon nup an̄gñeyak, Jon binuk omiŋal an̄gek aperik an̄gak, <sup>19</sup>“Nirmiŋay am nup an̄gñiŋiy an̄gnimiyr, ‘Nand Kiyŋ yomb key yimb kond mindpun anep opan akaŋ, bi kun ak key kond mindenjun an̄gnimiyr’ an̄gak.”

<sup>20</sup>An̄gek, Jiysis mindek ak amiy an̄grik, “Jon bi ñiŋg pikñemb ak nip an̄gip, ‘Nand Kiyŋ yomb key yimb kond mindpun ak nep opan akaŋ, bi kun ak key kond mindonjun an̄giy,’ chirup an̄gyokek, nip an̄gñiŋniŋ aswur an̄grik.”

<sup>21</sup>Pen kiykmiŋay kun an̄giy niŋmindrikniŋ, Jiysis biynimb miñak ar keykey gak gok gek suŋ ayak. Biynimb tap gak gok, gek suŋ ay, windin koy gak gok, gek

windin yimb ay, biynimb kichekiy malñiluk ambañ ay mindek gok, gek biynimb yimb ay gak. <sup>22</sup>Kun giy, Jiysis bi omiñal kun ak kuyip aᅅgak, “Nirmiñay andkind amiy, Jon nup aᅅgnimiyr, ‘Chir amiy niñbur: bi kun ak biynimb windin koy gip gok, gek windin yimb ay; biynimb ñin tomb soy ayndik ayip gok, gek suñ ay; biynimb timund sakiy ayip gok, gek suñ ay; biynimb kumbay gok, gek tip ak tikjakiy; biynimb simbgeprek gok, minim tep nuk ak aᅅgek niñbay aᅅgnimiyr’ aᅅgak. <sup>23</sup>Pen minim bap aᅅgnimiyr, ‘Biynimb yip gosimb niñji, chingiy nep mindeniᅅgambay gok, miñmiñ yimb giniᅅgambay aᅅgnimiyr’ aᅅgak.”

<sup>24</sup>Kun aᅅgek, bi Jon nup minim dand orik omiñal ak andkind amnirikniñ, Jiysis biynimb ap mindeyak gok kuyip, Jon nup minim ar ak aᅅgiy aᅅgak, “Nimb nind miñmon nep namb okok ambik ñin ak, yerginiᅅ ambik? Sund par nokom bap yinᅅen diy, dand amiy apiy gek ak niñniᅅ ambik? <sup>25</sup>Akañ yenen ambik? Bi chech tep ayak bap niñniᅅ ambik? Bi chech tep yimb diy, tap tep tep dun aᅅgiy niñbay gok, mindpay biyomb korip okok nep. <sup>26</sup>Pen tap yerip ak niñniᅅ ambik? Yikop ma ambik! Bi Gor minim aᅅgep, Jon nup nep niñniᅅ ambik. Nuk bi Gor minim aᅅgep yikop bap mer; woᅅp bap key mindek, Gor nup aᅅgek ap minim aᅅgñak. <sup>27</sup>Bi Gor minim aᅅgep kun anup mey, wosrey Baybol buk ak tikiy aᅅgyak, ‘Gor aᅅgip, “Bi minim aᅅgep yand ak aᅅᅅen, nind amiy, biynimb gok aᅅgᅅep gek, kisen Ni yand ak aᅅᅅen niñniᅅgamb aᅅgip” aᅅgiy’ tikiyak. <sup>28</sup>Nimbip aspiyn, Jon biynimb nind mindyiniᅅgipay gok yip, miñiy mindpay gok yip maᅅgiyseᅅ wiyniy gip ak pen, Gor biynimb yikop diy kond mindeniᅅgamb gok, Jon rek ma mindeniᅅgambay; kiyk biynimb yomb mindeniᅅgambay aᅅgak.”

<sup>29</sup>Jiysis minim aᅅgak kun ak; biynimb yikop gok sek, bi takes dep gok sek nind aᅅey, Jon kuyip ñiᅅ pikñek, Gor nup yimb ak dand araneyak mey kun aᅅgak. <sup>30</sup>Pen bi Peresiᅅ gok sek, bi Jiwda low tiysa gok sek alemb alemb ñiy, Gor minim tep ak ma diyak rek, chinup ñiᅅ ma pikñiniᅅgamb aᅅᅅey mey, kuyip ñiᅅ ma pikñak.

<sup>31-32</sup>Jiysis kun aᅅgiy, kuyip aᅅgak, “Nimb biynimb miñiy, ñin namb biy mindpim gok, ñapan sikoy gok silpiñ ñiyiᅅ, gunap apay, ‘Dachiᅅ pikon, yenen koᅅgim ma papim? Pen kamep simbgeprek aᅅᅅon, yenen siy ma apim apay’ rek ak gipim. Nimb niᅅem, Jon gak ak tep ma giy, yand gipiyn ak tep ma giy gip. <sup>33</sup>Jon bi ñiᅅ pikñemb ak, ap tap ma ñimbiiy, ñiᅅ wayn ma ñimbiiy gek, nup aᅅᅅjiwiᅅ aᅅᅅyiniᅅgipim, ‘Bi kichekiy malñiluk ambañ ayek mindip ak aᅅᅅyiniᅅgipim!’ <sup>34</sup>Pen miñiy bi bap Ñinuk apiy, tap ñimbiiy, ñiᅅ wayn ñimbiiy gek, nup aᅅᅅjiwiᅅ apim, “Tap kuᅅay ñimbiiy, ñiᅅ wayn ñimbiiy gip ak mey; nuk biynimb tap siy tap timey gipay gok sek, bi takes dep gok sek bi kiyk apim.” <sup>35</sup>Pen, biynimb Gor miñ ar ak, chinup tep gip aᅅgiy niñbay gok nep, ar kun ak ambay aᅅgak.”

### Kinjeᅅram Biyn

<sup>36</sup>Bi Peresiᅅ bap, yimb nuk Saymon. Nuk Jiysis nup aᅅgak, “Aᅅey korip yand ak am tap ñiñjur aᅅgak.” Aᅅgek, Jiysis korip nup ak amiy tap



ñinrikniņ, <sup>37</sup>kinjenram biyn miñmon kun ak nimb ak, minim bap niņak; Jiysis ap bi Peresiy ak yip tap ñimberik. Kun ak niņiy, wel kuy tep wak, kamb botol diy paryak ak dand apiy, <sup>38</sup>Jiysis mindek kund okok ken amiy, tomb anġin ak bisġiy, siy anġ mindek. Kun ġiy, siy anġ mindakniņ, siy ñiņġ ak tik Jiysis tomb ar ak yapek, jun kas nuk ak wiykyokyinġ, tomb kind nup ak wel ayñiy, bom silokyiņġ silokyiņġ mindek.

<sup>39</sup>Kun ġek, bi Peresiy ak gos nuk anep niņiy anġak, “Bi kun biy, bi Gor minim anġep yipund ġiy mindembikop rek, biyn kinjenram ker ap nup diniņsap ak, tik niņbikop anġak.” <sup>40</sup>Jiysis bi Peresiy gos niņak kun ak niņiy, nup anġak, “Saymon! Minim nip nokom bap anġniņġ ġispiyn anġak.”

Anġek, Saymon anġak, “Tiysa. Minim kun ak anġan anġak.”

<sup>41</sup>Anġek, Jiysis tikdam ay anġak, “Bi bap tikġakiy, bi omiņal kuyip, bap nup payp handret kiyna ñiy, bap nup piyptiy kiyna ñiy, ġiniņġamb. <sup>42</sup>Pen kisen bi omiņal kun ak, pen ñemb rek ma ayek, bi maniy ñiniņġamb kun ak, kuyipmiņay anġniņġamb, ‘Maniy nirip ñimbiyn ak, pen ñinjur anġiy gos ak ma niņnimiyr anġniņġamb.’ Kun anġek, bi an bi kun ak nup miñmiñ yimb ġiniņġamb? Bi tap day yomb mindeniņġamb ak akan, bi tap day sikoy mindeniņġamb ak?”

<sup>43</sup>Anġek, Saymon anġak, “Gos yand niņbiyn ak, bi tap day yomb mindeniņġamb ak anġak.” Anġek, Jiysis anġak, “Niņind yimb apan anġak.”

<sup>44</sup>Kun anġiy, Jiysis andikiy biyn anup niņyiņġ, Saymon nup anġak, “Biyn biy nup niņan! Yand korip miņan nip biy apen, ñiņġ ak diy tomb yip ak ma wasyim ġipan; biyn biy yip miñmiñ ġiyiņġ, siy ñiņġ nuk ak tik yapek wasyim ġiy, jun kas nuk ak wiykek milip ġip. <sup>45</sup>Yip ma bom silokpan; biyn biy nep apiy tomb kind yip ak bom silokip. <sup>46</sup>Yip wel ak ma ayñimban; biyn biy nep tomb kind yip ak, wel kuyrep wip ak ayñimb. <sup>47</sup>Kun ak nip aspiyn: biyn kun biy tap siy tap timey kuņaynep ġip ak niņiy kirgen, yip pen direp yimb ġip. Pen biynimb tap siy tap timey siskoy ġipay gok niņiy kirgen; yip pen direp ma ġipay anġak.”

<sup>48</sup>Kun anġiy, biyn kun ak nup anġak, “Tap siy tap timey ġipan ak, niņiy kirpiyn anġak.”

<sup>49</sup>Kun anġek, bi nund yip tap ñimbeyak gok, kiyk key anġniņ anġniņ ġiy anġyak, “Bi kun biy yenen, ‘Tap siy tap timey ġipim ak niņiy kirsipiyn asap?’ Gor nep mey kun ġipkop anġyak.”

<sup>50</sup>Kun anġyak ak pen, Jiysis biyn kun anup anġak, “Gos nand anep, tap siy tap timey ġipiyn rek, Jiysis niņiy kirġan anġiy opan ak, nip niņiy kirsipiyn nen, andkind amiy, Gor ñin ar ak mindenimin anġak.”

### Biyn Gunap Jiysis Yip Amniyak

**8** <sup>1</sup>Pen kisen ñin namb kun siņak, Jiysis binuk onep wimiņġan ak yip, miñmon yomb miñmon sikoy okok amiy, Gor biynimb nuk diy kond mindeniņġamb minim tep ak, biynimb okok kuyip anġñak.

<sup>2</sup>Pen ñin kun ak, biyn tap gek, Jiysis gek suñ ayak gunap, kichekiy malñiluk sek mindey, nuk gek biyn yimb ayak gunap, yip tangyĩngipay. Biyn kun gok yimb kiyk mey, bap “Makdala biyn Mariya” aŋgyĩngipay. Nup kichekiy onep ar ak mindek Jiysis aŋgyokak. <sup>3</sup>Biyn bap Jowana. Nuŋgumiy yimb ak Chiwsa. Nuk biyomb Herot korip tap nup gok kond mindyĩngip. Biyn bap Siwsana. Kiyk biyn yikop gunap yip, maniy kiyk gok key dam tap taw dand apiy, Jiysis binuk gok yip, tap jimñiy ñimbyĩng giranŋyĩngipay.

**Wiyt Maŋgiy Yimbay Aŋgiy Paydoŋ Ay Aŋgak**  
(*Mat 13:1-9; Mak 4:1-9*)

<sup>4</sup>Biynimb miñmon keykey, tiwin gok tiwin gok, Jiysis nup niŋniŋ kisen wiyakniŋ, biynimb nind wiyak gok kuyip, minim bap paydoŋ ay aŋgak, <sup>5</sup>“Bi bap wiyt jakaŋ aŋgiy, wiyt maŋgiy ak dam woŋday okok yokeniŋgamb, gunap kinjeŋ kosemb ar ak yapek, biynimb gok taw amiy apiy gey, yakir gok pen ap niŋiy ñiŋniŋgambay. <sup>6</sup>Gunap kamb ar man siskoy ayniŋgamb okok yapiy, gup giniŋgamb ak pen, kindiy am wos ma giniŋgamb rek, pisnep milip giniŋgamb. <sup>7</sup>Pen gunap, kikasik dindbiliŋ namb okok yapeniŋgamb, tap kun ak saw giy, yiwiŋ dek, ma jakniŋgamb. <sup>8</sup>Pen gunap, lum teprep okok yapiy, jakrep yimb giy, maŋgiy kuŋay yimb nep piyiniŋgamb aŋgak.”

Jiysis kun aŋgiy aŋgak, “Nimb biynimb gos timund sek mindenimimb gok, minim aspiyn biy niŋnimimb aŋgak.”

**Paydoŋ Ayak Minim Ak Misenŋ Aŋgak**  
(*Mat 13:10-17; Mak 4:10-12*)

<sup>9</sup>Kun aŋgek, binuk gok nup aŋniŋiy aŋyak, “Minim paydoŋ ay aŋgamban kun ak, minim junj nuk yergiy mindip?” <sup>10</sup>Aŋgey, Jiysis kuyip aŋgak, “Gor biynimb nuk diy kond mindeniŋgamb minim weygiy mindyĩngip ak, nimbip gos ñek niŋniŋgambim; pen biynimb yikop gok: ‘Aŋgip kun aŋgiy ma piyow niŋniŋgambay.’

<sup>11</sup>“Pen minim paydoŋ ay tap yiŋ rek apiyn ak, Gor minim ar ak apiyn. <sup>12</sup>Maŋgiy gunap, yowniŋgamb kinjeŋ kosemb ar apiyn ak; biynimb gok Gor minim ak niŋniŋ gey, Seytan gek sakiy giniŋgambay aŋgiy apiyn. <sup>13</sup>Pen maŋgiy gunap, yowniŋgamb kamb ar man siskoy ayak okok apiyn ak, Gor minim ak niŋey tep gakniŋ, nup gos niŋniŋgambay ak pen, gos kilis yimb giy ma niŋniŋgambay rek, miker gunap apek nup kirginiŋgambay aŋgiy apiyn. <sup>14</sup>Pen maŋgiy gunap, yowniŋgamb kikasik dindbiliŋ namb okok apiyn ak; biynimb gok Gor minim niŋniŋgambay ak pen, kisen minim miker akaŋ; miñmiñ gep ar ak nep gos niŋiy, Gor nup gos kilis giy ma niŋniŋgambay aŋgiy apiyn. <sup>15</sup>Pen yiŋ maŋgiy gunap, man tep yimb siŋak yapiy, jak tep giy, maŋgiy kuŋay yimb nep

piyningamb apiyn ak; biynimb gok minim tep ak niñiy, di wos yimb giy, mindrep yimb giningambay gok kuyip apiyn.”

**Melik Ak Ma Weyginimimb**  
(Mak 4:21-25)

16 “Pen biynimb gok lam dañgiy, tiyn miñgan okok akañ, bonç ar kinbay beñ okok ma aypay. Melik gek biynimb niñyañ añgiy, ar siñbiyoñ ayey mey, biynimb gok korip miñgan apyিং, melik kun ak niñningambay. 17 Minim weygiy rek mindyিংgip ak; niñnimimb rek nep mindeningamb. 18 Kun ak minim apiyn gok niñrep yimb ginimimb. Biynimb minim niñiy, niñdiningambay gok, minim tep gunap sek niñningambay; pen biynimb minim niñiy ma niñdiningambay gok, sikoy niñjun añgiy niñbay ak sek, pisnep kurginingamb.”

**Jiysis Nup Niñning Wiyak**  
(Mat 12:46-50; Mak 3:31-35)

19 Pen ñin kun ak, Jiysis numam gunap nonim yip, nup niñning wiyak. Apiy niñyak: korip miñgan kun ak timbik giy añgiy mindek niñiy, mis ar akyañ mindeyak. 20 Kun gek, biynimb ap mindeyak gok niñiy, Jiysis nup añgyak, “Nanim namam nak gok, nip niñning ap mindpay mis biyañ añgyak.”

21 Añgey, Jiysis kuyip añgak, “Biynimb siñok Bapiy Gor nup minim ak niñiy, kindik gipay gok mey; amiy yand, mam yand rek ayip añgak.”

**Jiysis Añgek Pinim Yomb Dek Ak Kirgak**  
(Mat 8:23-27; Mak 4:35-41)

22 Pen ñin bap Jiysis binuk gok yip, “Galiyliy chemb tikiy pis bindoñ amnun añgiy,” bot ak diy sañdiyak. 23 Namb okok amyিং, Jiysis nuk wisin kin amnak won ak, pinim yomb yimb ak ñiñ namb kun ak diy, ñiñ pañg bot miñgan ak amek, kumningiy rek nep ayak. 24 Kun gek, binuk gok ap, Jiysis nup kikawin gey tikjakek añgyak, “Biyomb! Chin mañgiysek kumning gispun añgyak.”

Añgey, Jiysis añgek pinim yomb dek kun ak won anep kirgiy, ñiñ pañg apek ak kirgiy, nind mindek rek mindek. 25 Pen binuk gok kuyip añgak, “Gor nup gosimb niñbim rek ayip ak, yenen nup añgniñem tap gamb kun ak ma kirgip?”

Añgek, kiyk pirikiy, añgniñ añgniñ giy, “Bi kun biy an? Pinim yomb dip ak sek, ñiñg yomb pañgip ak sek minim añgip rek nep gip añgyak.”

**Bi Kichekiy Malñiluk Sek Ak Suñ Ayak**  
(Mat 8:28-34; Mak 5:1-20)

26 Pen bot kun ak diy, Galiyliy chemb namb ak am am, Gerasa biynimb mindeyak pis okdoñ ken amniyak.

<sup>27</sup>Pen miñmon kun ak, bi kichekiy malñiluk kuñay yimb ambañ ayak bap mindek. Bi kun ak nuk daynep mindiy, korip yimb miñgan ak ma kinyiñgip; chip komyiñgipay kamb miñgan okok nep kin tanjyñgip. <sup>28-29</sup>Bi nup kond mindep gok, sen diy, ñin tomb nup gok tiwning wos giyiñgipay ak pen, kichekiy tap gok ap kilis gey, sen ayiñgipay kun gok gek pungrikek, miñmon nep namb okok pernep amyñgip.

Pen bi kun ak, Jiysis nup niñiy wal añgiy, ap tomb añgin siñak koñgim yimek, Jiysis tap nup ambañ ayak kun gok kuyip añgak, “Bi kun biy nup kirgiy mis amnim añgak.”

Kun añgakniñ, bi kun ak nup tap ambañ ayak kun gok, nembnemb gey, minim yomb añgiy añgak, “Nand Gor Biyomb jel gip Ñinuk ak, yip tap giniñg gispan ak ma ginimin añgak.”

<sup>30</sup>Añgek, Jiysis añgak, “Yimb nand ak añgan.” Añgek añgak, “Yimb yand ak ‘Ñin jiwiy’ añgak.” Kichekiy malñiluk gok kuñay yimb molik sikiy mindeyak rek mey, kun añgak.

<sup>31</sup>Pen kichekiy gok, Jiysis nup minim yomb añgiy añgyak, “Chinup añg mon key yinjap kaw miñgan yomb ak ma yoknemin añgyak.” <sup>32</sup>Kun añgiy niñyak; kanj kuñay yimb nep amil geyak yep pir kun siñak. Jiysis nup añgyak, “Chinup añgey, am kanj mindpay gindoñ kuyip molik sikun añgey, <sup>33</sup>Jiysis “Yaw” añgek, bi anup kirgiy, am kanj kun gok kuyip molik sikey, kanj gok pungjw minduñ biyañ amiy, gindam ñiñg mañgiy chemb namb biyañ pikiy, ñiñg ñimbis mañgiysek kumdiyak.

<sup>34</sup>Pen bi kanj mokep gok, Jiysis gak kun ak niñiy, pungrikind añgiy am biynimb miñmon yomb mindeyak gok kuyip añgñiy, am biynimb miñmon yikop okok mindeyak gok kuyip añgñiy giyak.

<sup>35</sup>Kun giy añgñeyak, “Tap kun ak yergek niñiy aspay añgiy,” apiy niñyak: bi kichekiy molik sikiy mindyiñgip ak, biyimb ay, walinj yimiy, Jiysis tomb añgin siñak bisñg mindek niñiy, pirikyak.

<sup>36</sup>Pen biynimb niñmindey Jiysis kichekiy añg mis yokak gok, biynimb kisen wiyak gok kuyip, kun kun gip añgiy añgñiyak.

<sup>37</sup>Pen Gerasa biynimb mañgiysek kuyip jel gek, pirikiy, Jiysis nup añgyak, “Nand andkind amnoñ añgey,” bot diy amniñg gakniñ, <sup>38</sup>bi kichekiy ambañ ay mindek, Jiysis gek biyimb ayak ak, Jiysis nup añgak, “Yand nand yip amjipur añgak.” <sup>39</sup>Kun añgek, Jiysis nup añgak, “Mer. Gor nip yerer gip ak, am biynimb nand gok kuyip añgñinimin añgak.” Añgek, nuk andkind amiy, biynimb gok kuyip, Jiysis yip kun kun gip añgiy añgñak.

**Pañ Kumak Ak Sek; Biyn Jiysis Nup Diniñek Suñ Ayak Ak Sek**  
(*Mat 9:18-26; Mak 5:22-43*)

<sup>40</sup>Pen biynimb Jiysis asaw añgiy kond mindeyak gok, nuk bot diy amjakek niñiy, “Tep aswan añgyak.”

41-42 Pen biyomb Jiwda nan-gep korip kond mindyngip bap, yimb nuk Jayras. Pañ nuk nokom yimb simiy yin ayak wimiŋgan ak kumning gek, Jiysis mindek siŋak ap koŋgim yimiy aŋgak, “Apey, korip yand amnur aŋgak.” Aŋgek, Jiysis niŋniŋ amnakniŋ, biynimb kuŋay yimb nep, ap nup pis pis chichmiy yimiyŋg amniyak.

43-44 Pen biyn bap, biyn kinjeŋ pandikakniŋ mindek, simiy yin wimiŋgan ayak bap, Jiysis amek kund okok ken apiy, chech paryomb ayak ak diniŋakniŋ, suŋ ayak. Biyn kun ak, dokta gok yip gey suŋ ayaŋ aŋgiy, kuyip maniy ŋiyiŋgip ak pen, nup gey suŋ aynimuŋ rek ma ayak.

45 Pen Jiysis kuyip aŋgak, “Yip an diniŋimb?” Aŋgek, biynimb gok aŋgyak, “Chin ma niŋbun aŋgyak.” Aŋgey, Piyta aŋgak, “Biyomb. Biynimb kuŋaynep akniy, ap nip chichmiy yimey niŋiy aspan rek ayip aŋgak.”

46 Aŋgek, Jiysis aŋgak, “Biynimb nokom bap yip diniŋek, suŋ ayip ak niŋiy aspiyn aŋgak.”

47 Pen biyn Jiysis nup diniŋak kun ak, weyginimuŋ rek ma ayek niŋiy, jep diyŋg, Jiysis mindek maŋ siŋak ap koŋgim yimiy, biynimb gok niŋmindyakniŋ aŋgak, “Yip biyn kinjeŋ minek minek pandikip ak, nip diniŋen pisnep suŋ ayip aŋgak.”

48 Aŋgek, Jiysis aŋgak, “Pañ yand. Yip gosimb niŋiy, nup diniŋen yip suŋ ayniŋgamb aŋgiy, diniŋey nip suŋ ayip ak, minim ma mindip. Amnoŋ aŋgak.”

49 Jiysis kun aŋgakniŋ, bi Jayras nup woŋg giŋiyiŋgip ak apiy, Jayras nup aŋgak, “Panak pisnep kumimb; tiysa nup aŋgey tomb yiwur ma winimuŋ. Aŋgey, andkind amnaŋ aŋgak.”

50 Aŋgek, Jiysis minim kun ak niŋiy, Jayras nup aŋgak, “Pañ yand ak kumimb aŋgiy gos ak ma niŋnimin. Yip gosimb niŋeniŋgamban, gen tikjakniŋgamb aŋgak.”

51 Kun aŋgiy korip ak amjakiy, biynimb gok kuyip maŋgiyseŋ aŋg mis akyaŋ ay; pañ nop nonim omiŋal ak, Piyta ak, Jon ak, Jemis ak kuyip poŋind pañ kun ak niŋniŋ, korip miŋgan biyaŋ amniyak. 52 Pen pañ ak kumimb aŋgiy, biynimb siy aŋg mindeyak gok, Jiysis kuyip aŋgak, “Siy ak ma aŋgim. Ŋapan kun biy ma kumimb; yikop wisin kinjap aŋgak.”

53 Kun aŋgek, nup sik aŋgiy aŋgyak, “Ŋapan pisnep kumimb ak, yenen kun asap aŋgyak.”

54 Pen Jiysis pañ kumak kun anup, ŋin kind ak diy aŋgak, “Tikjakan!”

55 Kun aŋgakniŋ, kawnan nuk ak tip ap tokow gek tikjakak. Jiysis nop nonim kuyip aŋgak, “Tap gunap ŋer ŋiŋaŋ.” 56 Kun aŋgiy, kuyip ber aŋgak, “Biynimb gunap kuyip, minim kun ak ma yimb aŋŋiniŋimiy aŋgak.”

### Jiysis Binuk Gok Kuyip Aŋg Wikan Keykey Yokak

(Mat 10:5-15; Mak 6:7-13)

9 1-2 Jiysis binuk onep wimiŋgan ak kuyip aŋgek apeyak, aŋgak, “Nimbip kond mindeniŋgayn ak mey, okok amiy, kichekiy malŋiluk

biynimb molik sikek mindpay gok anjem mis amiy, biynimb tap gip gok gem suj ay, Gor biynimb diy kond mindeningamb minim ak angñiy, ginimimb.

<sup>3</sup>“Pen amning; yir kondim, maniy, wand, chech, tap ñijemb tap gok sek dand ma amnimimb. Yikop amnimimb. <sup>4</sup>Korip bap amjakem, nimbip angdeningiy, kiy yip kin tep giy, amning ginimimb ñin ak nep amnimimb.

<sup>5</sup>“Pen miñmon wikan gunap amem, nimbip ma angdeningiy, miñmon kun ak kiring amning, kuyip angnimimb, ‘Minim tep ak dand apambun ma dipim rek, miñmon nimbip biy apon, silkul day day tomb chinup dip ak wiykyokiy amjipun angiy,’ wiykyokiy amnimimb angak.”

<sup>6</sup>Kun angakniñ, kiyk miñmon sikoy okok amiy, minim tep nup ak angñiyiñg, biynimb tap gak gok, gey suj ayak.

**Herot Gos Kuñay Niñak**  
(*Mat 13:1-2; Mak 6:14-16*)

<sup>7</sup>Pen biynimb gok, Jiysis yerer gak minim ak ang amiy apiy giyakniñ, gapman biyomb Herot niñiy, gos kuñay yimb niñak. Biynimb gunap angyak, “Jon bi ñiñg pikñemb kuñam tikey kumimb ak, tip tikjakip angyak.” <sup>8</sup>Gunap, “Bi Gor minim angep nindnimb Yilayja, tikjakip angyak.” Gunap, “Bi Gor minim angep wosrey bap tikjakip angyak.” <sup>9</sup>Kun angey, biyomb Herot angak, Jon nup kuñam tiken kumimb ak, bi kun ak an ap mindakniñ aspay ak, yand am niñnim angiy gos niñak.

**Jiysis Biynimb Payp Tawsin Ak Tap Ñek Ñiñyak**  
(*Mat 14:13-21; Mak 6:30-44; Jon 6:1-12*)

<sup>10</sup>Pen Jiysis binuk onep wimiñgan ak andkind apiy, miñmon okok tangiy, yerip yerip giyak minim ak nup angñiyakniñ, am miñmon wikan bap key mindon angiy, kuyip poñind miñmon Betsayda amning, san diyak. <sup>11</sup>Kinjeñnamb okok amniyakniñ, minim bap angyak, “Jiysis binuk gok yip apiy pandiksipay angyak.” Kun angey, biynimb tiwin gok tiwin gok, nup niñning wiyak. Apeyak, tep opim angiy, Gor biynimb diy kond mindeningamb minim ak kuyip angñiyiñg, biynimb tap gak gok, gek suj ayak.

<sup>12</sup>Pen dungep pumb pañind amnak won ak, binuk onep wimiñgan ak apiy, nup angyak, “Miñmon akniy, biynimb ma mindpay namb okok mindpun ak; biynimb guniy angyokey, biynimb mindpay okok amiy, keñmangiy kiyk gok key piyow niñyñg, kiningiy miñgan ak piyow niñyñg giyan angyak.”

<sup>13</sup>Kun angeyak, Jiysis angak, “Nimb key kuyip keñmangiy ñinimimb angak.” Angek angyak, “Chin tap ñijemb kuñay ma mindip. Yikop biret onep mamind ak mindiy, piys omiñal mindiy gip. Nand yerip gos niñban?”

Biynimb biy kuṅay yimb mindpay ak, chin am tap ñiṅemb kuyip gunap taw dand winjun? aṅgyak.”<sup>14</sup> Nin kun ak, biynimb ap nan-giyak gok, biyn gok sek, ñapan ṅaṅ gok sek mer, bi gok nep mey payp tawsin amnak.

Pen Jiysis binuk gok kuyip aṅgak, “Biynimb kuṅay ap mindpay biy aṅgem, tiwin keykey bisgiyaṅ aṅgak.”

<sup>15</sup> Aṅgek, aṅgak rek gey, <sup>16</sup> nuk biret onep mamind ak sek, piys omiṅal ak sek diy, kuyongiṅ niṅiy, Gor nup “Tep” aṅgiy, tipaṅg binuk gok kuyip ñek, kiy pen diyiṅ, biynimb gok kuyip bilok ñiyak. <sup>17</sup> Neyak, ñimb dand amiy, ñimb diniṅgiy rek ma ayek, day day kirgiyak gok, binuk gok wand onep wimiṅgan ak yiṅgey arachakak.

### **Piyta Aṅgak Nand Bi Kiyṅ Yomb Key Yimb Ak Aṅgak**

*(Mat 16:13-19; Mak 8:27-29)*

<sup>18</sup> Pen ñin bap Jiysis am keynep mindiy, Gor nup aṅgniṅ mindakniṅ, binuk gok amjakey, kuyip aṅgniṅiy aṅgak, “Biynimb yikop gok yip an aṅgiy niṅbay?”

<sup>19</sup> Aṅgek aṅgyak, “Biynimb gunap, nip Jon bi ñiṅ pikñemb ak aṅgiy niṅbay. Gunap, bi Gor minim aṅgep nindnimb Yilayja aṅgiy niṅbay. Gunap, bi Gor minim aṅgep nindnimb bap, tikjakip aṅgiy niṅbay aṅgyak.”

<sup>20</sup> Aṅgeyak, kuyip aṅgak, “Nimb key yip bi an aṅgiy niṅbim?”

Aṅgek, Piyta aṅgak, “Nand Bi kiyṅ yomb key yimb, Gor chinup wosrey yokniṅgayn aṅgak ak nep opan aṅgak.”

<sup>21</sup> Kun aṅgek, Jiysis kuyip aṅgak, “Minim kun ak, biynimb gunap kuyip ma aṅṅinimimb aṅgak.”

### **Kumiy Tip Ak Tikjakniṅgayn Aṅgak**

<sup>22</sup> Kun aṅgiy, minim bap pen aṅgak, “Bi bap Ñinuk nup yiwur yomb yimb ak ñiniṅgambay. Bi minim tuṅgasikep yomb gok, bi low tiysa yomb gok, bi Peresiy yomb gok nup ma diy, miluk niṅiy ñaṅgayniṅgambay ak pen; ñin omiṅal nokom mindiy, tip ak tikjakniṅgamb aṅgak.”

<sup>23</sup> Pen nuk binuk gok sek, biynimb mindeyak gok sek kuyip aṅgak, “Biynimb an yip ker mindniṅ ginimuṅ ak, tap man ar biy gos yomb niṅbay ak kirgiy, pumbnamb kisyimken, gos yand niṅiy apiyn ar ak nep giy; miker diy kumniṅgambay gos ak ma niṅiy, sakiy giy nep yip chiṅgiy taṅgeṅgiy.

<sup>24</sup> “Biynimb Jiysis nup diy mindon, tep ma giniṅgamb aṅgiy niṅniṅgambay gok, pisnep apyap pikniṅgambay. Pen biynimb nup diy mindon, chinup yerer giniṅgamb ak, minim ma mindip aṅniṅgambay gok, mind tep gep ak diniṅgambay.

<sup>25</sup> “Biynimb tap man ar biy dun aṅgiy gey amniṅgamb gok, gos yomb kiyk ak tap man ar biy ker nep amek, Gor yip perper mindeniṅgiy rek ma ayiniṅgamb.

26 “Biynimb an kuyip nambij ginimuŋ rek ayek niŋiy, “Jiysis nup ma niŋbun aŋgningambay ak, kisen yand Bapiy melik chirapiy ak diy, enjol suŋ-tep gok sek winingayn ñin ak, kuyip pen kunep Bapiy nup, ‘Kuyip ma niŋbiyn aŋgningayn.’

27 “Pen nimbip niŋind yimb aspiyn. Biynimb miñiy mindpim guniy, gunap ma kumningambim; kim nep mindiy, Gor biynimb diy kond mindeningamb ak niŋningambim aŋgak.”

### **Jiysis Wak Nup Ak Key Ayak**

28 Jiysis kun aŋgiy, ñin anep jiy ak rek mindiy; Jon, Jemis, Piyta kuyip yakam poŋind, Gor nup aŋgningiŋ yep dum kun siŋak amnak. 29 Amiy, Gor nup aŋgniŋ mindakniŋ, jomluk nup ak key yimb ay, chech nup ak tund giy ñiñakol yimb gak. 30-31 Kun gakniŋ, bi wosrey kumrik, Mosis yip, Yilayja yip Gor melik ak diy apiy, Jiysis Jerusalem ameningamb nup mon kiros bak biyoŋ ñaŋgbirik ayey, kumningamb minim ak aŋg mindeyak.

32 Pen Piyta, Jemis, Jon kuyip yakam wisin apek, windin jujuk gi mindeyak ak pen, tikjakiy Jiysis melik tep nup ak niŋiy, bi omiŋal yip jak mindeyak gok niŋiy giyak. 33 Bi omiŋal kun ak amniŋ girikniŋ, Piyta gos niŋrep giy mer, Jiysis nup aŋgak, “Biyomb. Chin biy mindpun ak tep yimb mindpun. Chinup yaw aŋgey, korip bandak band omiŋal nokom gun. Nip bap, Mosis nup bap, Yilayja nup bap aŋgak.” 34 Kun aŋgakniŋ, won kun anep, semb tund yomb ak kuyip ap maŋgiysek yiw gakniŋ pirikyak. 35 Pen minim bap semb namb kun ak nimb apiy aŋgak, “Bi biy, Ñi mapin yand. Minim aŋgningamun rek niŋnimimb aŋgak.” 36 Won kun ak nep; bi omiŋal kun ak ma minderik; Jiysis nep mindek.

Pen dum biyoŋ mindey tap gek niŋyak kun ak, ñin namb kun siŋak biynimb gunap kuyip ma aŋgñiyak.

### **Ñiskoy Kichekiy Ambaŋ Ayak Ak Jiysis Gek Ñiyimb Ayak (Mat 17:14-21; Mak 9:14-29)**

37 Pen minek dum biyoŋ kirgiy, kinjeŋnamb okok apyapyiŋ niŋyak, biynimb kuŋay yimb nep, Jiysis nup piyowey apek. 38 Bi bap biynimb namb kun ak, suk yomb aŋgiy aŋgak, “Tiysa! Ñi yip nokom biy simb niŋan aŋgiy dand aswiyn. 39 Kichekiy ak pernep ambaŋ ay mindiy, nup gek suk yomb sikerek aŋgiy, gi dam pikiy, kosimb asimbi apiy, kumdam namb ayiŋg wip. Nup kun giy, perper gek mey, mind tep ma gip. 40 Bi nak gok kuyip, kichekiy mindip kun ak aŋgyokim apiyn ak pen; kiyk aŋgyok mer niŋiy kirpay aŋgak.”

41 Kun aŋgek, Jiysis aŋgak, “Biynimb miñiy mindpim ar biy, minek akay Gor nup gosimb niŋningambim? Ma yimb niŋbim kun ak, yergiy minim kil sek aŋgnim?” Kun aŋgiy, bi kun anup aŋgak, “Ñi nand kun ak dand siŋbiy owan aŋgak.”



<sup>42</sup>Anggek, dand owakniŋ, kichekiy ak ŋi kun anup tip ak kilis giy pipang yokek gindam pikak. Jiysis pen kichekiy anup aŋg gek, key amnakniŋ, ŋi kun ak ŋiyimb ayek, di nop nup ŋak. <sup>43</sup>Biyimb ap mindeyak gok, Nop Gor gak kun ak niŋiy, ŋawil diyak.

**Jiysis Kumningayn Angiy Tip Ak Anggak**  
(*Mat 17:22-23; Mak 9:30-32*)

Kiyk gos yomb kun ak niŋmindyakniŋ, Jiysis binuk gok kuyip anggak, <sup>44</sup>“Minim aspiyn biy timund ay niŋ-tep yimb ginimimb. Maŋ mindip, Bi bap ŋinuk nup mimuŋg niŋiy, biyomb gunap kuyip ŋiningambay anggak.” <sup>45</sup>Minim anggak kun ak, kiyk tik niŋep rek ma ayek; pirikiy Jiysis nup ma angniŋyak.

**An Rek Biyomb Yimb Anggak**  
(*Mat 18:1-5; Mak 9:33-37*)

<sup>46</sup>Binuk gok kiyk key aŋg amiy apiy giy anggak, “Yand biyomb minden,” “Yand biyomb minden,” anggak.

<sup>47</sup>Jiysis binuk gok, gosimb timey niŋyak kun ak key niŋiy, ŋapan sikoy yimb bap, dap mindek bak siŋak ay anggak, <sup>48</sup>“Biyimb gosimb yip niŋiy, ŋapan sikoy biy rek diniŋambay gok, yip diniŋambay. Pen biyimb yip diniŋambay gok, Biyomb yip yokek winik anup diniŋambay anggak.”

<sup>49</sup>Jiysis kun anggek, Jon anggak, “Biyomb. Chin niŋbun: bi bap yimb nip ak anggiy; kichekiy malŋiluk tap okok anggokip. Pen bi kun ak, chin yip ma tapun rek, kun ma ginimin apun anggak.”

<sup>50</sup>Anggek, Jiysis anggak, “Yenen nup kun apim? Biyimb chinup miluk ma niŋbay gok, buŋgiy chin anggak.”

**Samariya Kay, Jiysis Nup Ma Diyak**

<sup>51</sup>Pen Nop Gor, nup dand miŋmon nuk biyoŋ amniŋg gak ŋin ak, maŋ mindakniŋ, Jiysis Jerusalem amniyn anggiy, gos kilis giy niŋak ak mey; <sup>52</sup>bi gunap kuyip nind anggokiy anggak, “Nimb nind amiy, kinemb tip yip ak niŋayem anggak.” Anggek, kiyk am Samariya biyimb korip layn bap amjakiy, Jiysis kinemb tip nup bap ayem anggey, <sup>53</sup>biyimb miŋmon nop nimb kun gok, Jiysis Jerusalem amniŋg gak rek niŋiy, kuyip tep ma gek, nup ma diyak.

<sup>54</sup>Ma deyak niŋiy, Jemis yip, Jon yip am, Jiysis nup angrik, “Biyomb! Chin mon maŋlaŋ semb biyoŋ nimb ak anggon apiy, biyimb kun gipay gok kuyip yinimuŋ akan?” <sup>55</sup>Kun angger, Jiysis andikiy kuyipmiŋay niŋyŋg, kun ma ginjun anggiy kuŋay anggak.

<sup>56</sup>Biyimb kun gok, Jiysis nup ma deyak, miŋmon kun ak kirgiy, miŋmon bap key amniyak.

**Yand Yip Tanjoniŋgambun Angak**  
(*Mat 8:19-22*)

<sup>57</sup>Pen kinjeŋnamb okok amniyakniŋ, bi bap apiy, Jiysis nup angak, “Miñmon akay akay amningamban okok, yand yip nep tanjoniŋgambur angak.”

<sup>58</sup>Kun angkek, Jiysis angak, “Yand yip kosyam tanjoniŋgamban. Kayn ayndik gok korip kiyk kinemb ak, man miŋgan okok mindip. Yakir gok korip kiyk ak key mindip. Pen Bi bap Ninuk, tip kinemb ar nuk ak ma mindip angak.”

<sup>59</sup>Pen Jiysis bi bap nup angak, “Yip kondey, yand yip tanjor angak.” Angkek, bi kun ak pen angak, “Yip yaw angey, yand bapiy nup kond minden, kumek komiy winim angak.” <sup>60</sup>Angkek, Jiysis angak, “Biynimb permindep ma dipay gok, chip kumemb kun gok kuyip komniŋgiy, nand pen am, Gor biynimb diy kond mindeniŋgamb minim ak angñey amnaŋ angak.”

<sup>61</sup>Bi bap pen angak, “Yand nand yip nep tanjoniŋgambur ak pen, yip yaw angey, am amiy bapiy, mam ay yand gok kuyip ñin piksakiy, angñiy winim angak.” <sup>62</sup>Angkek, Jiysis angak, “Biynimb Gor nup marik giniŋ giy pen, gos yomb kiyk ak, andkind biynimb kiyk, tap kiyk gok amningamb ak; Gor biynimb yand anggiy diy, kond mindonimuŋ rek ma ayningamb.”

**Binuk Kuŋaynep Angyokek Am Miñmon Keykey Minim Angñiyak**

**10** <sup>1</sup>Kisen Jiysis bi ñin jiwiy omiŋal nokom, andikiy omiŋal nokom (72) diy, kuyip bilok omiŋal ak key, omiŋal ak key miñmon okok keykey angyokiŋg angak, “Nimb nind amiy, minim yip ak angñem, yand kisen niniŋgayn angak.”

<sup>2</sup>Pen kuyip minim bap angak, “Tap woŋg ak kuŋay yimb nep mindip ak pen, biynimb pipanŋ dand wep gok nep kuŋay ma mindpay. Kun ak, bi woŋgday nop nimb anup angniŋ mindem, biynimb tap pipanŋ dand wep gunap sek angkek, am pipanŋ dand winiŋgiy. <sup>3</sup>Nimb pen woŋg ar kun anep ginimimb. Pen siypsiyp ñiluk yand gok nimbip yoksipiyn; kayn ayndik mindpay namb ak, <sup>4</sup>anpawis, wand, tomb tirup gok sek, dand ma amnimimb. Biynimb kinjeŋnamb okok niŋiy, minim ma angnimimb. <sup>5</sup>Pen korip bap amjakiy, korip miŋgan amyinŋ, kuyip minim tep won ak anggiy angnimimb, ‘Gor nimbip kond minden.’ <sup>6</sup>Anggem, biynimb Gor nup dep rek mindeniŋgambay gok, minim nimbip kun ak diniŋgambay.

<sup>7</sup>“Pen korip kun anep mindiy, tap keñmanŋgiy dap ñiniŋgambay gok, ñimbyinŋ mindenimimb. Chinup tap minek minek ñey ñimbun ak, nambiŋ gip anggiy, korip ok korip ok ma ginimimb. Bi woŋg gipay gok pey dipay. Kun ak rek, kuyip minim tep anggem niŋniŋgambay rek, nimbip pen keñmanŋgiy ñiniŋgambay.

8 “Pen miñmon bap amem, nimbip sik aᅅgdiy, keñmaᅅgiy ñiniᅅgiy gok ñiᅅnimimb. 9 Miñmon kun ak, biynimb tap ginimuj gok, gem suᅅ ayakniᅅ, biynimb gok kuyip maᅅgiyseᅅ aᅅg tep giy aᅅgnimimb, ‘Kiyᅅ yomb biynimb diy kond mindeniᅅgamb ak, tomb aᅅgin nimbip ak wip aᅅgnimimb.’

10 “Pen miñmon bap amem, nimbip ma sik aᅅgdey, lor namb siᅅak amiy, ‘Miñmon nimb biy apon silkul dip gok, wiyk nimbip ker yokiy amjipun. 11 Pen niᅅim: Kiyᅅ yomb biynimb diy kond mindeniᅅgamb ak, tomb aᅅgin nimbip ak wip aᅅgnimimb.’

12 “Nimbip aspiyn: kisen kor yomb ñin ak, miñmon Sodom Gomora biynimb tap siy tap timey nep gey gey yin simbok amnak ak, kor giy yiwur sikoy rek diniᅅgambay; biynimb minim nimb am aᅅgem ma diniᅅgambay gok, kor giy yiwur yomb yimb diniᅅgambay.

### Yiwur Diniᅅgambay

13 “Korasin biynimb gok sek, Betsayda biynimb gok sek tap mageprek ak gen, niᅅiy kirpay rek, yiwur yomb yimb diniᅅgambay. Pen Taya-Saydon biynimb gok kuyip, tap magep kun ak rek, gunap gen niᅅbiyap ak, chech talik yowip gunap yimiy, bisgiy tun diyiᅅg diyiᅅg mindembiyap. 14 Kor yomb ñin ak, Taya-Saydon biynimb yiwur sikoy rek diniᅅgambay; Korasin biynimb gok sek, Betsayda biynimb gok sek yiwur yomb yimb ak diniᅅgambay. 15 Pen ñin kun ak, Kapaniyam biynimb kunep, semb biyoᅅ ma amniᅅgambay; pisnep kaw miᅅgan yomb ak amniᅅgambay aᅅgak.”

16 Jiysis binuk gok kuyip aᅅgak, “Biynimb minim nimbip dipay gok, minim nimbip ak mer: minim yip ak dipay. Nimbip ma dipay gok, nimbip mer: yip ma dipay. Pen yip ma dipay ak, yip mer: Biyomb yip yoᅅek winik ak nup ma dipay aᅅgak.”

### Binuk Kuᅅaynep Andkind Wiyak

17 Pen kisen binuk ñin jiwiy omiᅅal nokom, andikiy omiᅅal nokom (72) kun gok, miñmon okok taᅅgjjiwiy apiy, tep gakniᅅ Jiysis nup aᅅgyak, “Biyomb! Kichekiy malñiluk biynimb ambaᅅ ayip gok yimb nip ak aᅅgiy, ‘Jiysis mindip rek mis amnim’ aᅅgon, apun rek niᅅiy ambay aᅅgyak.”

18 Aᅅgeyak, kuyip aᅅgak, “Yand niᅅmindnikniᅅ, kichekiy malñiluk nop kiyk Seytan, kasek won anep, aᅅñiᅅak rek diy apyap pikip. 19 Siyᅅ saraw, kondal, maploᅅgim, tap okok nimbip miluk niᅅiy, timey giniᅅgiy rek ma ayip. Nimbip ñinen aspiyn rek, yuk yokem amniᅅgambay.

20 “Pen kichekiy malñiluk gok, apun rek niᅅiy ambay aᅅgiy, miñmiñ ma ginimimb; Gor Biyomb chin ak, yimb chinup di ayip miñmon nuk biyoᅅ aᅅgiy, miñmiñ ginimimb aᅅgak.”

**Jiysis Nop Gor Nup Tep Angak**  
(*Mat 11:25-27; 13:16-17*)

<sup>21</sup> Won kun sijak, Gor Kawnan ak Jiysis nup bak ayek, nup tep gakniņ, Gor nup angniņiy angak, “Bapiy. Nand Biyomb semb biyoņ sek, man biy sek kond mindpan ak, gos nak ak key niņey tep gip ar ak gipan. Chin biynimb yomb gos tipangiy niņbun apay gok kuyip kirgiy, chin biynimb tep ma mindpun, ñapan sikoy rek mindpun apay gok kuyip diy, kuyip gos tep ñimban ak, nip tep aspiyn angak.”

<sup>22</sup> Kun angiy angak, “Biynimb gunap yip ma niņbay; Bapiy nep yip niņimb. Pen Bapiy nup kunep biynimb gunap ma niņbay; yand nep nup niņrep gipiyn. Pen Bapiy yip angak, nuk gip rek gipiyn ak mey, biynimb gos tep ñiyn angiy niņbiyn gok, gos tep ñen, Bapiy nup niņrep gipay angak.”

<sup>23-24</sup> Kun angiy, andikiy binuk gok nep kuyip angak, “Gapman biyomb gok sek, Gor minim angap biyomb gok sek kuņaynep rek, yand gipiyn ak, minim apiyn ak, niņun angiy kond mindyngipay ak pen; ma niņyak. Gor nimbip di tep yimb gek mey, niņsipim angak.”

**Bi Samariya Nimb Ak Girep Yimb Gak**

<sup>25</sup> Bi low tiysa bap, Jiysis yerip rek angnimuņ angiy, ap nup angak, “Tiysa. Yand yerer giy, perper mindeniņgayn?”

<sup>26</sup> Angak, nup angak, “Baybol buk ak tikiy, yerip angyak?”

<sup>27</sup> Angak, bi low tiysa kun ak angak, “Baybol buk riytiym gi niņbiyn ak angyak:

‘Gor Biyomb nak anup wasemb yimb ay, gos timund nak ak, kilis nak ak maņgiysek nup ker amnimuņ. Nand key wasemb aypan rek, biynimb gunap kuyip, kunep wasemb aynimin angiy’ tikyak.”

<sup>28</sup> Kun angak, Jiysis bi kun anup angak, “Mey yipund giy apan ak. Ar kun ak kisen giy, perper mindeniņgamban angak.”

<sup>29</sup> Angak, bi low tiysa kun ak, yimb yip ak sikoy giniņgamb angiy, Jiysis nup tip angniņiy angak, “Baybol buk tikyak ak, biynimb gunap kuyip wasemb aynimimb angiy tikyak. Kun ak biynimb gunkay kuyip, kun giyaņ angiy tikyak?”

<sup>30</sup> Angak, Jiysis bi low tiysa ak nup, kesim diy angak, “Bi bap Jerusalem kirgiy, miñmon Jeriykow amniyn angiy, kinjeņnamb ak amnakniņ, bi tap siy dep gunap apiy, nup tapin nep pikiy, chech tap nup gok piliņ dand amniyakniņ, nuk kinjeņnamb sijak kumniņg kumniņg gi mindek.

<sup>31</sup> Bi Gor nup simboņep bap, lor ar kun ak amiy niņak; bi kun ak kumniņg gi mindek. Nuk niņiy pis anep amnak. <sup>32</sup> Pen bi Liypay kiñiņ Gor angniņep korip kond mindyngip bap, lor ar kun anep amiy niņak, bi kun ak kumniņg gi mindek. Niņiy, kunep pis anep amnak. <sup>33</sup> Pen

bi Jiwda mer, miñmon Samariya nimb bap, kinjeñ par nokom kun ak nep amiy niñak; bi kun ak kumning gi mindek. Niñiy, nup simb niñiy, <sup>34</sup>mindek mañ siñak amiy, soy nup gok wel gunap ay, wayn ñing gunap ay tiwningak. Tiwningiy, di doñgiy ar nuk ak ay dand amiy, korip maniy tawiy kinyingipay ak dam ay, kond mind tep yimb gak. <sup>35</sup>Minek amning giying, bi korip kond mindyngip kun anup, maniy kind nokom bap niy añgak, ‘Nand bi kun biy nup direp ginimin. Pen maniy yerip yerip añgningamban ak, andkind apiy nip ñiningayn añgak.’”

<sup>36</sup>Jiysis kesim kun ak diy, bi low tiysa kun anup añgak, “Bi kinjeñnamb pikayak ak, bi omiñal nokom pandikiy, bi an nuk key wasemb ayip rek, nup wasemb ayak?” <sup>37</sup>Añgek, bi low tiysa ak añgak, “Bi nup simb niñiy direp gak ak añgak.” Añgek, Jiysis nup añgak, “Niñind apan. Mey ar kun anep ginimin añgak.”

### Mata Nup Woñg Gos Anep Ayak

<sup>38</sup>Pen Jiysis binuk gok yip miñmon bap amjakeyak, biyn miñmon kun ak mindek bap, kuyip poñind korip nuk ak amnak. Biyn kun ak yimb nuk Mata. <sup>39</sup>Korip nuk ak, nunay bap mindek. Yimb nuk Mariya. Pañ Mariya kun ak, Jiysis mindek mañ siñak ap bisgiy, Jiysis minim añgakniñ, niñmindek. <sup>40</sup>Mata nuk keynep tap keñmañgiy dañgiy gi gi, gos kuñay niñiy, ap Jiysis nup añgak, “Biyomb. Mariya yip kirgek, key nep tap chin gok dañgiysi piyn ak tep ma gip. Nup añgey apek, omiñal giy tap dañgiyur añgak.”

<sup>41</sup>Añgek, Jiysis añgak, “Mata. Mata. Nip tap kun gok nep gos ayip! <sup>42</sup>Ak tap yikop! Mariya minim tep ak diyn añgiy, gos ak ayek, ap niñmindip. Kun ak, yand nup kiring amnoñ añgnim rek, ma ayip añgak.”

### Gor Nup Kun Giy Rek Añgniñnimimb Añgak

(Mat 6:9-15; 7:7-11)

**11** <sup>1</sup>Ñin bap, Jiysis miñmon wikan bap mindiy, Nop Gor nup añgniñ jiwakniñ, binuk bap ap nup añgak, “Gor nup yergiy rek añgniñbay? Jon binuk gok kuyip, añgñek niñyak rek, chinup kunep añgñey niñjun añgak.”

<sup>2</sup>Añgek, Jiysis kuyip añgak, “Gor nup añgniñning, kun giy añgnimimb: ‘Bapiy. Nand timey ma giy, Bi tep yimb mindpan ak, yimb nip dand aranemb. Nand nep Biyomb chin mindiy, chinup kond mindenimin.

<sup>3</sup>Pen tap keñmañgiy gok, minek minek ñimbun rek ak ñinimin.

<sup>4</sup>Biynimb gunap chinup timey gey, kuyip pen miluk niñiy timey ma gipun rek, tap siy tap timey chin gipun ak, kunep niñiy kirginimin. Chinup kond mindey, gos bap apek timey ma ginjun añgnimimb’ añgak.”

5-6 Kun anġiy, binuk gok kuyip anġak, “Nimb bap, kisyimnamb yomb akyan, buŋiy nimb bap korip ak amiy anġningambim, ‘Buŋiy. Bi yand niġep rek bap, par okok nimb apiy amniyn anġiy, korip yip ak apchakamb, tap nup ñen ñiŋnimuŋ ak ma mindek mey; nip ker aswiyn. Yip biret omiŋal nokom ñan anġningambim,’ buŋiy nimbik kun ak minim bap anġningamb; 7‘Kisyimnamb biy, yip kun giy ma ap anġninin! Ñapan yand gok yip kinjeŋ giŋiy kinjipun. Kun ak yergiy tikjakiy, nip tap aspan ak diñinim anġningamb?’

8“Pen nimbip aspiyn: bi korip nop nimb ak, buŋiy yand anġiy, kasek ma diñeningamb; nup ñan anġiy kond mindyiŋg, kilis gi mindem mindem, anġningambim rek niŋiy, diñiningamb.

9“Kun ak nimbip aspiyn: tap yerip tikdenimuŋ, Gor nup anġniŋem, nimbip ñiningamb. Pen tap yerip piyowniŋningambim ak, kunep diniŋgambim. Chinup kinjeŋ ak yikaŋ anġiy, pik giygiw gem, yikniŋgamb.

10“Yenen: biynimb an Gor nup anġniŋbay gok, apay rek gip. Tap piyowpay ak kuyip yomimb. Pen kinjeŋ ak yikaŋ anġiy, pik giygiw gey, apay rek niŋiy yikip.

11“Nimb bi ñapan nop gok, ñapan nimb bap piys nen anġek, siyŋ timey bap ñimbikip? 12Akaŋ pen, yakir maŋgiy nen anġek; kondal bap ñimbikip? Ak kun ma gipkip! 13Nimb biynimb tep mer ak pen; ñapan nimb gok tap tep gok nep ñimbim. Bapiy tep semb biyoŋ ak bi tep yimb. Nuk tap yesek bap key ma ñiningamb. ‘Kawnan nand ak chinup yokan anġem,’ yokningamb anġak.”

### **Kichekiy Malñiluk Nop Kiyk Seytan Kilis Ak Dipan Anġyak** (*Mat 12:22-30; Mak 3:20-27*)

14Pen bi bap kichekiy ak ambaŋ ayek, minim anġiy mer, yikop nep mindek. Jiysis kichekiy abaŋ ayak kun ak anġyokek, minim anġakniŋ, biynimb ap niŋmindeyak gok, gos kuŋay yimb niŋyak.

15Pen biynimb kun gok gunap anġyak, “Nuk kichekiy malñiluk nop kiyk Seytan, yimb bap Belsiybul apay kilis ak diy, anġyoksap anġyak.”

16Pen biynimb gunap, Jiysis yerip giniŋgamb anġiy anġyak, “Tap bap key semb siŋbiyoŋ gey niŋiy mey; Gor nep anġyokek winak anġningambun anġyak.”

17Pen Jiysis gos yesek niŋyak kun ak niŋiy anġak, “Miñmon yomb nokom bap, asik keykey ay mindrep ma giniŋgambay. Biynimb kiñiŋ nokom bap, kunep asik keykey ay mindrep ma giniŋgambay. 18-19Kun ak rek, Seytan kiñiŋ ak tungasik keykey ay, yergiy mind tep giniŋgambay? Yip Belsiybul nup kond mindek, kichekiy malñiluk anġ mis yoksap apim ak pen, yand kun gembiniŋ, yergiy biynimb nimb gok kichekiy malñiluk anġ mis yokpiyap. Kiyk key nimbip anġningambay, biynimb bap kun

giniŋgiy rek ma ayip. <sup>20</sup>Pen Gor yip kond mindek angyokpiyn ak; yip yenen, Gor binuk biynimb diy kond mindeniŋgamb ak wip biy angyi ma niŋbim.

<sup>21</sup>“Pen bi kalrimey bap mindiy, chim yakam nuk ay tep giy, korip nuk niŋmindek, biynimb tap nuk bap piliŋ diniŋgiy rek ma ayiŋgamb.

<sup>22</sup>Pen bi kalrimey yimb bap key apiy, chim tap nuk siy di mindip gok piliŋ diy mey, key niŋimb rek bilokniŋgamb.

<sup>23</sup>“Biynimb yand ker ma mindpay gok, Seytan kind ak mindiy mey, yip ma dipay. Pen biynimb yand yip wong ma gipay gok, kinjen day angyi tikey, biynimb yip ker winiŋg gipay gok ma opay.

**Kichekiy, Malñiluk Tap Gok Yikop Angyokem Tip Andkind  
Winiŋgiy Rek Ayip  
(Mat 12:43-45)**

<sup>24</sup>“Kichekiy malñiluk timey bap, biynimb ambaŋ ay mindek, angyokeniŋgambay, am miñmon nep namb okok tip bap niŋiy minden angyi, am kun okok taŋ taŋ mer niŋiy, korip miŋgan nind mindiy opiyn ak amniyn angyiŋgamb. <sup>25</sup>Angyi, amiy niŋniŋgamb: korip kun ak girep yimb gey, tip anep mindeniŋgamb. <sup>26</sup>Nuk niŋiy okok amiy, nund rek mer; kichekiy malñiluk timey yimb onep ar ak sek poŋind apiy, miŋgan kun ak mindeniŋgambay. Kun gek, nind mindrep giyiŋgip rek mer; pisnep timey yimb giniŋgamb angyak.”

<sup>27</sup>Jiysis kun angyek niŋiy, biyn bap namb kun ak tikjakiy, meŋg miŋgan dand araniy angyak, “Nanim nip tikiy tiy ñak ak, miñmiñ yimb ginimuŋ angyak.”

<sup>28</sup>Angyek, Jiysis angyak, “Kun apan ak pen; biynimb Gor nup minim ak niŋiy, angyi angyi rek giniŋgambay gok, miñmiñ giniŋgambay angyak.”

**Tap Bap Key Gey Niŋun Angyak  
(Mat 12:38-42; Mak 8:12)**

<sup>29-30</sup>Pen biynimb kuŋay yimb nep, ap nanan giyakniŋ, Jiysis angyak, “Biynimb miñiy mindpim ñin namb biy, tap siy tap timey giyiŋg apim, ‘Tap key rek bap semb biyoŋ gek niŋiy, Kiyŋ yomb key yimb per kond mindpun ak nep, wip angyi niŋniŋgambun apim.’ Pen nimbip aspiyn, tap bap key gen ma niŋniŋgambim. Niŋniŋg: Jona wosrey ñin omiŋal nokom, piys yomb koŋgiy namb biyaŋ mindiy, owak rek ak yip kunep gek, niŋniŋgambim. Gor Jona nup kond mindrep gak rek, Niyniypa biynimb niŋiy, Gor nup gosimb niŋyak.

<sup>31</sup>“Pen wosrey, Kiwiyn biyn yomb miñmon paryomb Yitiyopiya nimb ak, kiyŋ Solomon biyomb rek ayek niŋiy, minim nup ak niŋiyn angyi owak. Pen biynimb miñiy mindpay gok, Biyomb yimb ak ap mindiy, minim angyi ak ma dipay rek, kisen kor yomb ñin ak, minim yomb diniŋgambay.

<sup>32</sup>“Wosrey, Jona am Niyniypa biynimb kuyip angek, tap siy tap timey giyak gok kirgiy, Gor nup diyak. Jona bi yikop ak angek niñyak ak pen, miñiy Biyomb yimb ap mindip biy nup, kun ma gipim. Kisen kor yomb ñin ak minim yomb diniñgambim angak.”

**Kisyimnamb Okok Rek Ma Mindenimimb**  
(*Mat 23:1-26; Mak 12:38-40; Luk 20:45-47*)

<sup>33</sup>“Biyimb gok lam danġiy tiyn miñgan okok akan, bonġ ar kinbay molik okok ma aypay; ar siñak tik ayey melik gek, biynimb gok korip miñgan kun ak apiy miseñ niñbay. <sup>34</sup>Pen windin manġiy ak sup rek mindip ak mey, mind tep gek, mumbwak ak mind tep yimb giniñgamb. Pen mind tep ma gek; kisyim wip rek ak mindeniñgamb.

<sup>35</sup>“Namb chinup ak melik mindip anġiy niñniñgambim ak pen; kisyim wip rek ayip ak, niñrep yimb ginimimb. <sup>36</sup>Mumbwak nimb manġiysek melik yimb giy mindeniñgamb ak, wikan bap kisyim ma mindeniñgamb; lam melik gip rek ak, giyiñg nep mindeniñgamb angak.”

**Nimb Peresiy Gach Sek Anġak**

<sup>37</sup>Pen Jiysis minim anġjiwakniñ, bi Peresiy bap nup angak, “Apey, korip yand ak amiy tap ñiñur angak.” Angek, Jiysis am korip nup ak, <sup>38</sup>bisgiy tap ñiñakniñ, bi Peresiy kun ak, gos nuk namb okok nep niñiy, bi kun biy yenen, chin Jiwda kay per gipun rek, ñin nuk ak niñg ay gilunġ yokiy mer; yikop nep tap ñimbsap anġiy, gos ak niñak. <sup>39</sup>Gos kun ak kun giy niñek, Jiysis anġak, “Nimb Peresiy kay, piler kap gok mis okok ken, niñg pik tep gipay rek ak gipim ak pen, namb nimb biyañ tap siy tap timey gipim gach ak, arachakiy mindip. <sup>40</sup>Nimb sakiy sek yimb. Gor nimbip wak ak nep ma gayak; namb biyañ kunep gayak. <sup>41</sup>Kun ak, tap piler kap miñgan biyañ mindip ak, biynimb simbgeprek gok kuyip ñinimimb. Kun giy mind tep giniñgambim.

<sup>42</sup>“Pen nimb Peresiy kay niñrep yimb ginimimb. Sinimb tap monmon gok niñem tap yomb rek ayek, ñin pañgniñ dand amiy, wanjrem ak amek, Gor nup nokom bap ñun anġiy, per ñimbim. Ak tep gipim; minim ma mindip. Tap siskoy okok per kun giy gipim ak pen, yenen minim junj yimb ak kunep ma gipim. Gor nup niñiy dep akan, biynimb gok kuyip niñiy dep ar ak, per kirpim.

<sup>43</sup>“Nimb Peresiy kay niñrep yimb ginimimb. Gos nimbik niñbim ak, lotiw namb ak akan, miytiñg gipay namb ak amon, aswim-ey anġey, yimb chinup anep dand araniyañ anġiy, gos ak nokom niñbim.

<sup>44</sup>“Pen gipim kun ak, Gor nimbip pen kunep giniñgamb ak, niñrep ginimimb. Biynimb gunap niñiy, nimbip bi tep yimb apay ak pen; chip kuy giy mindip rek ak, mindpim angak.”

<sup>45</sup>Kun angek, bi low tiysa bap, Jiysis nup angak, “Tiysa. Minim kilis timey yimb apan kun ak, chinup kunep apan akan?”



<sup>46</sup> Angek, Jiysis angak, “Nimb bi low tiysa gok niņrep yimb ginimimb. Minim kilrimey apim ak, wand miker yomb gok rek, biynimb gok kuyip gom ñimbim ak pen; kuyip simb niņiy ma tuņgasik dipim.

<sup>47</sup> “Kun ak niņrep yimb ginimimb! Nasind yes nimb gok wosrey, bi Gor minim angek gok kuyip pikayey, nimb kaw kuyip komemb gok gayrep giyijņ mindpim. <sup>48</sup> Gipim kun ak tep nep pikyak angyi gipim.

<sup>49</sup> “Kun ak Gor niņrep giy angak, ‘Bi minim yip angek gok, bi minim yip dand amemb gok kuyip yokniņgayn ak pen, kuyip yiruk niņiy, gunap timey giniņgambay; gunap pisnep pikayniņgambay angak.’

<sup>50</sup> “Pen wosrey, miñmon alwol gayak ñin ak tikiy, bi Gor minim angek gok kuyip per pikey wip rek, biynimb miñiy mindpay gok, minim miker kun ak diniņgambay. <sup>51</sup> Miker kun ak mey, bi Ebol nup nind kiñiņ giy ñanġiy, ñanġ dand apiy, ñanġ dand apiy, kisen Sekaraya nup, Gor nup tip tap simboņ ñemb korip miņgan ak bindoņ, kamb diy giyak bind ar ak biy, namb siņak ñanġayak. Nimbip niņind yimb aspiyn. Minim miker kun ak maņgiysek, biynimb miñiy mindpay gok diniņgambay.

<sup>52</sup> “Pen nimb bi low tiysa gok niņrep yimb ginimimb. Kiy diy, kinjeņ yikiy korip miņgan amiy niņrep gep ak, yiruk gek kirpim. Kirgiy, biynimb korip miņgan amniņg gipay gok kuyip, per kinjeņ day anġrikpim. Kun ak niņrep yimb ginimimb angak.”

<sup>53-54</sup> Jiysis kuyip kun angyi, mis amnakniņ; bi Peresiy gok sek, bi low tiysa gok sek nup yiruk niņiy angyak, “Minim yerip ak anġon, pen anġek niņiy, dand kor yomb amnun angyak.” Kun ak mey, nup minim yesek yesek ar keykey gok anġniņiyiņgipay.

### Tap Weygiy Gipay Gok Miseni Niņniņgambay

(Mat 10:26-27)

**12** <sup>1</sup> Pen won kun ak, biynimb kuņay yimb nep ap nan-giy, chichmiy yimyakniņ, Jiysis binuk gok kuyip angak, “Peresiy kay per timey gipay ak weygiy, mind tep gipun apay. Kun ak rek, nimb kunep ginimimb rek ayip ak, niņrep yimb ginimimb. <sup>2</sup> Tap weygiy gipim gok, kisen miseni niņniņgambay. Minim kapkap anġ weygiyim gok, kunep misen gek niņniņgambay. <sup>3</sup> Pen minim kisyimken apim gok, melik sek anġey niņniņgambay. Minim kapkap korip miņgan okok apim gok, korip ar biyoņ anġey, yiņg dand miñmon okok amniņgambay angak.”

### Gor Nup Piriknimimb

(Mat 10:31)

<sup>4</sup> “Biynimb yand guniy. Nimbip aspiyn, Gor nup chiņgon, chinup ñanġniņgambay angyi ma piriknimimb. Ak yikop mumbwak ar anep timey giniņgambay. <sup>5</sup> Kun ak nimbip aspiyn: pirikniņg, Gor Biyomb nimbip pikay, mon key yinġap yokniņgamb ak nup piriknimimb. Kun ak nimbip niņind yimb apiyn.

6“Nimb niḡbim: yakir sikoy onep mamind ak yokiy, maniy likañ sikoy won omiḡal nep dipay. Yakir sikoy kun gok, Gor ma niḡnimuḡ rek bap ma mindip; maḡgiysek niḡimb ak nep mindip. 7Pen nimb biynimb gok, tap yimb; yakir gok kuyip wiyniyim gipim. Kun ak, Gor jun kas nimbip maḡgiysek ñin paḡgip ak mey; gos sek mindenimimb aḡgak.”

**Jiysis Nup Yimb Di Aḡgep**  
(*Mat 10:32-33; 12:32; 10:19-20*)

8“Nimbip aspiyn: biynimb Jiysis ker mindpun aḡgiy, biynimb mindpay namb ak aḡgyikey; kuyip pen, biynimb guniy yip ker mindpay aḡgiy, enjol mindpay namb ak miseḡ aḡgyikniḡgayn.

9“Pen biynimb ‘Jiysis ker ma mindpun aḡgiy’ biynimb mindpay namb ak aḡgey, kuyip pen, yip ker ma mindpay aḡgiy, enjol mindpay namb ak aḡḡniḡgayn.

10“Bi bap Ñinuk nup aḡḡjiweneḡgambay, Gor niḡiy kirginiḡ kirginiḡgamb; pen Kawnan nuk ak nup aḡḡjiweneḡgambay, nuk niḡiy ma kirginiḡgamb.

11“Pen nimbip kor giniḡ, dand lotiw giniḡ biynimb ap nan-gipay namb ak amey akaḡ; kanjsol mindpay namb ak amey akaḡ, gapman biyomb mindpay namb ak amey, pen minim yerip ak diy aḡjun aḡgiy, gos ak ma piyow niḡnimimb. 12 Tikjak apikniḡ, Gor Kawnan ak nimbip gos ñakniḡ, aḡḡniḡgambim aḡgak.”

**Tap Kuḡay Dun Aḡgiy Gos Ma Niḡnimimb**

13Biynimb kuḡay mindeyak namb kun ak, bi bap Jiysis nup aḡgak, “Tiysa. Mam yand ak nup aḡgey, bapiy tap nuk day kumak gok, bilok yip pis ak key ñaḡ aḡgak.”

14Aḡgek, Jiysis nup aḡgak, “Yip an aḡgip, ‘Bi tap pikasik ñemb ak mindonimuḡ aḡgek,’ tap nimbip gok pikasik ñinim? 15 Tap kuḡay dun aḡgiy gos ak ma niḡnimimb. Tap dun aḡgiy niḡbim kun gok, nimbip gek mindrep ginimimb rek ma ayip aḡgak.”

16Pen Jiysis minim bap kuyip paydoḡ ay aḡgak, “Bi maniy kuḡay mindeneḡgamb bap, woḡḡday nuk ak, wiyt maḡgiy tap gok kuḡay yimb mindeneḡgamb. 17Gos nuk okok nep key niḡdand amiy, tap ñiḡemb yand kuḡay mindip gok, korip miḡḡan akay dap ay ñimb mindenim aḡḡniḡgamb. 18Pen gos bap niḡiy, korip sikoy gok timbrik yokiy, korip yomb yomb gok nep giy, keñmaḡgiy tap yand okok maḡgiysek, di miḡḡan kun okok ay woḡḡ ak kirgiy, 19tap yand kun gok nep ñimbyiḡ, ñiḡ ñimbyiḡ, miñmiñ giyiḡ, gi mindeneḡgayn aḡḡniḡgamb. 20Pen kun giy niḡek, Gor nup aḡḡniḡgamb, ‘Nand bi sakiy sek yimb. Miñiy kisyimnamb biyaḡ kumeneḡgamban, tap nand kuḡaynep mindip gok, an rek diniḡgamb aḡḡniḡgamb.’

21 “Kun ak rek mey, biynimb tap kiyk gok nep mapin tikjakek, Gor nup niŋey tap yikop rek ayip aŋgak.”

**Gos Kuŋay Ma Niŋnimimb Gor Nimbip Kond Mindeniŋamb**  
(*Mat 6:25-34*)

22 Jiysis kun aŋgiy, binuk gok kuyip aŋgak, “Chech akay nimb diy yimniŋambun; tap akay nimb diy niŋniŋambun aŋgiy gos yomb ak ma niŋnimimb. 23 Nimbip gayak ak, chech, tap niŋemb nep piyow niŋniŋgiy aŋgiy ma gayak.

24 “Yakir gok biynimb gipay rek, wiyt yimey, pikgek tik dand ma opay. Pen wiyt maŋgiy tik dap nan-giniŋgiy korip bap ma mindip. Gor nep mey, tap niŋemb kuyip ak niimb. Nuk tap yikop gok niŋiy kun gip ak, yenen chinup ma kond mindeniŋamb aŋgiy gos kuŋay niŋbim? 25-26 Akaŋ pen, kumniŋ giniŋgambim niin ak kirgiy, won bap sek mindenimimb rek ayek; tap yesek kun gok gos kuŋay niŋbim?

27 “Tap saŋgiy okok jakiy, maŋgiy piyiniŋ sum gip gok, key mokyaŋ giniŋgiy rek ma ayip, Gor nep gek, mokyaŋ tep yimb ak giy mindipay. Pen wosrey, biyomb Solomon mokyaŋ giyiniŋgip ak, mokyaŋ tep kun ak rek ma giyiniŋgip. 28 Tap saŋgiy okok jakip kun gok tap yikop; per ma mindeniŋamb. Miŋiy rek mindiy, toy rek pikrik mon daŋgiyey yiniŋamb. Pen Gor tap ma kond mindep rek kun gok kond mindip ak, chinup kond mindeniŋamb aŋgiy niŋnimimb ak pen; gos nimb ak parsek ma mindip.

29 “Keŋmaŋgiy, niŋg, tap gok akay nimb diy niŋjun aŋgiy, gos ak ma niŋnimimb. 30 Biynimb Gor ker ma mindipay gok, gos kun ak rek niŋbay; pen Nap yomb ak nimbip sakiy ma gip; tap nimbip tikdip gok niŋimb. 31 Kun ak nuk biynimb diy kond mindeniŋamb ak, chinup sek dinimuŋ aŋgiy, gos nokom niŋiy gem amek mey, nimbip kond mindakniŋ, tap kun gok ma tik diniŋamb.

**Tap Teprep Nimb Gok Nan-gem Mindonimuŋ Gor Miŋmon Biyoŋ**  
(*Mat 6:19-21*)

32 “Kanj siypsiyp sikoy tiwin biy. Nap yomb nimbip diy kond mindeniŋayn aŋgiy niŋimb ak mindip ak mey; ma piriknimimb. 33 Tap nimb gok mindip rek yokiy maniy diy, biynimb tap ma mindip gok kuyip niŋnimimb. Kun gem mey, tap mapin nimb gok lum ar biy ma mindeniŋamb; mindeniŋamb Gor miŋmon biyoŋ. Kun biyoŋ ma kurginiŋamb; siplep ma siwiŋ, bi siydep gok siy diniŋgiy rek ma ayiniŋamb. 34 Tap tep nimb gok man ar biy di nan-gem, gos nimbip ak mindeniŋamb man ar biy; pen semb biyoŋ nan-gem, gos nimbip ak amniŋamb kun biyoŋ aŋgak.”

**Minj Moka Giy Mindenimimb**

35 “Kun ak laplap nimb ak dem apek, maŋ maŋ paŋgiy, ler ak pimirikiy, lam ak daŋgiy ay niŋmindenimimb. 36 Bi woŋg giŋimbay gok

aṅgningambay, ‘Biyomb chin ak, biyn diying tap yomb ñimbsipay namb ak amimb rek, maṅ mindip winingamb aṅgiy,’ niṅnep mindeningambay. Kun ak biyomb kiyk ak girangiy, ap kinjer ak pik giygiw gek, kasek yikningambay. Kun ak rek nimb ginimimb. <sup>37</sup>Pen nuk andkind apiy niṅningamb: niṅmindeningambay ak, kuyip di tep yimb giningamb. Biyomb kun ak nuk key, chech nuk ak lip gek apek, maṅ maṅ paṅgiy, ler ak pimbirikiy, kuyip aṅgek, am tap ayñimbay tip ak bising kus kus gey, nuk key kuyip tap ñiṅemb gok dam ñiningamb. <sup>38</sup>Pen Biyomb ak kisyimnamb biyaṅ akan; kakaruk aṅgakniṅ apiy niṅningamb: binuk gok wisin ma kineningambay, kuyip di tep yimb giningamb. <sup>39</sup>Kun ak niṅim. Biynimb korip nop nimb gok, bi tap siy dep bap ñin ak rek winingamb aṅgiy niṅmindembiyap ak; korip kuyip ak piklakiy, tap kuyip gok siy ma dipkop. <sup>40</sup>Kun ak rek Bi bap Ñinuk winingamb aṅgiy, kond mindenimimb. Ma asaw aṅgiy, niṅningambim ñin ak winimuṅ rek ayip aṅgak.”

### **Gor Nup Woṅg Giñirep Ginimimb**

*(Mat 24:45-51)*

<sup>41</sup>Jiysis kun aṅgek, Piyta aṅgak, “Biyomb. Minim paydoṅ ay apan kun ak, chinup nep apan akan, biynimb maṅgiysek apan?”

<sup>42</sup>Aṅgek, Jiysis aṅgak, “Bi an gos tep mindek, woṅg gi tep yimb giningamb ak, biyomb nuk ak amning giy, nup aṅgningamb, ‘Bi woṅg yip giñimbay gunap kuyip kond mindiy, tap ñiṅemb kuyip gok bilok ñiyiṅ gi mindenimin aṅgiy’ amningamb. <sup>43</sup>Kun ak kisen andkind apiy, aṅgningamb rek gek niṅiy, nup di tep yimb giningamb. <sup>44</sup>Niṅind apiyn. Nup aṅgek, tap nuk gok maṅgiysek kond mindeningamb.

<sup>45</sup>“Pen bi woṅg nup giningamb ak, biyomb yand ak kasek ma winingamb aṅgiy, biynimb woṅg giñiningambay gunap kuyip tapin pikiy, tap ñimbay, ñiṅ kilis ñimbay, sakiy ay gi mindakniṅ, <sup>46</sup>biyomb nuk ak kasek ma winingamb aṅgiy niṅningamb ñin ak apiy, nup timey yimb giy, biynimb minim nup ma niṅiy, am mindpay kind ak aṅyokningamb.

<sup>47</sup>“Biyomb ak apiy mey, minim nuk aṅgak ak niṅrep giy, kindik ma gipay biynimb gok kuyip, yiwur yomb yimb rek ñiningamb. <sup>48</sup>Biynimb minim nup nind ma niṅiy, timey giningambay gok kuyip, yiwur siskoy rek ñiningamb. Pen ar kun ak rek, bi bap nimbip tap yomb ñiy, pen kun ak rek ñim aṅgningamb. Pen tap kuṅaynep di ñin ar nimbip ak ayek, direp ma geniṅgambim, apiy nimbip minim yomb yimb ak aṅgningamb.

### **Gunap Jiysis Nup Ma Diy Asik Key Ayingambay**

*(Mat 10:34-36)*

<sup>49</sup>“Yand opiyn ak, man ar biy sup puṅg aṅgiyning opiyn. Okok maṅgiysek yinbikop ak tep! <sup>50</sup>Yiwur yomb diningayn ak, yip miker yimb gisap. Kun ak pisnep di den mey, yip tep giningamb!

<sup>51</sup>“Yip aŋgningambim, biynimb di jimñining gisap aŋgningambim ak pen; yand opiyn rek, gos ar keykey niñiy, asik keykey ayniŋgambay.

<sup>52</sup>“Miñiy ñin biy tikiy, amyong apyong onep mamind rek mindeniŋgambay ak; omiŋal nokom yip dey, omiŋal yip ma diy, asik keykey ayniŋgambay. Pen mer ak: omiŋal yip der, omiŋal nokom yip ma diy, asik keykey ayniŋgambay. <sup>53</sup>Bi apiymiŋay ak, ñinuk akan nop, yip ma dek mey, asik keykey ayniŋgayr. Biyn amiymiŋay ak, panuk akan nonim, yip ma dek mey; asik keykey ayniŋgayr. Nonim yip, ñinuk biyn ak yip kunep: nonim akan, ñinuk biyn ak yip ma dek mey, asik keykey ayniŋgayr aŋgak.”

**Bi Kiyŋ Yomb Key Yimb Ak Wip Aŋgiy Ma Niŋyak**  
(*Mat 16:2-3; Mak 8:11-13*)

<sup>54</sup>Pen Jiysis minim bap sek kuyip aŋgak, “Pumb paŋind amimb okok ken semb ayek niñiy, miñiy miñmon pikniŋ gisap aŋgiy niŋmindem, apim rek nep gip. <sup>55</sup>Pinim yomb ak akyim ken apek niñiy, miñiy pumb yomb giniŋ gisap aŋgem, apim rek nep gip. <sup>56</sup>Tap semb ar biyong niŋrep giy; man ar biy niŋrep giy gipim ak pen, yenen ñin yomb kond mindyiŋgipim ak, miñiy wip biy ma niŋbim?”

**Minim Yomb Mindip Rek Gor Yip Tunŋasik Ayrep Ginjun**  
(*Mat 5:25-26*)

<sup>57</sup>“Pen yenen, Gor kinjeŋ tep ar niŋrep giy dinimimb ak mindakniŋ, tap yesek ar gok apun rek gip aŋgiy niŋbim?”

<sup>58</sup>“Pen bi bap nimbip kor dand amjiŋpiyn aŋgek, kor yomb kun ak yenen amjipun aŋgiy, kinjeŋnamb okok amyiŋ, nund yip minim aŋ tunŋasik ayrep ginimimb. Pen mer ak, nimbip pisnep dam biyomb kor niŋimb ñin ar ak yokek, nuk pen di poliys ñin ar ak ayek, nimbip dam kalambis ayniŋgamb. <sup>59</sup>Kun ak nimbip aspiyn; kalambis kun ak mindnep mindeniŋgambim. Tap day nimbik gok pisnep day paŋg diy nep, mis amniŋgambim aŋgak.”

**13** <sup>1</sup>Won kun ak nep, biynimb gunap ap, Jiysis nup kesim diy aŋgyak, “Galiyliy biynimb gunap ap Gor aŋgniŋep korip ak, tap simboŋ ñiyakniŋ, gapman biyomb Paylat kuyip pisnep pikayamb, likaŋ kuyip yowip, meymey siypsiyp pikayey likaŋ yowip namb siŋak aŋgyak.”

<sup>2</sup>Aŋgeyak, Jiysis kuyip aŋgak, “Galiyliy biynimb kun gok, tap siy tap timey key yimb geyak, kuyip kun gip aŋgiy niŋbim? <sup>3</sup>Ak mer! Pen niŋim! Tap siy tap timey gipim gok, yenen kun gipun aŋgiy ma kirgeniŋgambim, maŋgiysek kun ak rek nep kumniŋgambim.

<sup>4</sup>“Pen miñmon Saylom, korip paryomb yiy akyong giyak ak paŋg apyapiy, biynimb onep kaŋgol pis ak kuyip pikayak ak niŋbim. Pen nimb aŋgningambim, ‘Jerusalem biynimb gunap tap siy tap timey giyak rek

mer; kiyk tap siy tap timey yomb yimb ak gey, Gor gek korip kun ak paŋg apyapiy, kuyip pikayak aŋgningambim.’ <sup>5</sup>Pen ak kunep mer! Nimbip niŋind yimb aspiyn. Nimb maŋgiysek tap siy tap timey gipim gok, yenen kun gipun aŋgiy ma kirginingambim ak; maŋgiysek kumyak kun ak rek nep kumningambim aŋgak.”

### **Mon Bind Maŋgiy Ma Piyp Ak Paydoŋ Ayak**

<sup>6</sup>Pen Jiysis minim bap paydoŋ ay aŋgak, “Bi bap kiyaw maŋgiy ak piyan aŋgiy, yiŋ ak jiw dand apiy, miŋ wayn woŋg namb nuk ak yimningamb. Kisen andkind apiy niŋningamb; maŋgiy ma nep piyeningamb, <sup>7</sup>bi woŋg nup giŋiningamb ak nup aŋgningamb, ‘Simiy nokom nokom yinakniŋ, per apiy niŋbiyn; kiyaw yimnik ak, maŋgiy niŋemb ak ma nep piyp. Kun ak woŋgday namb yip ak mindek tep ma gip. Timb yokninin aŋgningamb.’

<sup>8</sup>“Aŋgek, bi woŋg nup giningamb ak aŋgningamb, ‘Biyomb. Kiyaw kun ak miŋiy ma timb yokep. Yand kiyaw kiŋiŋ kun ak kipil gi tep giy, tap kaskas gunap dap ayen, <sup>9</sup>simiy andikiy ak maŋgiy piyek kirginimin; pen ma piyek, niŋ kun ak timb yokninin aŋgningamb’ aŋgak.”

### **Biyn Kund Niŋgak Ak Yipund Gak**

<sup>10</sup>Pen Jiwda lotiw niŋ bap, Jiysis Jiwda nan-gep korip miŋgan ak amiy, kuyip minim aŋgŋi mindek. <sup>11</sup>Korip miŋgan kun ak, biyn kichekiy gek, kund niŋgiy nep taŋgek taŋgek, simiy yin kaŋgol piskind ayak ak, ap mindek. <sup>12</sup>Jiysis biyn kun anup, aŋgek apek aŋgak, “Tap nip gip ak suŋ ayip aŋgak.” <sup>13</sup>Kun aŋgiy, nup diniŋakniŋ, kund ak yipund gek, Gor nup yimb ak dand aranak.

<sup>14</sup>Pen Jiwda lotiw niŋ ak, gek suŋ ayak ak niŋiy, biyomb Jiwda nan-gep korip kond mindek ak nup miluk yapek, biynimb ap mindeyak gok kuyip aŋgak, “Nimbip biynimb tap gip gok, woŋg niŋ onep kaŋgol ak mindip; apem gek suŋ aynimuŋ. Miŋiy niŋ biy lotiw niŋ ak pen, kun gispim aŋgak.”

<sup>15-16</sup>Aŋgek, Jiysis aŋgak, “Kanj kaw, doŋgiy nimb gok tiwning ayem mindeningamb ak, lotiw niŋ ak niŋ nen gek, kuyip simb niŋiy miŋ wisikiy, dand amem niŋg niŋningambay akaŋ mer? Pen basind yes chin Ebrahim tikek, tik dand amiy tikpay paŋ biy, Seytan nup wosrey tiwningayek, simiy yin kaŋgol piskind ayip ak, nup simb ma niŋbim? Miŋiy lotiw niŋ biy, miŋ nup ayip ak tuŋgasiken, minim yomb aspim? Kun ak tom yimb gipim aŋgak.”

<sup>17</sup>Jiysis kun aŋgek, bi nup miluk niŋyak gok, kuyip nambiŋ yimb gak. Pen biynimb yikop gok, Jiysis tap mageprek giyŋgip rek niŋiy, miŋmiŋ yimb giyak.

### **Mon Mastet Maŋgiy Ak Paydoŋ Ay Aŋgak**

*(Mat 13:31-33; Mak 4:30-32)*

<sup>18</sup>Jiysis minim bap sek aŋgiy aŋgak, “Gor biynimb diy kond mindeningamb minim aŋgning gispiyn ak, yergiy rek aŋgen niŋrep yimb

giningambim? <sup>19</sup>Mey minim ar angning gispiyn biy rek mindip. Bi bap mon mastet mangiy ak, di wonyday nuk ak yimek, jak yomb giy, alik tep ak pikek, yakir gok ap ay mindeningambay angak.”

<sup>20</sup>Minim bap pen tip ak angak, “Gor biynimb diy kond mindeningamb minim ak, yergiy angen niñrep giningambim? <sup>21</sup>Ar kun ak rek, biyn gok yiys ak sikoy band bap diy, palaw tiyn yomb ak sek, tungandik mandik gey, mindyng yomb yimb tanimb rek ak giningamb angak.”

### **Kinjeñrumb Sikoy Ak**

*(Mat 7:13-14, 21-23)*

<sup>22</sup>Pen Jiysis Jerusalem amning, yipund giy ma amnak. Nuk miñmon dawin yomb okok sek, miñmon sikoy okok sek namb namb kinying, minim angñek amnak. <sup>23</sup>Biynimb kun okok mindeyak gok, bap Jiysis nup angak, “Gor biynimb gunap nep dingingamb?”

Angkek, kuyip angak, <sup>24</sup>“Kun ak nimbip aspiyn, nimb kilis giy nep, kinjeñrumb sikoy tam ak amningambim. Biynimb kuñay yimb nep, korip miñgan amnun anggiy, gi mer niñningambay. <sup>25</sup>Yenen, bi korip nop nimb ak kinjeñ giñek, nimb mis okok nep mindiy, pik giygiw giyng angningambim, ‘Biyomb! Kinjeñ ak yikan angem,’ nuk angningamb, ‘Nimb akay nimb? Yand nimbip ma niñbiyn’ angningamb.”

<sup>26</sup>“Angkek, nimb pen angningambim, ‘Nind miñmon chinup ak, ap minim angñinakniñ, nand yip tap niñnuk angem,’ <sup>27</sup>nimbip tip ak angningamb, ‘Yand nimbip ma niñbiyn. Nimb akay nimb? Nimb biynimb tap siy tap timey nep gipim ak, kinjeñ ma yikningayn! Amnimimb’ angningamb.”

<sup>28</sup>“Kun ak kisen Ebrahim, Aysek, Jekop, bi Gor minim angep gok, Gor ñin ar ak mindyakniñ, nimbip pen ang mis yokek, siy anggying, meñ siwbirik mindeningambim. <sup>29</sup>Pen biynimb Jiwda mer gok, gunap pumb lim gip okok ken apiy; gunap pañind amimb okok ken apiy, gunap akdoñ nimb apiy, gunap akdoñ nimb apiy, Gor biynimb diy kond mindeningamb namb ak apiy, jimñiy tap yomb niñningambay.

<sup>30</sup>“Kun ak, biynimb nind opay gok, kasek amnun anggiy gos ak ma niñey, biynimb kisenimb gok apiy, kuyip tawsak ay nind amningambay angak.”

### **Jiysis Jerusalem Simb Niñak**

*(Mat 23:37-39)*

<sup>31</sup>Won kun siñak nep bi Peresiy gunap apiy, Jiysis nup angyak, “Gapman biyomb Herot nip pikayning gisap ak, miñmon biy kirgiy, miñmon bap key amnin angyak.”

<sup>32</sup>Anggyak angak, “Nimb am kayn ayndik kun ak nup angem, niñmindonimuy. Miñiy sek, toy sek biynimb tap gip gok gen suñ ay,

biynimb kichekiy malñiluk ambañ ayip gok, gen biynimb yimb ay giniñgamb. Menik mey, Jerusalem amiñ, woñg yand ak gi diniñgayn.

<sup>33</sup>“Pen miñiy ñin kaw biy, Gor woñg yip aᅅgak anep gi mindeniñgayn. Jerusalem amen yip pikayniñgambay. Bi Gor minim aᅅgep gok kuyip, per miñmon gunap ma pikaypay; Jerusalem nep pikaypay. <sup>34</sup>Jerusalem! Jerusalem! Gor, bi minim nup aᅅgep nimbip ker yokip gok, yenen per kamb diy pikaypim! Per biynimb nimbip gok kakaruk ñiluk rek, pil beñ okok ayin aᅅgen, yip yiruk niñiy ma dipim! <sup>35</sup>Kun ak niñim; Gor aᅅgniñep korip yomb nimbik ak, yikop yimb mindeniñgamb. Yip ma niñniñgambim. Kisen, bi Gor chinup nen aᅅgyokek asaw ak, tep yimb asaw aᅅgniñgambim ñin ak nep, yip niñniñgambim aᅅgak.”

### Jiysis Bi Ñin Tomb Siw Gak Ak Gek, Suñ Ayak

**14** <sup>1</sup>Jiwda lotiw ñin bap, Jiysis am, Peresiy biyomb bap korip ak tap ñiñakniñ, nuk yerip rek ginimuñ aᅅgiy, niñyinjsek ay mindeyak. <sup>2</sup>Yenen: ñin kun ak, bi ñin tomb siw gak bap ap mindek. <sup>3</sup>Jiysis bi kun anup niñiy, bi Peresiy gok sek, bi low tiysa gok sek kuyip aᅅgak, “Bi tap gip gok, lotiw ñin ak gon suñ aynimuñ akañ, mer?” <sup>4</sup>Aᅅgek, minim bap pen ma yimb aᅅgeyak; nuk bi ñin tomb siw gak anup, diniñek suñ ayek, aᅅgyokiyñg, <sup>5</sup>bi kun gok kuyip aᅅgak, “Ñapan nimb bap akañ; makaw nimb bap, lotiw ñin ak ñiñg malpim kaw miñgan ak amek, nimb simb ma niñiy, ma diyokniñgambim?” <sup>6</sup>Aᅅgek, kiyk pen minim bap ma aᅅgyak.

### Yimb Yomb Mindenñ Aᅅgiy Gos Ak Ma Niñnimimb

<sup>7</sup>Pen bi kun gok tap ñiñniñg, cheya ar tep tep gok nep bisgey amnakniñ, Jiysis minim bap paydoñ ay aᅅgak, <sup>8</sup>“Bi bap biyn diniñg giy, tap yomb ñiñniñg nimbip suk aᅅgek amiñ, cheya tep aynimuñ ar ak, ma bisginimimb. Bi kun ak nuk, biyomb yimb bap apiy bisgañ aᅅgiy, aynimuñ rek ayniñgamb. <sup>9</sup>Kun ak nimb ar kun ak bisgeniñgambim, bi nimbip suk aᅅgniñgamb ak apiy aᅅgniñgamb, ‘Nimb key siñak amem, biyomb biy bisgañ aᅅgek,’ nimbip nambiñ gakniñ, am gol okok bisginiñgambim.

<sup>10</sup>“Pen nimbip tap ñiñun aᅅgiy suk aᅅgeniñgiy, amiñ gol okok bisiñg mindem mey, bi nimbip suk aᅅgniñgamb ak apiy aᅅgnimuñ, ‘Bunᅅgiy sikop. Nimb apiy cheya tep ar biy bisgim aᅅgek,’ biynimb tap ñiñniñg ap mindeniñgambay gok nimbip niñiy, bi gok namb biy biyomb mindpay aᅅgniñgambay.

<sup>11</sup>Kun ak rek, biynimb chin yimb yomb mindip aᅅgiy niñbay gok, Gor niñek yimb kuyip apyowniñgamb. Pen biynimb, Gor Biyomb yimb mindip aᅅgiy siskoy diy mindpay gok, Gor yimb kuyip gek araniñgamb aᅅgak.”

<sup>12</sup>Jiysis minim kun ak aᅅgiy, bi tap yomb ñiñniñg, biynimb suk aᅅgak ak nup aᅅgak, “Nand tap yomb ñiñniñg; namam nak gok, bunᅅgiy nak



gok, biynimb miñmon nak jimñiy gok, bi maniy kuñay mindeningamb gok kuyip nep suk ma aņgnimin. Biynimb kun gok rek, nip pen ambey ñiningambay. <sup>13</sup>Tap yomb ñiņning; biynimb yimgeprek gok, biynimb ñin tomb paņg pikek amdip gok, biynimb windin koy gok, biynimb ñin tomb timey gip gok kuyip suk aņgey apiy; tap ñiņnimimb.

<sup>14</sup>“Biynimb simbgeprek kun gok, nip pen ñiņņiy rek ma ayniņgamb ak mey; kisen Gor biynimb suņ-tep nuk gok, gek tikjakningambay ñin ak, nip pen ñiņiņgamb aņgak.”

### Tap Yomb Ñiņningambay Ak Paydoņ Ayak

(Mat 22:1-10)

<sup>15</sup>Pen minim kun ak niņiy, bi kiy yip tap ñimbek bap, Jiysis nup aņgak, “Gor biynimb nuk diy kond mindeningamb gok, nuk yip jimñiy tap yomb ñiņningambay rek, miñmiñ yimb giniņgambay aņgak.”

<sup>16</sup>Aņgek, Jiysis aņgak, “Bi bap tap yomb ñiņning, biynimb kuñaynep suk aņgningamb. <sup>17</sup>Pen tap yomb ñiņemb ñin kun ak apeniņgamb, bi nup woņg giñiņingamb ak nup aņgyokiy aņgningamb, ‘Miñiy am biynimb aņgaypiyn gok kuyip am poņind wan aņgek,’ amiy aņgningamb, ‘Tap maņgiysek dap nan-gip nen, apem amnun aņgningamb.’

<sup>18</sup>“Aņgek, biynimb kun gok bap aņgningamb, ‘Yand amnim ak pen; mankumb bap tawpiyn ak, niņning amjipiyn aņgningamb.’

<sup>19</sup>“Bap aņgningamb, ‘Amnim ak pen; woņg giyaņ aņgiy, makaw anep wanjrem tawpiyn ak, woņg girep giniņgiy akan aņgiy, tiwning diniņning amjipiyn aņgningamb.’

<sup>20</sup>“Bap aņgningamb, ‘Amnim ak pen, biyn yand ak kisen nep dipiyn aņgningamb.’

<sup>21</sup>“Kun aņgey, bi kun ak andkind amiy biyomb nuk anup aņgningamb, ‘Biyomb! Biynimb apan gok am aņgen, kiyk kun kun apay.’ Aņgek, biyomb ak simbwur nup ak timey gek, binuk kun anup, tip ak dawin yomb kun okok aņgyokiy aņgningamb, ‘Nand kasek kinjeņ tam yomb okok sek, kinjeņ tam sikoy okok sek amyiņ; biynimb simbgeprek gok diy, biynimb ñin tomb beņ beņ gip gok diy, biynimb windin koy gip gok diy, mumbwak mind tep ma gip gok diy, dand winimin aņgningamb.’

<sup>22</sup>“Aņgek, aņgningamb rek giy, kisen bi woņg giñemb kun ak aņgningamb, ‘Biyomb. Apan rek kisen gipiyn ak pen; wikan gunap tip anep mindip aņgningamb.’

<sup>23</sup>“Aņgek, biyomb ak bi kun ak nup, miñmon yikop okok aņgyokiy aņgningamb, ‘Kinjeņ tam yomb okok sek, kinjeņ tam sikoy okok sek amiy, biynimb kuñay yimb dand apey, korip miņgan yip ak pisnep timbik dinimuņ. <sup>24</sup>Pen biynimb nind suk aņgen ma opay gok, tap yip siskoy gunap ma ñiņningambay. Mer yimb aņgningamb’ aņgak.”

**Gos Niņrep Giy Yip Ker Winimimb Angak**  
(*Mat 10:37-38*)

<sup>25</sup> Jiysis kun aņgiy amnakniņ, biynimb kuņay yimb nep, nup kisen giyakniņ, nuk andikiy kuyip angak, <sup>26</sup> “Biynimb gok yip ker winiņgambay ak pen, gos yomb kiyk amniņgamb; nop, nonim, nunay, numam, biyn, ņapan kiyk, akaņ mumbwak kiyk key ak; yand niņen biynimb yand mindeniņgiy rek ma ayip.

<sup>27</sup> “Biynimb gunap aņgniņgambay, Jiysis biynimb nuk mindenjun ak pen; kun gon, biynimb gunap chinup timey giniņgiy rek ayip aņgiy, mumbwak kiyk keynep gos niņyiņg mindeniņgambay ak, kuyip ma diniņgayn.

<sup>28</sup> “Pen bi nimb bap, korip yomb bap giniņg, maniy ak yerip yerip diy ginim aņgiy, gos ak niņrep giy ginimuņ. <sup>29</sup> Pen giyn giyn aņgiy, simen ak nind nep giniņgamb ak pen, korip par kun ak sisak gek, biynimb gok nup aņgjiwiy aņgniņgambay, <sup>30</sup> ‘Bi par ak korip giniņg rek gi dand amiy, day sek kirgip aņgniņgambay.’

<sup>31</sup> “Pen kun ak rek, bi bap, biyomb bap yip penpen giniņg; gos niņ-tep giy amnimuņ. Gos niņdand amiy, amiybi yand ak ten tawsin nep mindip; biyomb kun ak amiybi nuk tiwendiy tawsin mindip; penpen giy, yip ņaņg aynimuņ rek ayip aņgiy mey, <sup>32</sup> par okok kisen owakniņ, minim ak yokiy aņgniņgamb, ‘Minim aņg jimniņjur aņgniņgamb.’

<sup>33</sup> “Kun ak niņrep ginimimb. Tap nimb gok nep wasemb ay, biynimb nimb gok nep wasemb ay giniņgambim ak, biynimb yand ma mindeniņgambim.

**Sol Minim Ak Paydoņ Ayak**

<sup>34</sup> “Sol tap yindik tep yimb ak pen; yindik nuk ak amek, yergiy gey tip ak yindik giniņgamb? <sup>35</sup> Sol kun ak rek, di wongday ak ayey, timey giniņgamb. Kun ak wong nuk bap ma mindip; diyokep rek nep ayip. Minim kun ak, biynimb gos timund sek ak tikniņnimimb aņgak”

**Siypsiyp ņiluk Kurgak**  
(*Mat 18:12-14*)

**15** <sup>1</sup> Biynimb tap siy tap timey giyak gok sek, bi takes dep gok sek Jiysis minim asap ak niņun aņgiy, ap niņmindeyak. <sup>2</sup> Pen bi Peresiy gok sek, bi low tiysa gok sek Jiysis nup, aņgjiwiy aņgyak, “Nuk yenen bi tap siy dep gok yip, bi takes diyiņg maniy yesek gunap dipay gok yip, per tap jimniņy niņimb aņgyak.”

<sup>3</sup> Kun aņgey, Jiysis niņiy, minim bap kuyip paydoņ ay angak, <sup>4</sup> “Bi nimb bap, kanj siypsiyp niņ jiwiy onep mamind ak mok mindeniņgamb. Pen nokom bap kurgak, gunap dam wikan bap ayek, tap kaskas

ñinyakniŋ, kanj nuk kurginiŋgamb ak, mapin piŋiyñiy nep ayek, piyowek amniŋgamb. Am piyow giranŋrang niŋiy, <sup>5</sup>nup tep yimb gakniŋ, di wanjrem ar ak ay dand korip winiŋgamb. Dand apiy, <sup>6</sup>bunŋiy nuk gok kuyip suk anŋiy, biynimb miñmon nuk yip jimñiy gok kuyip suk anŋiy gek, ap nan-gey anŋniŋgamb, ‘Kanj yand kurgip ak piyow niŋiy dipiyn nen; maŋgiysek apem miñmiñ gun anŋniŋgamb.’

<sup>7</sup>“Kun ak rek, Gor biynimb nuk kuŋaynep suŋ-tep rek ayiŋgamb ak pen; gos nuk ak amniŋgamb biynimb minim nup timbrikiy, pisnep kumjun rek ayip anŋiy, niŋniŋgambay gok. Kun ak mey, bap nup ker apek, enjol nuk gok yip miñmiñ yimb giniŋgambay.

### Maniy Maŋgiy Kurgak

<sup>8</sup>“Akaŋ pen, biyn bap maniy maŋgiy nuk onep wanjrem ak mindeniŋgamb. Pen won bap, korip miŋgan okok kapkap yapeniŋgamb, nuk yerginiŋgamb? Nuk lam danŋiy ay, tap day day liŋ liŋ, maniy nuk won kun ak niŋiy dek, <sup>9</sup>nup tep yimb gakniŋ, bunŋiy nuk gok kuyip, maŋgiysek suk anŋek ap nan-gey anŋniŋgamb, ‘Maniy yowip won ak piyow niŋbiyn nen, maŋgiysek apem miñmiñ gun anŋniŋgamb.’

<sup>10</sup>“Kun ak rek, Gor biynimb nup kirpay gok kuyip giniŋgamb. Biynimb nup kirpay kun gok, bap gos kisenimb niŋiy, nup deniŋgamb, nuk enjol nuk gok yip miñmiñ yimb giniŋgambay anŋak.”

### Ñi Ak Nop Nup Kiriŋ Amnak

<sup>11</sup>Jiysis kun anŋiy anŋak, “Bi bap ñi omiŋal tikniŋgamb. <sup>12</sup>Ñinuk kisen ak, ap nop nup anŋniŋgamb, ‘Bapiy. Tap chirupmiŋay apan gok, pikasik yip gok key ñan anŋek,’ nop tap kuyipmiŋay gok pikasik keykey ñiniŋgamb. <sup>13</sup>Ñek, ñinuk kisen ak permindiy mer, nop tap pikasik ñiniŋgamb gok yokiy maniy diy, dand miñmon paryomb okok amniŋgamb. Am kun okok mindiy, biyn siy tap timey okok giyiŋg, maniy dand amniŋgamb gok, maŋgiysek giñimb diniŋgamb.

<sup>14</sup>“Kun giy ñimbdeniŋgamb, yiwan yomb yimb ak winiŋgamb miñmon kun ak. Maniy diy, tap taw ñiŋnimuŋ rek bap, ma yimb mindeniŋgamb. <sup>15</sup>Kun gek, am bi miñmon nop nimb, kun ak nimb bap anŋniŋgek, nup kanj woŋg ak anŋayniŋgamb. <sup>16</sup>Pen nup yiwan yomb yimb ak ginep mindek mindek, kanj mokniŋgambay tap day gok gunap, ñiŋnimuŋ rek ayiŋgamb ak pen; biynimb gunap, nup tap keñmaŋgiy ma ñiniŋgambay.

<sup>17</sup>“Pen kisen, gos nuk ak asik ayek anŋniŋgamb, ‘Bapiy bi nup woŋg giñimbay gok, keñmaŋgiy kuŋay mindip. Yand biy minden, yiwan yomb yimb ak gip. <sup>18</sup>Bapiy mindip ak tip andkind amiy, nup anŋniŋgayn, “Windin yirik ar nip ak timey giy, Gor windin yirik ar ak timey giy gipiyn rek, <sup>19</sup>yip ñiyand ma anŋnimin. Bi woŋg nip giñemb yikop rek bap, anŋayey mindenim, anŋniŋgayn” anŋniŋgamb.’

20 “Kun angyi, sanjningamb. Am am, nop mindeningamb sijak maŋ maŋ gakniŋ, nop ñinuk nup parchim niŋek, simb timey yimb gek, kasek am nup di kaykol gakniŋ, 21 angningamb, ‘Bapiy. Gor windin yirik ar ak timey giy, windin yirik ar nip ak timey giy gipiyn rek, yip “Ñiyand” ma angnimin angningamb.’

22-24 “Nop pen, bi woŋg nup giñiningambay gok kuyip angningamb, ‘Ñiyand ak pisnep kurgiy kumak rek ayak ak pen; miñiy niŋsipiyn. Nup chech paryomb ak ayñiy, ñin riŋ ayñiy, tomb tirup ayñiy ginimimb. Kun giy, am makaw ñiluk tep yimb bap pik dand apem, danŋiy ñimbyiŋg, miñmiñ ginjun angningamb.’ Angek, angningamb rek giy, keñmangiy danŋiy ñimbyiŋg, miñmiñ giningambay.

25 “Pen ñinuk nind ak, woŋgday okok giranŋiy, andkind yep korip maŋ sijak apiy niŋningamb; giyta pikiy, miñmiñ giyiŋg geniŋgambay. 26 Kun gey niŋiy, bi nop nup woŋg giñemb bap nup angniy angningamb, ‘Yergispay?’ 27 Angek angningamb, ‘Namam kisen kumimb angyi niŋbun ak pen; miñiy andkind apek, nap makaw ñiluk tep yimb bap, pik danŋiy ñimbyiŋg, miñmiñ gispay angningamb.’

28 “Angek, nup miluk timey yimb yapek, korip miŋgan ma yimb amningamb; mis akyan nep mindeningamb. Nop pen mis apiy, ‘Korip miŋgan wan angyi’ nup minim sisayn angek, 29 ñinuk angningamb, ‘Yand minim apan rek kindik giy, bi yikop woŋg giñimbay rek ak mindiy, woŋg nip ak per gen gen, simiy kuŋay yimb nep yinimb. Pen yip meymey ñiluk bap ñey, buŋgiy yand gok yip pik danŋiy ñimbyiŋg, miñmiñ ma gipun. 30 Ñinak kun ak, tap bilok ñinak gok dam biyn siy, tap okok giy, ñimbdiy apek, nup simb niŋiy, makaw ñiluk tep yimb ak pikpan angningamb.’

31 “Kun angek, nop ñinuk nup angningamb, ‘Chirapiy per mindpur rek, tap yand gok manŋiysek nak diniŋgamban. 32 Namam kisen kumimb rek ayak ak pen; miñiy tip ak apek yimb niŋiy mey, miñmiñ gispun angningamb’ angak.”

### Kisen Yergiy Rek Mindeningambim Gos Ak Niŋnimimb

**16** 1 Jiysis binuk gok kuyip angak, “Biyomb tap nuk kuŋay mindeningamb bap, bi kond mindep nuk bap angayek, tap nup gok kond mindeningamb. Pen biyomb ak, minim bap niŋningamb; bi tap nup kond mindeningamb ak, tap nup gok monmon giniŋgamb. 2 Kun ak niŋiy, nup suk angek apek angningamb, ‘Tap yip kond mind tep ma gipan ak, yip anŋñey niŋbiyn. Kun ak nand am, tap yand yerip yerip mindip gok ñin paŋg tep giy; biynimb okok kuyip, tap day yand yerip yerip mindip gok ñin paŋg tep giy, ap yip anŋñinimin. Pen woŋg yip ak kisen ma giniŋgamban angningamb.’

3 “Angek, bi tap nup kond mindep kun ak, namb nuk okok nep gos kuŋay niŋiy angningamb, ‘Biyomb ak yip angyoksap rek yerginim? Yand

bi kilis ma mindpiyn ak, man piñiy pañgnim rek ma ayip. Biynimb gunap tap kuyip ak asimb aṅñimben, yip nambiñ giniṅgamb aṅñiṅgamb.’

<sup>4</sup>Pen kisen gosimb niñrep giy aṅñiṅgamb, ‘Yerginim ak niñsiypiyn. Ar kun ak gen biyomb ak yip aṅyokek, biynimb gunap yip dey, korip kiy ak kin mindeniṅgayn aṅñiṅgamb.’

<sup>5</sup>“Kun aṅgiy, biyomb nuk ak biynimb gunap kuyip, tap day mindeniṅgamb gok suk aṅgek, bi nind winiṅgamb anup aṅñiṅgamb, ‘Biyomb yand ak, tap day nuk nip yerip yerip mindip?’ <sup>6</sup>Aṅgek, ‘Wel diram ñin jiwiy onep kaṅgol ak aṅñiṅgamb.’ Aṅgek aṅñiṅgamb, ‘Tiker biy diy, kasek ñin jiwiy omiṅal nokom nep tikan aṅñiṅgamb.’ Aṅgek, aṅñiṅgamb rek giniṅgamb.

<sup>7</sup>“Kisen bi bap apek aṅñiṅgamb, ‘Biyomb yand ak, tap day nuk nip yerip yerip mindip?’ Aṅgek, ‘Wan tawsin rays bek aṅñiṅgamb.’ Aṅgek aṅñiṅgamb, ‘Tiker biy diy, kasek eyit handret nep tiknimin aṅñiṅgamb.’ Aṅgek, aṅñiṅgamb rek giniṅgamb.

<sup>8</sup>“Kun gek, kisen biyomb ak niñiy aṅñiṅgamb, ‘Bi tap yip kond mindep ak, yerer giy mindrep giniṅgamb ak, niñrep gip aṅñiṅgamb.’

“Kun ak niñim: Biynimb yikop gok apay, ‘Miñiy yergiy gon, kisen bisgep chin ak mindeniṅgamb aṅgiy’ gos ak niñyiṅg, gey amimb. Pen biynimb Gor ker mindpay gok, kun rek gey ambikop ak tep. <sup>9</sup>Maniy tap yerip man ar biy mindip gok, biynimb yimgeprek gok kuyip simb niñiy ñem mey; kisen tap kun gok pisnep kurginiṅgamb ñin ak, kinjeṅ tep nimb ak mindeniṅgamb.

<sup>10</sup>Tap sikoy bap, biynimb gunap kuyip ñin ar ak ayey, direp ma giniṅgambay ak; tap yomb bap ñey, kunep giniṅgambay. Pen tap sikoy bap, di ñin ar kuyip ayey, direp giniṅgambay ak; tap yomb gok ñey, kunep giniṅgambay. <sup>11</sup>Pen nimb taprep lum ar biy diyiṅg, niñrep giy ma geniṅgambim; an nimbip gek perper mindeniṅgambim. <sup>12</sup>Biyomb ak tap nuk, pen ñin ar nimbip ayek, direp ma geniṅgambim, gos yerip niñiy, tip tep miñmon nuk biyoṅ ak nimbip aṅñiṅgamb.

<sup>13</sup>“Bi nokom bap, biyomb omiṅal kuyip woṅg giñinimuy rek ma ayip. Yenen: nuk biyomb bap nup niñek tep geniṅgamb, biyomb bap nup kirginiṅgamb. Akaṅ biyomb bap nup niñek tep geniṅgamb; bap nup kirginiṅgamb. Kun ak, nimb maniy tap yikop gok, tap tep yimb aṅgiy, Gor nup kirginimimb rek ayip ak; niñrep ginimimb aṅgak.”

<sup>14</sup>Bi Peresiy gok, gosimb yomb kiyk maniy ar ak nep niñyiṅgipay ak mey, Jiysis minim aṅgak kun ak niñiy, aṅgiwyak. <sup>15</sup>Aṅgiweyak, kuyip aṅgak, “Tap biynimb niñey tep gip gok, Gor niñek tap yikop rek ayip. Nimb biynimb windin yirik ar ak, chin biynimb tep mindpun apim ak pen; Gor namb nimbip biyaṅ niñimb.

<sup>16</sup>“Pen Jon bi ñiṅg pikñemb ma mindek ñin ak, biynimb gok Mosis low minim tikak ak sek, bi Gor minim aṅgep gunap minim tikyak ak sek niñiy,

ar kun ak gey amyinḡip. Pen miñiy, Jon apiy, minim tep Gor biynimb diy kond mindeniḡamb ak aḡgek niñiy, biynimb maḡgiyseḡ ar kun ak nep amnun aḡgiy, gey amḡap. <sup>17</sup>Pen semb biyoḡ sek, mankumb biy sek kurginiḡamb rek ayip: Gor low minim ar ak, kurginimuḡ rek ma mindip.

<sup>18</sup>“Kun ak bi biyn diy kirgiy, am biyn kisenimb bap dipay gok, timey gipay. Pen bi an tikjakiy, biyn bi diy kirgak bap nup diniḡamb ak; kunep timey giniḡamb.

### Maniy Bi Ak Yip Lasaras Yip

<sup>19</sup>“Bi bap maniy tap nuk kuḡay yimb mindyiḡip. Nuk chech teprep yimb gok nep yimiy, tap ñiñemb teprep gok nep ñimbyiḡip. <sup>20</sup>Pen korip kinjeḡrumb gol nuk siḡak, bi soy sek tap ma mindek bap, dap ayey mindyiḡip. Yimb nuk Lasaras. <sup>21</sup>Gosimb nuk ak, yand bi tap kuḡay mindip biy tap ñimbek, day day boḡ molik okok yowniḡamb gok ñimben mey, yip yiwand ma giniḡamb aḡgiyiḡip. Pen kayn gok apiy, soy nup gok bileḡ ñimbyiḡipay.

<sup>22</sup>“Kindik, bi maniy tap nuk ma mindyiḡip kun ak kumek, enjol gok ap nup dand Gor miñmon biyoḡ amiy, Ebrahim yip ayak. Bi maniy tap nuk kuḡay mindyiḡip ak, kunep kumek komyakniḡ, <sup>23</sup>am mon key yinḡap ak, yiwur yomb yimb gakniḡ mindyiḡip. Pen mindiy, kiyonḡiy niḡak: Ebrahim, Lasaras yip keykey siḡbiyoḡ minderik. <sup>24</sup>Niñiy, suk aḡgiy aḡgak, ‘Bapiy Ebrahim. Yip simb niḡan. Lasaras nup aḡgey, ñin maḡgiy par nuk bap ñiḡ ak tawiy, dap alemb yip ak diniḡek, yip sayn gaḡ. Mon ak yiniy, yip yiwur timey yimb gip aḡgak.’

<sup>25</sup>“Aḡgek, Ebrahim aḡgak, ‘Ñi niḡan! Man ar biyaḡ mindenak ñin ak, nak tap tep gok nep dinak; Lasaras tap timey gok nep dak. Pen miñiy miñmon biy, nuk sayn tep mindakniḡ, nip yiwur yomb gisap. <sup>26</sup>Gor mol yomb yimb ak, namb biy gayak ak mey; chin biynimb pis biy, talakiy kayaḡ ak ma amniḡambun. Pen nimb pis kayaḡ ak talakiy, biy ma winiḡambim aḡgak.’

<sup>27</sup>“Aḡgek, bi kun ak aḡgak, ‘Kun apan ak, Lasaras nup aḡgey, bapiy korip amiy, <sup>28</sup>mam yand onep mamind ak kuyip, minim kilis yimb ak aḡgenimuḡ, miñmon yiwur pernep gip biy, ma winiḡiy aḡgak.’

<sup>29</sup>“Kun aḡgek, Ebrahim aḡgak, ‘Gor Mosis nup gos ñek, Baybol buk minim tikak ak sek, bi minim nup aḡgeḡ gunap kuyip gos, ñek Baybol buk tikyak minim ak sek mindip. Niḡniḡ, kun gok niḡniḡiy aḡgak.’

<sup>30</sup>“Aḡgek, maniy bi kun ak aḡgak, ‘Bapiy. Ak tep ma apan. Biynimb bap kumiḡ tikjakiy, am aḡgeniḡamb mey, niḡind aḡgip aḡgiy, tap siy tap timey gipay ar ak kirgiy, Gor nup nep gosimb niḡniḡambay aḡgak.’

<sup>31</sup>“Aḡgek, Ebrahim aḡgak, ‘Kiyk Mosis minim tikak ak ma niñiy, bi Gor minim aḡgeḡ gunap, minim tikyak ak ma niñiy gipay ak; bi bap kumiḡ tikjakiy, am aḡgek, kunep ma niḡniḡambay aḡgak.’ ”

**Tap Siy Tap Timey Giy Apyap Pikpay**  
(*Mat 18:6-7; Mak 9:42*)

**17** <sup>1</sup>Jiysis binuk gok kuyip anggak, “Biyn bap akan, bi bap miñ timey ar ak giy, biynimb gunap kuyip gos ñey, ar kun ak giy apyap pikpay ak; timey yimb gip. Miñ ar kun ak nind giyngipay, miñiy gipay, kisen kunep giningambay. Pen gipay kun ak rek, yiwur kun ak key yimb dingingambay. <sup>2</sup>Kiyk won kun sijak nep, gining giyakniñ, kuyip kamb yomb bap, kuñam ak sek miñ aybirikiy, dam ñing yokpiyap ak, kuyip tep gipyap. Yenen: kiyk kim mindiy, biynimb yip ker ñin tomb wos ma gip gunap, kuyip gey apyap pikningambay ak, yiwur yomb yimb dingingambay. <sup>3</sup>Kun ak nimb asik tep ginimimb.

Pen mam akan, ay bap tap siy tap timey gonimuñ, nup niñchikiy anggem, yenen kun gipiyn angiy niñonimuñ; niñiy kirginimimb. <sup>4</sup>Pen tap nimbip rek gunap timey giyng, yenen kun gipiyn angiy, ap angonimuñ, niñiy kirginimimb. Ñin nokom bap, kun gek gek onep ar ak rek amek, kunep niñiy kirginimimb anggak.”

**Gor Nup Gosimb Niñbay**

<sup>5</sup>Jiysis kun anggek, binuk gok angyak, “Chin key kun ginjun rek ma ayip; kuyip yiruk niñjun rek ayip. Kun ak nand gey, chin Gor nup gosimb nokom niñon, chinup kond mindakniñ, kun ginjun angyak.”

<sup>6</sup>Anggey, Jiysis kuyip anggak, “Pen Gor nup gosimb niñbim ak yomb mer: mon mastet mangiy achimb rek nep mindek; angningambim, ‘Mon biy junj sek jiwiy, ñing yomb namb siñbindoñ, jak mindey anggem,’ Gor angningambim rek nep giningamb.

**Bi Wong Giñemb**

<sup>7</sup>“Bi bap, bi wong giñemb nuk bap diy anggek, am man piñiy pañgiy akan, kanj siypsiyp gok mok tangiy, andkind korip apek, biyomb nuk ak, nup yerip angningamb? ‘Nip yiwon gip, kasek ap bisgiy tap niñan angningamb?’ <sup>8</sup>Mer! Kun ma angningamb. Nuk angningamb, ‘Chech ak dey apek, ler ak aybirikiy, ñing tap yip gok dapey ñimben, kisen ñing tap nand gok niñan angningamb.’ <sup>9</sup>Bi wong giñemb nuk ak, angningamb rek gek, nup minim tep gunap ma angningamb. ‘Bi wong giñemb yand ak mey, apiyn rek gip angningamb.’

<sup>10</sup>“Kun ak rek mey nimb. Gor nimbip angningamb rek giy, kisen angningambim, ‘Chin biynimb tep mer: ar bap key ma gipun; wong chin gep rek ak mey, gipun angningambim’ anggak.”

**Bi Soy Aydik Ayak Onep Wanjrem Ak Gek Suñ Ayak**

<sup>11</sup>Jiysis Jerusalem amniyn angiy, miñmon Samariya biy Galiyliy bindoñ, namb ak am am miñmon bap amjakakniñ, <sup>12</sup>bi soy ayndik ayak

onep wanjrem ak, nup namb pikiy, keykey siñbindoŋ mindiy, <sup>13</sup> angyak, “Biyomb Jiysis. Chinup simb niŋan angyak.”

<sup>14</sup> Angeyak, kuyip angak, “Nimbip suŋ ayip nen, am bi Gor nup simboŋgep gok kuyip, yomnimimb angak.” Kun angek, kinjeŋnamb okok amniyakniŋ, kuyip maŋgiysek suŋ ayek, <sup>15</sup> bi Samariya nimb ak nup suŋ ayak ak niŋiy, minim yomb angyiŋg, Gor nup yimb ak dand aranyiŋg, <sup>16</sup> andkind ap Jiysis mindek siŋak koŋgim yimiy, nup “Tep” angak.

<sup>17</sup> Kun gek niŋiy, Jiysis angak, “Yand anŋniŋbiyn-eŋ; bi onep wanjrem ak suŋ ayip angyi niŋbiyn ak pen; bi onep anjip ak akay? <sup>18</sup> Bi gunap yenen ma opay? Bi par okok nimb ak nep apiy, Gor nup tep angyip angak.”

<sup>19</sup> Kun angyi, bi kun anup angak, “Jiysis yip gek, suŋ ayiŋgamb angyi gos ak niŋban rek, nip gen suŋ ayip nen, amnoŋ angak.”

### Gor Biynimb Diy Kond Mindeniŋgamb

(Mat 24:23-28)

<sup>20</sup> Pen bi Peresiy gok, Jiysis nup angyak, “Kiyŋ yomb key per kond mindpun ak ñin akay rek apiy, chinup diy kond mindeniŋgamb?”

Angey, Jiysis angak, “Biyomb biynimb diy kond mindeniŋgamb apim kun ak, biyomb kiyŋ gunap, biynimb miseŋ kond mindey niŋiy apay, <sup>21</sup> ‘Biynimb kond mindip biy, kond mindip bindoŋ apay’ rek ma anŋniŋgambim. Yenen, nuk nimbip bak ay, kapkap kond mindeniŋgamb angak.”

<sup>22</sup> Kun angyi, binuk gok kuyip angak, “Kisen ñin bap, Bi bap Ñinuk nup niŋun angyi, mapin nimbip ak, piŋiyñiy nep ayiŋgamb ak pen, nup miseŋ ma niŋniŋgambim. <sup>23</sup> Biynimb gunap mindip bindoŋ, mindip biy angey, minim kun ak niŋind apay angyi, ma am piyow niŋnimimb. <sup>24</sup> Yenen: Bi bap Ñinuk winiŋgamb ñin ak, añañak diy, melik parsek gip rek ak, gakniŋ winiŋgamb. <sup>25</sup> Pen biynimb miñiy mindpay gok, nup yiruk niŋiy ma dey; yiwur yomb yimb ak diy, kumiy tikjak semb biyoŋ amiŋ, kisen tip ak winiŋgamb.

<sup>26</sup> “Nuk winiŋgamb ñin kun ak, wosrey Nowa mindek ñin ak, gak rek giniŋgamb. <sup>27</sup> Biynimb gok tap ñimbyiŋg, ñiŋg ñimbyiŋg, biyn penpen ñiyiŋg gi mindyakniŋ, Nowa amyong apyongon siyip miŋgan sikind amdey, miñmon yomb sikerek ak pikiy, ñiŋg wilik apiy, biynimb kun gok kuyip, maŋgiysek yiwiŋgdek kumyak.

<sup>28</sup> “Pen bi Lot mindek ñin ak, Sodom Gomora biynimb gok kunep tap ñimbyiŋg, ñiŋg ñimbyiŋg, sikyim giyiŋg, tap woŋg giyiŋg, korip giyiŋg gi mindyakniŋ, <sup>29</sup> Lot miñmon kun ak kirgiy, miñmon wikan bap key amnakniŋ, mon maŋlaŋ yomb yimb ak, semb biyoŋ nimb apiy, Sodom Gomora biynimb kuyip, maŋgiysek yin simbok amnak. <sup>30</sup> Bi bap, Ñinuk winiŋgamb ñin ak; Nowa mindyiŋgip ñin ak sek, Lot mindyiŋgip ñin ak sek gi mindyiŋgipay rek, gi mindeniŋgambay.



<sup>31</sup>“Nin kun ak, biynimb korip ar biyoŋ mindeniŋgiy gok, tap kiyk gok diniŋ, korip miŋgan ma amniŋgiy. Pen biynimb woŋgday okok taŋgeniŋgiy gok, tap gunap diniŋ, andkind korip ma amniŋgiy. <sup>32</sup>Lot biynuk nup gak ar ak niŋnimimb. <sup>33</sup>Pen biynimb key nep mindiy, mindrep giniŋgayn aŋgningambay gok, mon key yinjab ak amniŋgambay. Biynimb Jiysis ker minden, yip pikayning pikayningiy aŋgiy, yip kisen giniŋgambay gok, biynimb yand yimb mindiy mey, perper mindeniŋgambay. <sup>34</sup>Nimbip aspiyn: nin kun ak, bi omiŋal minj ar nokom bap, kineniŋgayr ak; Gor bi bap nup diy, bap nup kirginiŋgamb. <sup>35</sup>Pen biyn omiŋal biret jimniy gi mindeniŋgayr ak; bap diy, bap nup kirginiŋgamb. <sup>36</sup>[Bi omiŋal woŋgday okok taŋgeniŋgayr ak; bap diy, bap nup kirginiŋgamb aŋgak.]”

<sup>37</sup>Kun aŋgek aŋgyak, “Biyomb. Minim aspan kun ak, akay kun giniŋgamb?”

Aŋgey, Jiysis aŋgak, “Miñ miŋgan, mon miŋgan, kamb miŋgan okok ma giniŋgamb; miseŋ nep namb siŋak giniŋgamb aŋgak.”

### Bi Kor Niŋep Bap Biyn Kaŋil Bap

**18** <sup>1</sup>Jiysis binuk gok, yiruk ma niŋniŋgiy, Gor nup aŋgningiyiŋ nep mindeniŋgiy aŋgiy, kuyip minim bap paydoŋ ay aŋgak: <sup>2</sup>“Miñmon bap, biyomb kor niŋep bap mindeniŋgamb. Pen bi kun ak, Gor nup gosimb ak ma niŋiy, biynimb gok kuyip simb ma niŋningamb. <sup>3</sup>Biyn kaŋil miñmon kun ak nimb bap, pernep apiy nup aŋgningamb, ‘Bi ñaŋgep yand ak, minim chirup ak niŋnimin aŋgningamb.’ <sup>4</sup>Kun aŋgningamb ak pen, biyomb kor niŋep kun ak, minim nup ak ma diniŋgamb. Ma dek, nup ap minek minek aŋgniŋ gek gek, kisen biyomb kun ak aŋgningamb, ‘Yand Gor nup, gosimb ak ma niŋiy, biynimb gok kuyip, simb ma niŋiy gipiyn ak pen; <sup>5</sup>biyn kaŋil biy minek minek ap aŋgek aŋgek, yip yiruk giniŋgamb nen, kor kun ak niŋnim aŋgningamb.’

<sup>6</sup>“Bi yikop biynimb simb ma niŋep ak, kun gak ak pen; <sup>7-8</sup>Gor ma giniŋgamb aŋgiy niŋbim? Akan pen, takiy mindiy giniŋgamb aŋgiy niŋbim? Mer! Nimbip aspiyn: biynimb nuk key niŋiy dak gok kuyip, timey giyakniŋ, pumbnamb kisyimken nup aŋgningiyiŋ mindpay rek, per ma kond mindeniŋgamb; aŋgningambay rek niŋiy giniŋgamb aŋgak.”

### Bi Peresiy Bap Takes Dep Bap

<sup>9</sup>Pen chin mind tep gipun; biynimb gunap, mind tep ma gipay aŋgyak rek, kuyip minim bap paydoŋ ay aŋgak, <sup>10</sup>“Bi Peresiy bap, bi takes diyiŋgip bap Gor nup aŋgningiŋ, Gor aŋgningep korip ak amnirik. <sup>11</sup>Bi Peresiy ak namb nuk okok nep, Gor nup lotiw giy aŋgak, ‘Nip tep yimb aspiyn. Yand bi gunap gipay rek; biyn siy, tap siy, tap timey okok ma gipiyn. Yand bi takes dep biy rek mer. <sup>12</sup>Wiyk minek minek lotiw minden

aŋgiy, per ñin omiŋal tap ma ñimbiyn sek. Per tap yand onep wanjrem ak diyiŋg, nip nokom bap ñiy, yand onep anjip ak nep dipiyn aŋgak.’

<sup>13</sup>“Pen bi takes dep ak, keykey siŋbikdoŋ jiy kuyangiy mindiy, gos kuŋay niŋiy aŋgak, ‘Gor. Yand bi tap siy tap timey giyiyn ak, yip simb niŋnimin aŋgak.’

<sup>14</sup>“Nimbip aspiyn: Gor bi takes dep ak kun aŋgek niŋiy, nup diy, bi suŋ-tep yimb mindpiyn aŋgak ak nup ma dak. Yenen: biynimb yimb kiyk key dand aranimbay gok, Gor gek apyap pikniŋgambay. Pen biynimb, Gor Biyomb mindip aŋgiy, pirikiy, kapkap mindeniŋgambay gok; Gor gek yimb mindeniŋgamb aŋgak.”

**Jiysis Ñapan Sikoy Gok Kuyip Bilesiym Gak**  
(*Mat 19:13-15; Mak 10:13-16*)

<sup>15</sup>Biyimb gok Jiysis ñapan chinup gok bilesiym gaŋ aŋgiy, dand apey, bilesiym gakniŋ, binuk gok, biynimb kun gok kuyip niŋchikiy aŋgyak. <sup>16</sup>Kun geyak, Jiysis ñapan sikoy gok suk aŋgek wiyakniŋ, binuk gok kuyip aŋgak, “Yenen kun apim? Napan sikoy gok kirgem, yip ker wiyaŋ. Gor nup dipay mey; ñapan sikoy kun gok rek. <sup>17</sup>Ñapan sikoy gok, Gor minim ak kun giy mindip aŋgey niŋiy, kasek dipay. Kun ak nimbip niŋind aspiyn; biynimb ñapan sikoy yip gosimb niŋbay rek niŋniŋgambay gok, Gor kuyip diy, kond mindeniŋgamb; biynimb yikop gok kuyip kirginiŋgamb aŋgak.”

**Jiwda Biyomb Bap Tap Kuŋay Mindek**  
(*Mat 19:16-22; Mak 10:17-22*)

<sup>18</sup>Jiwda biyomb bap, Jiysis mindek ak apiy aŋgak, “Tiysa nand bi tep yimb. Yand yergen, Gor gek per mindeniŋgayn?”

<sup>19</sup>Aŋgek, Jiysis aŋgak, “Biyimb gunap tep ma mindpay; Gor nuk nep mey, bi tep yimb mindip. Kun ak gos yerip niŋiy, yip bi tep yimb apan? <sup>20</sup>Pen nand Gor low minim ak niŋban: ‘Biyn siy bi siy ma ginimimb. Chip ma ñaŋgnimimb. Tap siy ma dinimimb. Yesek ma aŋgnimimb. Nap nanim minim aŋgnimiyr ar ak nep niŋiy, kindik ginimimb aŋgiy’ aŋgak.”

<sup>21</sup>Aŋgek, bi kun ak aŋgak, “Yand ñiskoy miŋg tikiy, low minim ar kun ak kindik gi dap dap, miŋiy ñin biy, kindik ginep mindpiyn aŋgak.”

<sup>22</sup>Jiysis minim kun ak niŋiy aŋgak, “Tap nokom bap nep ma gipan. Tap nak gok maŋgiysekiy yokiy maniy diy, biynimb yimgeprek gok kuyip ñiy mey; mindrep gep nand ak, mindeniŋgamb Gor miŋmon biyoŋ. Kun ak apiyn rek giy apiy, bi yand bap mindenimin aŋgak.”

<sup>23</sup>Aŋgek, nuk minim kun ak niŋiy, gospar yimb ayak.

<sup>24</sup>Gospar ayak, Jiysis aŋgak, “Biyimb tap kuŋay mindip gok, kosyam yimb Gor nup gosimb niŋey, kuyip diy kond mindeniŋgamb.

<sup>25</sup>Kanj kamel gok, ñiw lekpay miŋgan ak amniŋg, kasek amniŋgiy rek

ayningamb; pen biynimb maniy tap kiyk kuñay mindip gok, kosyam yimb Gor nup gosimb niñey, kuyip diy kond mindeningamb angak.”

<sup>26</sup>Kun anggek, biynimb mindeyak gok angyak, “Minim aspan kun ak, biynimb gunap Gor ker mindenjun rek ma ayip. Akan yerip?”

<sup>27</sup>Anggey, Jiysis anggak, “Ar gunap biynimb giningiy rek ma ayningamb ak pen; Gor nuk gining, ginimuñ rek nep mindip anggak.”

<sup>28</sup>Kun anggek, Piyta anggak, “Niñan! Korip tap chin gok mañgiysek kirgiy, nip chingiy nep tapun anggak.”

<sup>29</sup>Anggek, Jiysis kuyip anggak, “Nimbip niñind aspiyn. Biynimb Gor biynimb nuk kuñay diy kond mindonimuñ anggiy; korip, biyn, numam, nop, nonim, ñapan kiyk gok kuyip kirgey, Gor sakiy ma giningamb.

<sup>30</sup>Miñiy mindpun ñin namb biy, kuyip kond mind tep gek, tap kiyk gok, biynimb kiyk gok kuñaynep mindeningamb. Pen ñin kisen ak apek, nuk yip perper mindeningambay anggak.”

### **Yip Pikayningambay Anggiy Tip Ak Anggak**

*(Mat 20:29-34; Mak 10:46-52)*

<sup>31</sup>Jiysis binuk onep wimingan ak kuyip, dand gol okok amiy anggak, “Niñim. Miñiy Jerusalem amoningambun, Bi bap Ñinuk nup, wosrey Baybol buk ak tikiy angyak rek giningambay. <sup>32</sup>Nup di bi Jiwda mer gok, ñin ar ak ayeningambay, nup angjiwyiñg, ñiñlon ayiñg, kiñuk giyiñg, <sup>33</sup>miñ diy pikyiñg, pisnep pikayningambay. Pen minek omiñal nokom mindiy, tip ak tikjakiy, kim mindeningamb anggak.”

<sup>34</sup>Pen kun anggek, binuk gok gos pañgyiknimuñ rek ma ayek, minim asap ar ak anggiy, ma niñyak.

### **Jiysis Bi Windin Koy Gak Ak Gek, Windin Yimb Niñak**

*(Mat 20:17-19; Mak 10:32-34)*

<sup>35</sup>Pen kisen, am miñmon Jeriykow amjakyakniñ, bi windin koy, maniy tap gok nen asim anggyiñgip bap, kinjeñ yomb gol siñak bisinñg mindek ak mey; <sup>36</sup>biynimb kuñaynep minim ang pandikyakniñ, biynimb gunap kuyip angniñiy anggak, “Yergispay?”

<sup>37</sup>Anggek angyak, “Jiysis bi Nasaret nimb ak, apiy pandiksap angyak.”

<sup>38</sup>Kun anggeyak, nuk suk yomb anggiy anggak, “Jiysis! Depiyt Ñinuk! Yip simb niñan anggak.”

<sup>39</sup>Anggek, biynimb pandikeyak gok, nup ang giy angyak, “Yenen kun aspan? Kapkap mindey angyak.”

Kun angyak ak pen, nuk kapkap ma mindek, suk yomb anggyiñg anggak, “Jiysis! Depiyt Ñinuk! Yip simb niñan anggak!”

<sup>40</sup>Anggek, Jiysis niñiy aland giy, biynimb gok kuyip anggak, “Poñind yep mañ siñbiy wim anggak.”

Anggek, poñind apeyak anggak, <sup>41</sup>“Nip yerginim?”

Anggek anggak, “Biyomb. Yip gey windin ak tip niñiy anggak.”

<sup>42</sup>Anggek, Jiysis nup anggak, “Yip geniŋgamb, windin yimb niñningayn anggiy gos niñban ak, windin niñan anggak.”

<sup>43</sup>Anggek, won kun anep windin niñiy, Gor nup yimb ak dand aranying, Jiysis amnakniñ, kindik gak. Biynimb mañgiysek Jiysis gak kun ak niñiy, Gor nup yimb ak dand aranyak.

### Sakiyas Yerer Gak

**19** <sup>1-3</sup>Pen miñmon Jeriykow namb kun ak, bi mañ nep won bap, maniy tap nuk kuñay mindyngip ak mindek. Yimb nuk ak Sakiyas. Nuk bi takes dep gok kuyip, mañgiysek kond mindyngip. Jiysis pandikakniñ, biynimb kuñaynep ap niñning geyak, Sakiyas bi mañ won ak mey, Jiysis bi yerip rek ak niñiy anggiy, <sup>4</sup>nind amiy, mon bind bap tanaraniy, Jiysis apek tam bineñ niñmindek.

<sup>5</sup>Jiysis pen ap, mon tan mindek kiñiñ siñak apiy, kuyonggiy niñiy, Sakiyas nup anggak, “Kasek luñg yowan! Miñiy korip nand ak, am mindeniñgayn anggak.” <sup>6</sup>Anggek, Sakiyas luñg yapiy, miñmiñ giyiy, Jiysis nup poñind korip nuk amnak.

<sup>7</sup>Biynimb gok gak kun ak niñiy, miluk yapek anggak, “Bi kun ak am, bi tap siy tap timey gip korip ak, kiniñg amjap anggak.”

<sup>8</sup>Pen kisen am, Sakiyas korip ak minim ang mindyng, Sakiyas Jiysis nup anggak, “Biyomb. Nand niñan! Miñiy tap yand gok bilok pis ak ay, pis ak biynimb simbgeprek gok kuyip niñningayn. Yand nind tom giy, biynimb gunap tap kuyip siy dinik rek ayip gok, pen niñning, tap nokom bap dinik rek, pen omiñal omiñal niñningayn. Pen tap omiñal siy dinik rek, pen niñning, onep jiy ak niñningayn. Kun giy, gi dam dam mañgiysek day pañg diy, kirginiñgayn anggak.”

<sup>9</sup>Pen biynimb gok niñmindyakniñ, Jiysis Sakiyas nup minim ak anggiy anggak, “Bi biy nusind Ebrahim, Gor nup gosimb niñak rek niñimb ak mey; Gor miñiy nup diy, biynimb nuk yip korip jimñiy kinbay gok kuyip diy gip. <sup>10</sup>Yenen: bi bap Niñuk wak ak, biynimb Gor ker mindpay gok kuyip diniñg ma wak; biynimb nup ker ma mindpay gok kuyip diniñg awak anggak.”

### Bi Onep Wanjrem Ak Maniy Diyak

(Mat 25:14-30)

<sup>11</sup>Pen biynimb kun gok, Jiysis mey, Biyomb per kond mindpun ak; Jerusalem amek, nup kiy anggayon, chinup kond mindek, mindrep yimb giniñgambun anggiy niñyak.

Jiysis gos niñyak kun ak key niñiy, minim nind anggak ak niñyakniñ, minim bap sek paydoñ ay anggak, <sup>12</sup>“Bi biyomb mindep rek bap, kond mindep yand ak mindip amen, yip kiy anggayek, andkind apiy, biynimb

miñmon yand guniy kuyip kond mindenim angyi, miñmon paryomb okok amningamb. <sup>13</sup>Pen kisen amningamb: nind bi nup wong giñningambay onep wanjrem ak kuyip suk angek apey, maniy yir omiñal, omiñal keykey bilok ñiy angingamb, ‘Maniy ñispiyn biy diy, wong biysniys genimimb. Kisen yand tip ak winingayn angingamb.’

<sup>14</sup>“Kun angyi, amningamb ak pen; biynimb miñmon nuk yip jimñiy gok, nup miluk niñiy, bi gunap angyokey kisen amiy, bi kond mindep ak nup angingambay, ‘Bi chinup kiyñ angy ayniñ gispan biy, chin ma diniñgambun angingambay.’

<sup>15</sup>“Pen nup kiyñ angyayek, tip ak andkind apiy, bi nup wong giñningambay gok kuyip, suk angek apey angingamb, ‘Maniy ñinik gok sikyim gi andik mandik giy; pen yerip yerip dipim?’ <sup>16</sup>Angek, bi nind winingamb ak angingamb, “Biyomb. Maniy yir yip ñinak omiñal ak, sikyim gi andik mandik giy, pen yir ñin jiwiy ak dipiyn angingamb.”

<sup>17</sup>“Angek, biyomb ak angingamb, ‘Nand girep gipan. Tap sikoy ak ñenik, wong girep ginak rek, miñiy miñmon dawin yomb onep wanjrem ak angen, kond mindeniñgamban angingamb.’

<sup>18</sup>“Bi namb ak apiy angingamb, ‘Biyomb. Maniy yir yip ñinak omiñal ak, sikyim gi andik mandik giy, pen yir onep mamind ak dipiyn angingamb.’

<sup>19</sup>“Angek, biyomb ak angingamb, ‘Gipan kun ak rek, miñiy nip angen, dawin yomb onep mamind ak kond mindeniñgamban angingamb.’

<sup>20-21</sup>“Pen bi nup wong giñemb bap apiy angingamb, ‘Biyomb. Yand nip niñbiyn. Nand bi kalrimey yimb. Biynimb gunap tap kuyip gok sikyim girep giy mer; pilgiy rek dipan. Tap wong kosyam giy yimbay gok, nand kilis giy nep ñimban. Kun ak yand nip pirikiy mey, maniy yir yip ñinak omiñal ak, yikop dam tiwning ayen mindek, miñiy dand opiyn angingamb.’

<sup>22</sup>“Angek, biyomb ak angingamb, ‘Minim nak apan ak tunğandikiy, nip key kor giniñgayn. Yip bi timey yimb, biynimb tap kuyip gok sikyim girep giy mer; yikop diy, tap wong kosyam gi yimbay gok, nand kilis giy nep, taw piling dipan apan kun ak; <sup>23</sup>yenen maniy yip ak diy, dam beñ ayey, andkind apiy siyñiñ gunap sek ma dipiyn angingamb.’

<sup>24</sup>“Kun angyi, bi yep mañ siñak mindeniñgambay gok kuyip angingamb, ‘Maniy yir yip omiñal ak piling diy, bi maniy yir ñin jiwiy mindip ak nup ñim angingamb.’

<sup>25</sup>“Angek angingambay, ‘Biyomb. Nuk maniy yir ñin jiwiy ak, di mindip angingambay.’

<sup>26</sup>“Angey angingamb, ‘Nimbip aspiyn. Per biynimb tap kiyy kuñay mindip gok, gunap sek dipay; pen biynimb tap kiyy siskoy mindip gok, gey pisnep yap amimb. <sup>27</sup>Pen biynimb, ‘Kiyñ kun ak chin ma diniñgambun angyi, miluk niñbay gok kuyip am dand apiy, windin yirik ar yip siñbiy, ñanğ aynimimb angingamb’ angak.”

**Jiysis Nup Kiyŋ Gok Kuyip Gipay Rek Giyŋg Dand Jerusalem Amniyak**  
(*Mat 21:1-11; Mak 11:1-11; Jon 12:12-19*)

<sup>28</sup>Jiysis kuyip minim kun ak aŋgiy, binuk gok yip Jerusalem amnun aŋgiy, nuk nind giy, <sup>29</sup>am am, Oliyp pir miñmon Betpasiy-Beteniy gol sijak amjakiy, binuk omiŋal kuyip aŋgyokiy aŋgak, <sup>30</sup>“Miñmon wikan bindoŋ amiy niŋningayr; doŋgiy marip biynimb ma dand tapay bap, tiwningayey mindeningamb. Wisikiy dand winimiy. <sup>31</sup>Pen biynimb gunap apiy aŋgningiy, ‘Kanj doŋgiy chinup ak yenen wisik dand amjipiyr aŋgeningiy’ aŋgnimiy, ‘Biyomb ak woŋg mindek aŋgyokamb, dining opur aŋgnimiy’ aŋgak.”

<sup>32</sup>Kun aŋgek, amiy niŋrik: aŋgak rek nep mindek. <sup>33</sup>Am miñ ak wisik girikniŋ, bi doŋgiy nop nimb gok apiy aŋgyak, “Doŋgiy marip chinup ak yenen miñ wisiksipiyr?”

<sup>34</sup>Aŋgey aŋgrik, “Biyomb ak woŋg mindamb aŋgip ak mey, wisiksipur aŋgrik.” <sup>35</sup>Kun aŋgiy, doŋgiy marip kun ak miñ wisikiy, poŋind dand Jiysis mindek ak amjakiy, chech kiyk band gunap tuŋgiwiŋ, di doŋgiy ar ak ay, Jiysis nup di ar kun biyoŋ ayer bisgak.

<sup>36</sup>Bisgiy, lor ar ak amnakniŋ, biynimb gok, chech tap okok dap lor ar kun ak ayakniŋ, tawyiŋg tawyiŋg amnak. <sup>37</sup>Am am, Jerusalem maŋ maŋ gakniŋ, Oliyp dum kinjeŋ kuyangipay tip ak, biynimb nuk gok kuŋaynep, nup miñmiñ yimb giyiŋg, tap yerip yerip gak gok gos ak niŋiy, suk yomb aŋgyiŋg, Gor nup yimb ak dand aranyiŋg, <sup>38</sup>aŋgyak:

“Gor kiyŋ yomb chinup aŋgyokamb wip biy, chinup kond mindrep giningamb.

Chinup direp yimb gip kun ak, yimb nup dand yiy ar biyoŋ aranjun aŋgyak.”

<sup>39</sup>Kun aŋgyakniŋ, bi Peresiy gunap namb kun okok mindeyak gok, Jiysis nup aŋgyak, “Tiysa. Biynimb nak gok kuyip aŋg gey, kun ma aŋgyaŋ aŋgyak.”

<sup>40</sup>Aŋgeyak, Jiysis aŋgak, “Nimbip aspiyn; kun ak ma aŋgeningambay, Gor kamb gok gek, minim aŋgningambay aŋgak.”

**Jiysis Jerusalem Niŋiy Siy Aŋgak**

<sup>41</sup>Jiysis Jerusalem maŋ maŋ giyiŋg, dawin yomb kun ak niŋiy, siy niŋg tik dam yokyiŋg aŋgak, <sup>42</sup>“Miñmon Jerusalem. Nimbip simb yimb niŋsiŋpiyn. Nimbip di Gor yip jimniŋing winik ak niŋbikip rek, tep yimb gipkip! Pen ma niŋiy, windin koy rek mindpim! Gor nimbip ker apek ma dipim rek, <sup>43</sup>kisen bi gunap ap dawin yomb nimbip biy, niŋluk ay kus kus gi mindiy, <sup>44</sup>pisnep gi timey yimb gey, woŋg wariy, minj, korip, tap gunap ma yimb mindeningamb aŋgak.”

**Jiysis Gor Aŋgningep Korip Miŋgan Ak Amnak**  
(*Mat 21:12-17; Mak 11:15-19; Jon 2:13-22*)

<sup>45</sup>Kun aŋgiy, nuk Gor aŋgningep korip ak amiy, biynimb sikiyim geyak gok kuyip, aŋg mis yokyiŋg aŋgak, <sup>46</sup>“Baybol buk tikiy aŋgyak, ‘Korip

yand ak, yip angnijep korip ak mindip angyak' ak pen, nimb sikyim gem gem, biynimb tap siy diy, ap kapkap kinbay korip bap rek ayip angak.”

<sup>47</sup>Pen Jiysis minek minek, ap Gor angnijep korip miŋgan ak, biynimb gok kuyip minim angnijep. Bi Gor nup tap simbonjep yomb gok, bi low tiysa gok, bi minim tungasikep gok nup pikayun angyi, gos nokom niŋyak ak pen, <sup>48</sup>biynimb maŋgiysek minim tep nup ak niŋun angyi, yiŋrimey yimb geyak, minim bap angyi nup pikayniŋgiy rek ma ayak.

**Nip An Angek Kun Girapan**  
(*Mat 21:23-27; Mak 11:27-33*)

**20** <sup>1</sup>Pen ñin namb kun siŋak, Jiysis Gor angnijep korip miŋgan ak amiy, nuk biynimb di Gor yip jimniy ayningamb minim tep ak angnakniŋ, bi Gor nup tap simbonjep yomb gok, bi low tiysa gok, bi minim tungasikep gok apiy, <sup>2</sup>nup angyak, “An nip angek, ap Gor angnijep korip biy, biynimb gok kuyip yuk yokyiŋ, minim angnijep girapan?”

<sup>3</sup>Angey angak, “Yand nimbip pen, angnijep bap angnijep gispiyn.

<sup>4</sup>Jon biynimb gok kuyip niŋg pikniak ak, gos nuk key niŋiy gak akaŋ, Gor angek gak?”

<sup>5</sup>Angek, kiyk key angnijep angnijep giy angyak, “ ‘Gor angek Jon biynimb gok kuyip niŋg pikniak angnijep,’ nuk angnijep, ‘Kun ak minim nup ak, yenen ma niŋbim angnijep.’ <sup>6</sup>Pen Jon gos nuk key niŋiy, biynimb gok kuyip niŋg pikniak angnijep, biynimb guniy, Gor angek apiy gek niŋbay rek, chinup kamb jiw pikayningambay angyak.”

<sup>7</sup>Kun angyi, Jiysis nup angyak, “Jon ap biynimb gok kuyip minim angnijep, niŋg pikniy gak ak, chin ma niŋbun. Gos nuk key niŋiy gak akaŋ, Gor angek gak angyak.”

<sup>8</sup>Kun angey, kuyip angak, “Nimb yip pen ma angnijep rek, yand pen; an angek ap gispiyn ak, nimbip ma angnijep angak.”

**Jiwda Biyomb Gok Bi Gor Wong Giŋiyŋipay Gok Timey Giyak Rek,**  
**Ñinuk Nup Kunep Giniŋgambay Angyi Paydon Ay Angak**  
(*Mat 21:33-46; Mak 12:1-12*)

<sup>9</sup>Pen Jiysis kuyip paydon ay angak, “Bi bap wayn wong ak gi yimiy, biynimb wong nup giniŋgambay gunap kuyip angyak, nuk am miŋmon paryomb okok mindeningamb. <sup>10</sup>Pen wayn maŋgiy pik giniŋgamb ñin ak, binuk bap angyokiy angnijep, ‘Am angey, wayn maŋgiy yip gunap ñey, dand winimin angnijep.’ Angek amjakek, biynimb wayn wong gi mindeningambay gok, nup pik pik ay, yikop angyokek andkind winingamb. <sup>11</sup>Kun gey, bi wayn wong nop nimb ak, bi bap pen angyokek amningamb. Pen nup kunep pik pik ay, yikop angyokek andkind winingamb. <sup>12</sup>Kun gey, bi kisenimb bap angyokek amjakek, nup tapin yimb pikiy, lipiŋ dam mis akyan yokningambay.

<sup>13</sup>“Kun geningambay, bi wongday nop nimb ak, Ni mapin yand ak yoken, minim angeningamb niñningambay angyi, yokningamb. <sup>14</sup>Yokek amjakek, biynimb wayn wong gi mindeningambay kun gok angningambay, ‘Ni wip biy, nop wayn wong ak, nuk dinimuñ rek ayip. Nup pisnep pikay, chin dun angningambay.’ <sup>15</sup>Kun angyi, nup lipiñg dand mis okok amiy, pisnep pikayey kumningamb. Pen kun geningambay, bi wongday nop nimb ak kuyip yerginingamb? <sup>16</sup>Nuk apiy, biynimb kun gok kuyip pikay, wongday kun ak biynimb gunap kuyip pen angek, kond mindeningambay angak.”

Jiysis kun angek, biynimb niñmindeyak gok angyak, “Mer! Chinup Jiwda biynimb kun ma ginimuñ. Biynimb kisenimb gok angek, ma kond mindeningiy angyak.”

<sup>17</sup>Angeyak, kuyip niñkuskus giy angak, “Baybol buk ak, minim kun ak rek tikiy angyak:

‘Bi korip gep gok, kamb bap tep ma gek kirgiyak ak pen, miñiy korip sap namb yomb biyañ ak piñiyñiy mindip angyi’ tikiyak.

<sup>18</sup>“Biynimb kamb ar kun ak apyap pikningambay gok, tapin nep pikningamb. Pen kamb kun ak puñgjiw apyapiy, biynimb aybirikningamb gok, pisnep piksimbjakningamb angyak.”

<sup>19</sup>Jiysis kun angek, “Chinup nep asap angyi,” bi low tiysa gok sek, bi Gor nup tap simbongep yomb gok sek nup kor gun angyi niñyak ak pen; biynimb kuñaynep niñmindeyak niñiy, pirikiy kirgiyak.

### **Rom Biyomb Siysa Nup Takes Pikjun Akan Mer Angyak**

*(Mat 22:15-22; Mak 12:13-17)*

<sup>20</sup>Pen minim angak gok niñiy, nup yergiy dand kor amjun angyi, am biynimb gunap kuyip mimuñg giy angyak, “Nimb biynimb tep rek silok ay, am tom giy, nup minim gunap angem, pen yerip angonimuñ niñiy, nup dand gapman kor yomb ak amningambun angyak.” <sup>21</sup>Kun angey, nup am angniniy angyak, “Tiysa. Chin niñbun; yip yerip gos niñningambay angyi minim key gunap ma apan; biynimb gok kuyip Gor minim angnining akan, yerip angning, yipund giy nep apan. <sup>22</sup>Kun ak yerginjun. Rom gapman biyomb Siysa nup, takes pikjun akan, mer?”

<sup>23</sup>Kiyk yesek tom giyak kun ak, Jiysis key niñiy, kuyip angak, <sup>24</sup>“Maniy takes pikpay kun ak bap yip diñem niñiyñ angak.” Angek, diñey niñiy angak, “Maniy bak ak, kawnan an ker mindiy, yimb tikiyak kun ak, an yimb ak mindiy gip?”

Angek angyak, “Siysa kawnan ak mindiy, yimb nuk ak mindiy gip angyak.”

<sup>25</sup>Angey, kuyip angak, “Kun ak Siysa yip ginimimb angyip gok, nup ginimimb; Gor yip ginimimb angyi niñimb gok, nup ginimimb angak.”

<sup>26</sup>Pen minim angak kun ak, kiyk niñey, miker nup bap, dinimuñ rek ma ayek, wal angyak. Bi gos tipangyi niñiy angyip angyi, pen minim gunap ma angyi, minim gomb pisnep kurgak.



### Biyinimb Kumiy Tip Tikjakpay Akan Angyak

(Mat 22:23-33; Mak 12:18-27)

<sup>27</sup>Biyinimb gunap, biyinimb kumiy ma tikjakpay angyiy, gos ak niñyngipay. Biyinimb kun gok kuyip, “Sanjiwsiy biyinimb” angyingipay. <sup>28</sup>Kiyk gos kun ak niñyngipay rek, ap Jiysis nup nembnemb giying angyak, “Tiysa. Bi Gor minim anjep Mosis; minim bap chinup tikiy angak:

‘Bi bap biyn diy, ñapan tikiy mer yikop kumeningamb, numam nuk bap pen, biyn kun ak diy, ñapan nup ak angyiy tikningamb angak.’ <sup>29</sup>Kun ak, bi kiñiñ sek onep ar ak mindeningambay; numam nind ak biyn diy, ñapan tikiy mer; yikop kumningamb. <sup>30</sup>Kumek, numam namb pen, biyn kun ak diy, kunep ñapan tikiy mer; yikop kumningamb. Kun gek, numam namb ak pen dingingamb. <sup>31</sup>Ak kunep ñapan tikiy mer; yikop kumningamb. Kun gi dam dam, numam onep ar ak mangiysek ñapan tikiy mer; yikop kumningambay. <sup>32</sup>Kisen biyn kun ak kunep kumningamb. <sup>33</sup>Pen kumiy tikjakningambay apan ak, biyn nokom binuk di onep ar ak ayingamb kun ak, kisen an ker mindeningamb angyak.”

<sup>34</sup>Angey, Jiysis kuyip angak, “Miñiy mindpun ñin biy, biyn gok bi dipay; bi gok biyn dipay. <sup>35</sup>Pen Gor biyinimb nuk gok kumiy tikjakiy, biyn gok bi ma dingingambay; bi gok biyn ma dingingambay. <sup>36</sup>Pen tip ak ma kumningambay; Gor ñi pañ nuk gok mindiy, enjol nuk gok per mindpay rek mindeningambay. <sup>37</sup>Biyinimb kumiy tikjakpay minim ak, Mosis kunep angyiy tikak ak niñbun. Gor mon bind mañlanj gek namb ak mindiy, basind nind kumyak gok yimb angyiy, Mosis nup angak, ‘Yand Gor yesek bap mer; Ebrahim, Aysek, Jekop Gor kiyk yand mindpiyn angak.’ <sup>38</sup>Biyinimb nind kumyak gok, ‘Gor kiyk mindpiyn’ angak rek chin niñbun; biyinimb kim mindpay akan, kumbay gok Gor niñimb, mangiysek kim mindpay.” <sup>39</sup>Jiysis kun anjek, bi low tiysa gunap angyak, “Tiysa. Minim yipund giy nep aspan angyak.” <sup>40</sup>Minim anj tep gak kun ak pirikiy, kisen minim gunap nup ma angninyak.

### Yip Yenen Kiyñ Yomb Key Yimb Ak Ma Apay Angak

(Mat 22:41-46; Mak 12:35-37)

<sup>41</sup>Pen Jiysis kuyip angak, “Biyinimb gok, Kiyñ yomb key yimb ak nup, Depiyt Biyomb nuk angninyiy ak pen; yenen nup Depiyt tik dand amiy apiy gek, tikpay ñi ak nep apay. <sup>42</sup>Depiyt nuk key, Kiyñ yomb key yimb ak nup minim angyiy, Baybol buk day ‘Sam’ apay ak tikiy angak:

‘Biyomb Gor, Biyomb yip ak nup anjip, “Nand ñin yipund kind yip okok mindiy, <sup>43</sup>mind dand amiy, biyinimb nip alemb alemb ñimbay gok kuyip, tomb bej nand okok ayen, tawbirikningamban anjip” angyiy’ tikak.

44 Pen Depiyt Kiyŋ yomb key yimb ak nup, Biyomb yand aŋgak kun ak, yenen nup Depiyt ņinuk ak nep apay aŋgak.”

**Bi Low Tiysa Gok Mind Tep Ma Gipay Aŋgak**  
(*Mat 23:1-36; Mak 12:38-40; Luk 11:37-54*)

45 Pen biynimb gok niŋmindyakniŋ, Jiysis binuk gok kuyip aŋgak, 46 “Nimb bi low tiysa gok gipay rek ginimimb rek ayip ak, niŋrep yimb ginimimb. Kiyk gipay ar ak, okok taŋgon yimb chinup anep aŋgyaŋ aŋgiy, chech paryomb gok yimiy, nan-gep korip ak amiy, biyomb bispay ar ak bisgiy, tap yomb ņimbay ņin ak, am biyomb bisginingiy tip ak dipay. 47 Pen biyn yandiw gok korip tap kuyip okok, chinup nimb tikaŋ aŋgiy lip lip giyiŋg, Gor nup aŋgniŋsipun aŋgiy, minim paryomb yesek yesek ar gok apay. Kun gipay ak, kisen yiwur yomb key yimb ak, diniŋgambay aŋgak.”

**Biyn Kaŋil Ak Opriyŋ ņak**  
(*Mak 12:41-44*)

**21** 1 Jiysis Gor aŋgniŋep korip miŋgan ak, am mindiy niŋak: biynimb maniy sek gok, maniy gunap dap kes opriyŋ ayiŋgipay miŋgan ak yokeyak. 2 Pen biyn yandiw simbgeprek bap, maniy likaŋsek sikoy omiŋal ak dap yokak. 3 Yokek, Jiysis niŋiy aŋgak, “Nimbip niŋind aspiyn. Biynimb gunap maniy siskoy yokpay; biyn yandiw simbgeprek biy, maniy nuk yomb yimb ak yokip. 4 Pen biynimb gunap, maniy kiyk kuŋaynep mindakniŋ opriyŋ ņimbay; biyn yandiw simbgeprek biy, maniy nuk mindip rek maŋgiysek yokip. Tap taw niŋnimuŋ bap ma mindip aŋgak.”

**Gor Nup Aŋgniŋep Korip Ak Timey Giniŋgambay Aŋgak**  
(*Mat 24:1-2; Mak 13:1-2*)

5 Pen binuk gunap aŋgyak, “Gor aŋgniŋep korip biy, kamb tep tep tap okok dand apiy giyak ak, tep yimb mindip aŋgyak.” Kun aŋgey, Jiysis kuyip aŋgak, 6 “Kun apim ak pen, kisen tap tep niŋsipim kun gok ma mindeniŋgamb. Amiybi miŋmon okok nimb gok apiy, maŋgiysek tuŋwanaŋg diyokek, kamb bap, kamb bap ar ak ma mindeniŋgamb aŋgak.”

**Kisen Miker Giniŋgamb**  
(*Mat 24:3-14; Mak 13:3-13*)

7 Aŋgek, nup aŋgniŋiy aŋgyak, “Tiysa. Tap kun ak ņin akay rek kun giniŋgamb. Pen tap yerip rek ak gek niŋiy, miŋiy giniŋg gisap aŋgniŋgambun aŋgyak.”

8 Aŋgey, Jiysis kuyip aŋgak, “Niŋrep ginimimb! Biynimb kuŋaynep ap tom giy, yimb yip ak diy aŋgniŋgambay, ‘Yand nep aswiyn. ņin yomb ak wip aŋgniŋgambay.’ Kun aŋgey, niŋind apay aŋgiy ma niŋnimimb.

<sup>9</sup>“Pen miñmon wikan gunap tikjakiy, miñmon wikan gunap yip penpen giniñgambay; miñmon wikan gunap kiyk keynep penpen gey niñiy, ñin kisen apay ak winiñg gakniñ gispay añgiy, ma piriknimimb. Ñin kun ak kisen winiñgamb aṅgak.”

<sup>10</sup>Kun añgiy, kuyip aṅgak, “Miñmon gunap, miñmon gunap yip penpen giniñgambay. Biyomb gunap layn nuk gok tikjakiy, biyomb gunap layn nuk gok yip penpen giniñgambay. <sup>11</sup>Miñmon okok kuñaynep monmon yomb diy, yiwon yomb giy, miñak yomb giy giniñgamb. Tap semb ar biyoñ gok key kindik nimb ayek, pirikep rek ayniñgamb.

<sup>12</sup>“Pen tap kun gok kisen kun giniñgamb; nind yip ker mindpim rek, nimbip timey giniñgambay. Nimbip kor giniñg, dand Jiwda nan-gep korip ak amiy, kor giy, kalambis ay, dand gapman biyomb kor ak amniñgambay. <sup>13</sup>Nimbip giniñgambay kun ak, minim tep yip ak miseñ aṅgñinimimb rek ayniñgamb. <sup>14</sup>Pen minim yerip rek aṅgjun añgiy, nind ma piyow niñnimimb. <sup>15</sup>Yand key nimbip gos tep ñen, aṅgñimbikniñ, kiyk niñey diyokep rek ma ayniñgamb.

<sup>16</sup>“Pen nap, nanim, namam, buñgiy nimb, biynimb nimb key gok mimuñg giy; nimbip gunap pisnep pikayniñgambay. <sup>17</sup>Yip dipim rek, biynimb mañgiysek nimbip miluk niñniñgambay. <sup>18</sup>Pen jun kas nimbip bap ma kurginiñgamb. <sup>19</sup>Yip chiñgiy nep mindiy mey; perper mindeniñgambim.

### **Dawin Yomb Jerusalem Biy Gi Timey Giniñgambay Aṅgak**

*(Mat 24:15-21; Mak 13:14-19)*

<sup>20</sup>“Pen amiybi gok ap, Jerusalem kus kus giyakniñ; mañ mindip Jerusalem timey giniñgambay añgiy, <sup>21</sup>biynimb Jiwdiya mindeniñgiy gok, pirik miñmon yirik okok amniñgiy. Biynimb Jerusalem mindeniñgiy gok, pirik mis amniñgiy. Pen biynimb mis okok mindeniñgiy gok, dawin yomb miñgan biyañ ma amniñgiy. <sup>22</sup>Yenen: Gor nup kirpay rek, ñin kun ak, Baybol buk tikiy aṅgyak aṅgyak rek nep giniñgamb. <sup>23</sup>Pen biyn ñapan koñgiy mindeniñgambay gok sek, biyn ñapan tiy ñeniñgambay gok sek kuyip, miker yomb giniñgamb. Gor Yisrel biynimb gok kuyip, miker yomb ñinim añgiy, miñmon biy gi timey yimb giniñgamb. <sup>24</sup>Biynimb gunap kuyip, baynat diy piñiy ayniñgambay; biynimb gunap kuyip miñ ay, dand miñmon gunap amniñgambay. Pen biynimb Jiwda mer gok, dawin yomb Jerusalem timey gi mindey mindey, Gor kuyip ñin aṅgayak ak pandikek nep, kirginiñgambay.

### **Bi Bap Ñinuk Melik Sek Winiñgamb**

*(Mat 24:29-31; Mak 13:24-27)*

<sup>25</sup>“Pen pumb ak key yimb ay, takin ak key yimb ay, gap gok key yimb ay giniñgamb. Niñg siy pañg apiy giw yomb aṅgek, biynimb miñmon

kind kind maŋgiysek gospar ayiŋg, gos kuŋaynep niŋniŋgambay. <sup>26</sup>Tap semb ar biyoŋ mindip gok, okok nimb okok nimb gek, miŋmon biy yerginiŋ gisap aŋgiy, jel pirikiy, gos tikek apek, kumemb rek ayiniŋgamb. <sup>27</sup>Nind kun geniŋgamb, kisen Bi bap Ñinuk semb biyoŋ nimb Nop kilis ak diy, melik tep nuk ak sek winiŋgamb. <sup>28</sup>Tap aspiyn biy kisen gakniŋ, Biyomb chinup tungasik diniŋgamb ak, maŋ mindip winiŋgamb aŋgiy, niŋmindenimimb aŋgak.”

### Mon Kiyaw

(*Mat 24:32-35; Mak 13:28-31*)

<sup>29</sup>Jiysis kun aŋgiy, minim bap tikdam ay aŋgak, “Mon kiyaw ak sek, mon yikop gunap sek silup ayek niŋiy, <sup>30</sup>miŋiy pumb ayiniŋ gisap aŋgiy niŋbim. <sup>31</sup>Kun ak rek, tap apiyn gok gakniŋ aŋgningambim, ‘Gor biynimb diy kond mindeniŋgamb ñin ak, maŋ asaw aŋgningambim.’ <sup>32</sup>Biynimb mindeniŋgambay ñin kun ak, ma kumningambay; kim mindyakniŋ, tap aspiyn gok maŋgiysek gek niŋniŋgambay. Niŋind yimb apiyn. <sup>33</sup>Semb ar biyoŋ sek, mankumb biy sek kurginiŋgamb; pen minim yand ak ma kurginiŋgamb.

### Jiysis Aŋgak “Niŋrep Giy Mindenimimb Aŋgak”

<sup>34</sup>“Pen niŋrep ginimimb. Niŋg kilis tap gok kuŋay ñimbip, sikyim, simiy yiŋg chendbil, tap man ar biy nep gos niŋmindeniŋgambim; ñin kun ak apiy, nimbip yakir tap gok gon ayey dip rek ak diniŋgamb. <sup>35</sup>Akniy nep ma giniŋgamb; biynimb miŋmon kiŋiŋ waŋgin omiŋal ak mindipay rek maŋgiysek giniŋgamb. <sup>36</sup>Kun ak niŋrep ginimimb. Gor nup aŋgningyiŋg nep mindem mey; tap kun gok gakniŋ, nimbip kond mindek, kim amiy, am Bi bap Ñinuk windin yirik ar ak mindeniŋgambim aŋgak.”

<sup>37-38</sup>Jiysis ñin kaw kun ak, am Gor aŋgningep korip miŋgan ak mindiy, biynimb gok kuyip minim aŋgñiyiŋgip. Kiyk minim nup niŋjun aŋgiy, maynamb yimb tikjakiy, Gor aŋgningep korip ak amyŋgipay. Pen kisyim wakniŋ, Jiysis nuk am miŋmon Oliyp dum kinyiŋgip.

### Jiwdas Jiysis Nup Ñaŋgayan Aŋgiy Mimunŋ Gak

(*Mat 26:1-5; Mak 14:1-2, 10-11; Jon 11:45-53*)

**22** <sup>1</sup>Jiwda ñin yomb biret yiys sek ma ñimbay ñin ak, maŋ maŋ wak. Ñin yomb kun ak, enjol bap, Yijip biynimb kuyip pikayiŋg, Yisrel biynimb kuyip niŋiy kirgak ak mey, “Pasopa” apay.

<sup>2</sup>Pasopa ñin yomb kun ak maŋ gakniŋ, Gor nup simboŋgep biyomb gok sek, bi low tiysa gok sek Jiysis nup ñaŋgun aŋgyak ak pen, biynimb gok kuyip pirikiy, yergiy ñaŋjun aŋgiy, aŋgningmindeyak.

<sup>3</sup>Aŋgning mindyakniŋ, Seytan, Jiysis binuk Jiwdas, Yiskariyot nup molik sikak. <sup>4</sup>Sikek, nuk am Gor nup simboŋgep biyomb gok sek, Gor aŋgningep

korip kond mindyngipay poliys biyomb gok sek mindeyak ak amiy angak, “Jiysis nup kayn gi dand amen, nup pikayningambim angiy minim ak kuyip angnak. <sup>5</sup>Angnek, kuyip tep gakniñ, nup angyak, “Nip maniy ñiningambun angyak.” <sup>6</sup>Angeyak mey; nuk Jiysis biynimb gok yip ma mindonimuj won ak, nup kayn gi dand amiy, biyomb gok kuyip ñinim angiy, kond mindek.

**Pasopa Tap Ak Ñiñning Gayrep Giyak**  
(*Mat 26:17-25; Mak 14:12-21; Jon 13:21-30*)

<sup>7</sup>Pen biret yiys sek ma ñimbay ñin kun ak apek, siypsiyp ñiluk pik Gor nup simboŋg ñinjun angiy, <sup>8</sup>Jiysis nuk Piya yip, Jon yip kuyip angyokiy angak, “Nirminjay am Pasopa tap ñiñningambun gok gayrep genimiy angak.”

<sup>9</sup>Anggek angrik, “Akay kun ginjur?”

<sup>10</sup>Anger angak, “Nirminjay dawin yomb ak amiy niñningayr; bi bap ñiñg mal dand apeningamb. Nup namb pikiy, amnimuj miñgan okok amiy, <sup>11</sup>bi korip nop nimb kun ak nup angnimiy, ‘Tiysa nip angip, Korip miñgan akay, bi yand gok yip, Pasopa tap ñiñningambun angip angnimiy.’ <sup>12</sup>Anger, niripminjay dam korip miñgan yomb cheya tap gok sek mindeningamb ar biyoŋ ak anggek, Pasopa tap ñiñningambun gok, miñgan kun ak gayrep genimiy angak.”

<sup>13</sup>Anggek amiy niñrik: angak angak rek nep mindek, Pasopa tap ñiñning giyak gok gayrep gerik.

**Jiysis Binuk Gok Kuyip Biret Wayn Ñak**  
(*Mat 26:26-30; Mak 14:22-26; 1 Kor 11:23-25*)

<sup>14</sup>Pen dungek wakniñ, tap ñiñning, bi minim nup dand amemb gok yip ap bisinŋ kus kus giy, <sup>15</sup>kuyip angak, “Per gosimb yip wip ak, nimb yip Pasopa tap ñiñning gispun biy ñimbiy mey, kisen yiwur yomb diniñgayn. <sup>16</sup>Yenen: nimbip aspiyn, kisen tip ak ma ñiñningayn; yikop nep minden minden, siypsiyp ñiluk per ñimbun junj ak miseŋ gek, Gor biynimb nuk diy kond mindeningamb ñin ak nep, tap yomb ak ñiñningambun angak.”

<sup>17</sup>Jiysis kun angiy, ñiñg wayn kap ak diy, Gor nup tep angiy, binuk gok kuyip ñiyiñg angak, “Ñiñg ñispiyn biy diy ñiñnimimb. <sup>18</sup>Pen nimbip aspiyn: miñiy ñin biy tikiy, ñiñg wayn ak ma ñimben, Gor biynimb nuk gok kuyip diy kond mindeningamb ñin ak winiñgamb angak.”

<sup>19</sup>Kun angiy, biret ak kunep diy, Gor nup tep angiy, tipang kuyip ñiyiñg angak, “Mumbwak yip yiwur yomb giniñgamb rek, nimbip aspiyn. Ar kun ak biret biy diy, gos yip niñyiñg ñiñnimimb angak.”

<sup>20</sup>Pen tap ñimbdiy, wayn ñiñg ak diy, kap miñgan ak soñgiy, kuyip ñiyiñg angak, “Likañ yip yapek kumen nep, Gor nimbip biynimb yand angiy, diniñgayn angak minim ar ak wos amniñgamb ak mey; nimbip ñiñg wayn biy ñispiyn.

21 “Pen ninim! Bi yip kayn gi dand amningamb ak yip bising mindpun. 22 Bi bab N̄inuk, Gor angak kinjeŋ ar ak kindik giy kumningamb ak pen; bi nup kayn gi dand amningamb anup, simb niŋsiypiyn angak.”

23 Jiysis kun angkek, binuk gok kiykaw nep “An rek kun giningamb angiy,” pen angkek pen angkek gi mindeyak.

### **Binuk Gok Yand Biyomb Minden Angiy Penpen Angyak**

24 Jiysis binuk gok “Nimb mer! Yand biyomb minden angiy,” kiykaw nep, key penpen ang mindeyak. 25 Jiysis kuyip angak, “Gapman biyomb Gor ker ma mindpay gok, biyomb gok kilis giy kond mindyng apay, ‘Kuyip direp yimb gipun apay.’ 26 Pen nimb kun ak rek ma ginimimb. Biyomb nimb gok, ni paranj rek mindeningiy; biyomb sikerek gok, bi woŋg giñemb rek mindeningiy. 27 Mankumb biy gipay miñ ar ak, biyomb am bisgey, bi woŋg giñimbay gok, keñmangiy tap kuyip gok marik gipay. Pen yand nimbip yikop, bi woŋg giñimbay rek ak gipiyn. Nimb kun ak rek ginimimb.

28 “Yip miker yimb gip ñin biy ma kirpim; kond nep mindpim. 29 Kun gipim ak Gor yip angip, ‘Biyomb gok kuyip diy kond mindeningamban,’ angip rek, yand pen nimbip aspiyn ak mey; 30 ñin kun ak tomb angin yip ak mindiy, Jiwda kiñiŋ yomb keykey onep wimingan ak kuyip, kond mindeningambim angak.”

### **Jiysis Piyta Nup Bi Kun Ak Ma Niŋbiyn Angningamban Angak** (*Mat 26:31-35; Mak 14:27-31; Jon 13:36-38*)

31 Jiysis Piyta nup angak, “Saymon, Saymon. Niŋan! Gor Seytan nup ‘Yaw’ angkek, nimbip wiyt mangiy songey songey, mangiy yimb ak key ay, day day ak key ay gipay rek ak giningamb. 32 Pen Gor nup angningbiyn rek, yip pisnep ma kirginingamban. Pen tap siy tap timey giningamban ak, ‘Yenen kun gipiyn angiy,’ tip ak andkind yip ker winingamban. Apiy, namiy namam gunap kuyip ang tep gey, mind tep giningiy angak.”

33 Jiysis kun angkek, Piyta angak, “Biyomb. Nip ma kirginingayn. Omiŋal giy nep girangor, nip kalambis ay, yip kunep ayningiy. Pen nip pikay, yip kunep pikayningiy angak.”

34 Angkek, Jiysis angak, “Piyta. Nip aspiyn: miñiy kisyimken biyan kakaruk ma suk angningamb won ak, Jiysis nup ma niŋbiyn angiy, yinj omiŋal nokom angningamban angak.”

### **Anpawis, Wand, Baynat**

35 Kun angiy, kuyip angak, “Nind nimbip angyokiy angnik, ‘Anpawis, wand, tomb tirup gok dand ma amnimimb: yikop amnimimb angnik.’ Angen ambik ñin kun ak, nimbip tap gunap mindek akan, tikdak?”

Angkek angyak, “Mer! Tap chinup gunap ma tikdak. Mindek angyak.”

<sup>36</sup> Angeyak, Jiysis angak, “Pen miñiy nimb anpawis, wand, tap gok mindonimuj, dand sesek amnimimb. Bi an ñayip baynat ma mindonimuj ak, kolsiyor nuk ak bi gunap kuyip yokiy maniy diy, baynat ak tawnimuj. <sup>37</sup> Pen niñim! Yip nind, Baybol buk ak tikiy angyak, ‘Nup bi timey monmon gip bap angningambay angyak.’ Minim angiy tikayak kun ak, miñiy giniñg gisap angak.”

<sup>38</sup> Kun anggek, angyak, “Biyomb. Baynat chin omiñal mindip angyak.” Angey, “Mey ak angak.”

**Jiysis Nup Ñangayniñg Geyak Niñiy, Nop Nup Angniñak**  
(*Mat 26:36-46; Mak 14:32-42*)

<sup>39</sup> Kun angiy, mis amiy, Gor nup angniñning, per miñmon Oliyp dum amyinñipay ak amnakniñ, binuk gok kisen giyak. <sup>40</sup> Dum kun ak amjakiy kuyip angak, “Gos timey apek timey ginimimb rek ayip ak, lotiw giyiñg mindenimimb angak.”

<sup>41</sup> Kun angiy, kuyip kirgiy, nuk keykey siñbindoñ amiy, koñgim yimiy, Nop nup angniñiy angak, <sup>42</sup> “Bapiy. Gos yand niñbiyn ak, ñiñg silik kap yip ñiñiñg gispan ak ma ñinimin. Pen yand niñbiyn ar ak ma ginimin; gos nand key niñban ar ak nep ginimin angak.” <sup>43-44</sup> Kun angiy, nup miker yimb gek, Nop nup angniñ mindakniñ, wisimb ak likañ rek puñgrik yowak. Kun gakniñ, enjol bap semb biyoñ nimb apiy, nup kilis ñak.

<sup>45</sup> Nop nup angniñjiwi, amiy niñak: binuk gok miker gakniñ wisin kineyak. <sup>46</sup> Niñiy, kuyip angak, “Yenen wisin kinjipim? Gos timey apek, timey ginimimb rek ayip ak, tikjakiy, Bapiy nup angniñiyiñg mindenimimb angak.”

**Jiysis Nup Chichiy Diyak**  
(*Mat 26:47-56; Mak 14:43-50; Jon 18:3-12*)

<sup>47</sup> Jiysis minim kun ak ang mindakniñ, binuk Jiwdas bi tiwin yomb bap poñind apchakiy, Jiysis nup kaykol giyn anggek, <sup>48</sup> Jiysis angak, “Jiwdas. Mey bi biy ñangim angiy, yip kaykol giniñg gispan?”

<sup>49</sup> Kun angakniñ, binuk gok giniñg geyak kun ak niñiy angyak, “Biyomb. Kuyip baynat diy piñiyjun akan?” <sup>50</sup> Kun angyiñg, binuk bap baynat ak diy, bi Gor nup simboñgep yomb yimb woñg giñemb anup, timund yipund kind ak, pisnep timbrik yokak.

<sup>51</sup> Kun gek, Jiysis niñiy angak, “Kun ma ginimimb! Mey tep angak.” Kun angiy, timund ak tip gek yimñak.

<sup>52</sup> Pen biyomb Gor nup simboñgep gok, Gor angniñep korip poliys gok, bi minim tungasikep gok nup ap, diniñg gey, kuyip angak, “Nimb baynat diy, kur diy dand opim ak: yip bi penpen ñanggep bap rek ayek niñiy, chichiy diniñg opim?” <sup>53</sup> Nimb yip minek minek, Gor angniñep korip ak

minden, yip ma dipik! Pen miñiy Seytan, bi kisyim kind okok ken mindip ak, ñin nuk ak mey; kun gispim angak.”

### **Piyta Jiysis Nup Ma Niñbiyn Angak**

*(Mat 26:57-58, 69-75; Mak 14:53-54, 66-72; Jon 18:12-18, 25-27)*

<sup>54</sup>Nuk kun angakniñ, nup chichiy diy, dand bi Gor nup simbongep yomb yimb korip ak amniyak.

Piyta pen kikisen amiy, <sup>55</sup>mon danjiy mindeyak korip namb ak amiy, biynimb gunap yip jimñiy bising mindek. <sup>56</sup>Bising mindakniñ, pañ korip kun ak wonj giyngip bap, nup niñdand aran apyan giyng angak, “Bi yip kunep, Jiysis yip mindek angak.”

<sup>57</sup>Angek, Piyta angak, “Pañ. Bi kun ak yand ma niñbiyn angak!”

<sup>58</sup>Pen yep sikoy won bap mindiy, bi bap pen, ap nup niñiy angak, “Nand kunep Jiysis binuk bap angak.”

Angek Piyta, “Yand mer angak.”

<sup>59</sup>Pen kisen tapin won bap mindiy, bi bap pen apiy, kilis giy angak, “Bi biy Jiysis yip mindamb. Nuk kunep miñmon Galiyliy nimb angak.”

<sup>60</sup>Angek, Piyta angak, “Minim aspan ak yand ma niñbiyn angak.” Kun ang mindakniñ, day kakaruk angak. <sup>61</sup>Angek, Jiysis andikiy Piyta nup niñyinjsek ayek, Piyta pen, Jiysis kun kun giningamban angak minim ak niñiy, <sup>62</sup>kunam kinjik gek, mis amiy siy angak.

### **Jiysis Nup Angjiwyiñg Pikyiñg Giyak**

*(Mat 26:67-68; Mak 14:65)*

<sup>63-64</sup>Bi Jiysis nup di mindeyak gok, chech band ak di windin nup ak pik yiwgiy, nup angjiwyiñg, pikyiñg angyak, “Nand bi key niñban ak, nip an piksap ak chinup angñan angyak.” <sup>65</sup>Pen minim timey kun ak rek, nup tapin kunaynep angyak.

### **Nand Kiyñ Yomb Key Yimb Ak Akañ Angyak**

*(Mat 26:59-66; Mak 14:55-64; Jon 18:19-24)*

<sup>66</sup>Miñmon yowakniñ, miytiyñ gun angiy, Jiwda bi minim tungasikep gok, biyomb Gor nup simbongep gok, bi low tiysa gok ap nan-giy, Jiysis nup dand Jiwda kanjsol miytiyñ kun ak amiy angyak, <sup>67</sup>“Nand Jiwda Kiyñ yomb key yimb per kond mindpun ak akañ angyak.”

Angey, kuyip angak, “Yaw angen, niñind angip angiy, ma niñningambim. <sup>68</sup>Pen angniñep yand mindip gok nimbip angniñen, yip pen ma angningambim. <sup>69</sup>Pen miñiy, Bi bap Ñinuk am, Nop Biyomb tap yerip giyñ angiy giningamb ak nup, ñin yipund kind ak mindeniñgamb angak.”

<sup>70</sup>Kun angek, bi kanjsol kun gok mangiysek nup angyak, “Nak key Gor Ñinuk?”



Angey angak, “Mey nimb key apim ak angak.”

<sup>71</sup>Angek angyak, “Yenen, kor nup ak tapin angmindenjun? Nuk key tom giy, Gor Ninuk mindpiyn angek ninbun angyak.”

**Biyomb Paylat Jiysis Kor Nup Ak Niḡak**  
(*Mat 27:1-2, 11-14; Mak 15:1-5; Jon 18:28-38*)

**23** <sup>1</sup>Kun angyi, maḡgiysek tikjakiy, Jiysis nup dand gapman biyomb Paylat mindek ak amniyak. <sup>2</sup>Dand amiy, nup kor gining, minim okok nimb okok nimb dand apiy angyak, “Chin piyow niḡiy ninbun; bi biy biynimb chinup gok anḡip, ‘Biyomb yimb Siysa nup takes ma pikiy, gapman kay minim ak kunep ma niḡnimimb anḡip.’ Pen minim bap anḡip, ‘Yand Krays, bi kiyḡ bap anḡip’ angyak.”

<sup>3</sup>Anḡeyak, Paylat Jiysis nup anḡniḡiy anḡak, “Nand Jiwda kay kiyḡ kiyk ak mindpan akaḡ?”

“Angek angak, “Mey apam ak, anḡak.”

<sup>4</sup>Anḡek, Paylat pen, bi Gor nup simbonḡep yomb gok sek, biynimb yikop ap mindeyak gok sek kuyip anḡak, “Yand niḡbiyn; bi biy nup kor gep junḡ bap ma mindip anḡak.”

<sup>5</sup>Kun anḡak ak pen, kiyk meḡ mḡgan dand araniy angyak, “Nuk gapman minim ma niḡnimimb angyi, biynimb miḡmon Jiwdiya okok maḡgiysek anḡniḡimb. Miḡmon Galiyliy tikiy, anḡni dap dap, miḡiy Jerusalem biy wip angyak.”

**Jiysis Nup Dand Herot Mindek Amniyak**

<sup>6</sup>Anḡeyak, Paylat kuyip anḡniḡiy anḡak, “Bi kun biy Galiyliy nimb?”

<sup>7</sup>Anḡek, yaw anḡey, biyomb Herot Galiyliy propens kond mindip ak, ap Jerusalem biy mindip rek, nup ker yoken kor biy niḡnimuḡ angyi, kuyip anḡek, dand mindek ak amniyak.

<sup>8</sup>Herot, Jiysis tap giyḡḡip ak per minim anep niḡiy, minek akay rek, tap mageprek bap gek niḡniḡayn angyi, gos ak niḡmindyḡḡip ak mey, niḡn kun ak Jiysis nup dand apchakey niḡiy, nuk miḡmiḡ yimb gak.

<sup>9</sup>Pen Herot Jiysis nup minim kuḡaynep yḡḡin wiḡḡin gek, Jiysis pen minim bap ma anḡak.

<sup>10</sup>Pen bi Gor nup tap simbonḡep yomb gok sek, bi low tiysa gok sek kilis giy, minim kuḡaynep angyak. <sup>11</sup>Herot, amiybi nuk gok yip, Jiysis nup gi timey giyḡḡ, niḡniḡ ayiḡḡ, gapman biyomb aypay chech tep bap yimniy, tip ak Paylat mindek ak dand amniyak.

<sup>12</sup>Nind Herot yip, Paylat yip penpen anḡmindyḡḡipiyr ak pen; niḡn kun ak minim anḡ jimniḡirik.

**Paylat Jiysis Nup Ñangnimimb Angak**  
(*Mat 27:15-26; Mak 15:6-15; Jon 18:39-19:16*)

<sup>13</sup>Pen Paylat, biyomb Gor nup tap simbongep gok sek, bi minim tungasikep gok sek, biynimb yikop gok sek angek, ap nan-gey angak, <sup>14</sup>“Yip apim, ‘Bi biy, biynimb gok kuyip kun kun angip apim’ ak pen, miñiy windin yirik ar nimbip biy kor gipiyn ak, minim kor ginimbik junj bap mindek, ma niñbiyn. <sup>15</sup>Herot kunep minim junj bap ma piyow niñiy mey; chinup ker tip ak angyokamb dand opay. Bi kun biy, tap timey bap gek rek, minim nimbip ak diy nup ñangnim. <sup>16</sup>Kun ak yikop pikiy, angyoken amnañ angak.”

[<sup>17</sup>Jiwda ñin yomb kiyk “Pasopa” angyiñgipay ak apek, Paylat per kalambis bi kiyk bap yikop angyokyingip ak mey;] <sup>18</sup>ñin kun ak, kiyk mangiysek meñg miñgan dand araniy angyak, “Bi kun ak ñangay, Barabas nup angyokem chinup ker owañ angyak!” <sup>19</sup>Bi Barabas kun ak, dawin yomb namb ak, biynimb gunap diy penpen giy, bi bap pisnep pikayak rek nup kor giy kalambis ayak.

<sup>20</sup>Pen Paylat tip ak, meñg miñgan dand araniy kuyip angak, “Jiysis nup yikop angyoken amnañ angak.”

<sup>21</sup>Angek, kiyk meñg miñgan dand araniy angyak, “Nup mon kiros bak biyoñ ñangbirik ayim angyak!” “Nup mon kiros bak biyoñ ñangbirik ayim angyak.”

<sup>22</sup>Angeyak, Paylat tip ak kuyip angak, “Yenen? Bi kun biy, tap yerip timey gip? Nup niñen tap timey bap ma gip ak, ñangjun rek ma ayip. Kun ak nup yikop pikiy, angyoken amnañ angak.”

<sup>23</sup>Angek, kiyk kilis yimb giying, Jiysis nup ñangbirik aynimimb angyi, angy gey gey, <sup>24</sup>Paylat minim kuyip ak diy, <sup>25</sup>bi timey biynimb kuñay diy, penpen giy, bi bap nup pikayak anup kirgek amnakniñ angak, “Jiysis nup ñang aynimimb angak.”

**Jiysis Nup Mon Bak Biyoñ Ñangbirik Ayak**  
(*Mat 27:32-44; Mak 15:21-32; Jon 19:17-27*)

<sup>26-27</sup>Jiysis nup ñangniñg dand sanđiyakniñ, biynimb kuñaynep kisen giy amniyak. Namb okok amying niñyak; bi Saymon, miñmon Sayriyniy nimb ak, Jerusalem apek. Nup niñiy, mon kiros di wanjrem ar nup ak ayñiyiñg angyak, “Jiysis amjap ak kisen amnoñ angyey,” dand kisen gak.

Pen biynimb kuñaynep ameyak namb kun ak, biyn gunap Jiysis nup simb niñiy siy angyey, <sup>28</sup>nuk tungandikiy kuyip angak, “Nimb Jerusalem biyn! Yip gining gisap ak siy ma angnimimb. Nimbip timey giy, ñapan nimbip gok timey giy giniñgamb ak, siy angnimimb! <sup>29</sup>Kisen miker yomb asaw ak apek, angningambay, ‘Biyn ñapan ma tikpay gok sek, biyn ñapan tiy ma ñimbay gok sek tep, angningambay.’

30 “Ñin kun ak, yenen mindiy kumjun anġiy anġningambay, ‘Miñmon yirik gok pañg apiy, chinup pikaypikop akan, konġiy diy chinup yiw gipkop ak, tep anġningambay.’

31 “Yip mon kim tep, timey ma giniġiy rek ak pen, timey giniġ gispay. Nimb mon milip rek wiñind amiy mindpim ak, nimbip niñind giniġambay anġak.”

32 Pen bi gapman low minim timbrikrik omiñal ak, mon kiros bak biyoñ ñanġbirik ayniġ, dand sesek amniyak. 33 Dand miñmon Chip jun won apay ak amġakiy, bi gapman low timbrikrik omiñal ak pis pis ñanġbirikiy, Jiysis nup namb biyañ ñanġbirikyak. 34 Nup kun giy, ñanġbirik ayey, nuk Nop nup anġak, “Bapiy. Yip gispay ak yerip gispun anġiy, niñrep giy ma gispay. Kun ak kuyip niñiy kirginimin anġak.”

Pen amiybi gok, Jiysis nup mon kiros bak biyoñ ñanġbirik ay, chech nup tuñġiw ayey mindek gok, kiyk key sandiw gipay rek ak giyiġ diyak.

35 Biynimb kuñaynep niñmindyakniñ, Jiwda biyomb gok, Jiysis nup panġ anġiy anġyak, “Nuk ‘Yand Jiwda Kiyñ yomb key yimb ak; Gor yip damb nuk yip mindpiyn anġiy,’ biynimb gunap kumey gamb tikġakpay. Gip kun ak rek, nuk key kunep giy, kim amek niñun anġyak.”

36 Pen amiybi gok kunep nup panġ anġyiġ, mañ siñak apiy, ñiñg silik ak ñiyiġ anġyak, 37 “Nand Jiwda bi kiyñ yomb kiyk mindpiyn apan ak, nand key giy kim amnoñ akan anġyak!”

38 Pen mon boñg band bap, Jiysis nup ñanġgrimbikyak mon kiros bak biyoñ, yimb tikay anġyak, “Jiwda biynimb kiyñ yomb kiyk ak anġyak.”

39 Bi low minim timbriker, mon kiros bak biyoñ ñanġbirikyak omiñal ak, bap Jiysis nup anġak, “Nand Jiwda Kiyñ yomb key yimb mindpan ak, nand key giy kim amiy, chirup kunep gey, kim amnur anġak.”

40 Anġek, bi bap nup pen anġ giy anġak, “Chir miker dipur rek, nuk kunep dip ak, nand Gor nup ma pirikpan? 41 Chirmiñay timey gipur rek yiwur dispur, pen Jiysis tap bap ma giy, yikop nep yiwur disap anġak.” 42 Kun anġiy, Jiysis nup anġak, “Kisen nand Biyomb Kiyñ mindiy winiñgamban ñin ak, yip gosimb niñnimin anġak.”

43 Kun anġek, Jiysis anġak, “Niñ niñind yimb aspiyn. Miñiy ñin biy, yand yip am tip tep ak mindeniñgambur anġak.”

### Jiysis Kumak

(*Mat 27:45-56; Mak 15:33-41; Jon 19:28-30*)

44 Ñin kun ak, pumbnamb yomb yoñ won ak kisyim apiy, mind dand amiy pumb kuyim gak won ak, tip ak pen melik gak. 45-46 Pen Jiysis kumniġ anġak, “Bapiy. Kawnan yand ak ñin ar nip ak aysi piyn anġiy,” kumakniñ, Gor anġniñep korip ñiluk miñgan suñrep yimb biyañ, laplap di kinjenrumb pil giyak ak, puñgrik biyoñ biyañ ay, miñgan yikiy mindek.

47Pen amiybi kond mindep kiyk ak, Jiysis minim angyi kumak kun ak niñji, Gor nup yimb ak dand aranying angak, “Niñind apay; bi tep yimb ak angak.”

48Biynimb ap mindeyak gok, tap gak kun ak niñji, simb yimb gakniñ, andkind korip kiyk amniyak. 49Pen Jiysis buñgiy nuk gok sek, biyn Galiyliy nimb wiyak gok sek kiyk keykey siñbindoñ mindiy, tap gak kun ak niñmindeyak.

### Jiysis Nup Komyak

(Mat 27:57-61; Mak 15:42-47; Jon 19:38-42)

50-51 Pen bi Jiwda minim tuñgasikep, Gor minim di tep yimb giyিংgip bap, miñmon Armatiya mindyিংgip. Yimb nuk ak Josep. Nuk bi minim tuñgasikep gunap, Jiysis nup ñang ayun angyi, gos niñyak rek ma niñak. Nuk Gor biynimb diy kond mindeningamb ñin ak, mañ mindip angyi, kond mindyিংgip.

52 Nuk Jiysis nup dam komniñg, Paylat mindek ak am angninek, yaw angek, 53 bi gunap yip am Jiysis nup tuñgasik dand apyapiy, chech tund teprep yimb ak di kom kom giy, dam kamb miñgan kisen nep kilukiy chip ma komyak miñgan ak komyak. 54 Pen Jiwda lotiw ñin ak, mañ gip angyi, Praydey dungep won ak, Jiysis nup kun giy dam komyak.

55 Pen biyn tiwin, Jiysis yip Galiyliy nimb wiyak gok, Josep amnakniñ kisen amiy, Jiysis nup komyak tip ak niñrep giy, andkind korip amniyak. 56 Amiy, wel kuy tep wak gunap, Jiysis mumbwak nup ak ayñinjun angyi, gay tep giyak. Minek kun anep dand ambiyap ak pen, Sarirey ñin ak, ñin yomb kiyk yikop mindep ak niñji mey, yikop mind mind kinyak.

### Jiysis Tikjakak

(Mat 28:1-10; Mak 16:1-8; Jon 20:1-10)

**24** 1 Minek Sandey miñmon kisen tikak won ak, biyn tiwin kun ak, wel kuy tep wak ak diy, Jiysis mumbwak nup ayñinjun angyi, dand Jiysis nup komyak ak amniyak. 2 Amiy niñyak: kamb kolim yomb chip kaw pil giyak won ak, milok am gol okok mindek. 3 Pen kiyk miñgan kun ak amiy niñyak: Jiysis ma mindek. 4 Yergip angyi, anğ mindyakniñ, bi chech tund ñiñakol yimrik omiñal ak, gol kun siñak jakiy minderik. 5 Kiyk niñji, jel pirikiy, koñgim yimiy kuyangiyakniñ, bi omiñal kun ak anğrik, “Yenen bi kim mindip anup, chip kombay namb akniy piyow niñsipim? 6 Nuk biy ma mindip. Mindarik tikjakip. Pen nimb gos niñnimimb; Galiyliy mindiy, nimbip minim angak ar ak. 7 Nimbip angak, ‘Bi bap Niñuk ak nup, di biynimb tap siy tap timey gipay ñin ar ak ayey, mon kiros bak biyoñ ñanğrimbik ayey kumiy, minek omiñal nokom mindiy, tip tikjakniñgamb angak’ anğrik.”

8 Kun anğrikniñ, gosimb kuyip ak pañgyikek, Jiysis nind Galiyliy mindiy, minim angak kun ak niñyak. 9 Niñji, tip ak andkind amiy, tap

gek niñyak kun ak, Jiysis binuk onep aŋgip ak sek, biynimb nuk yikop gok sek kuyip aŋgñiyak. <sup>10</sup>Biyn tiwin, minim aŋgñiyak kun ak, Mariya miñmon Makdala nimb ak, Jowana ak, Jemis nonim Mariya ak, biyn yikop gunap sek.

<sup>11</sup>Pen kiyk kun giy aŋgñeyak, minim kun ak niñind apay aŋgiy ma niñyak; ñiñlon ay aspay aŋgiy niñyak.

<sup>12</sup>Pen Piyta minim kun ak niñiy, pungrikind yimb aŋgiy bindoŋ amiy, komyak kamb miŋgan ak sipsip niñak: Jiysis nup chech kom kom giyak band gok nep mindek. Niñiy, yergip aŋgiy, gospar yimb ayiŋ, tip ak andkind amnak.

### **Bi Omiŋal Miñmon Emeyas Amnirik Minim**

*(Mak 16:12-13)*

<sup>13</sup>Ñin kun anep, bi omiŋal miñmon sikoy Emeyas, yep Jerusalem maŋ kun okok amnur aŋgiy amyiŋ; <sup>14</sup>tap yerip yerip gek niñrik minim ak kapkap aŋgyiŋ amerik. <sup>15</sup>Amnirikniŋ, Jiysis kund okok ken apiy, kiy yip yiŋgoŋg giy amnak. <sup>16</sup>Pen bi omiŋal kun ak, Jiysis nup niñbirip ak pen, Gor gosimb kuyipmiŋay ak gek sakiy ayek, Jiysis nup niñer, bi ak key rek ayak. <sup>17</sup>Nuk kuyipmiŋay aŋgniñiy aŋgak, “Minim gok yerip aŋgyiŋ, aŋger asaw?” Kun aŋgek, yimgeprek jak mindyiŋ, <sup>18</sup>numam Kiliyowpas aŋgak, “Nand nep mey, miñiy ñin kaw biy, tap Jerusalem biy gisap ak ma niñban?”

<sup>19</sup>Aŋgek aŋgak, “Tap kun ak yergek aspiyr aŋgak.”

Aŋgek aŋgrik, “Bi Gor minim aŋgep Jiysis Nasaret nimb ak, minim aŋg tep giyiŋ, tap mageprek gok giyiŋ gek; Gor nup tep giy, biynimb gok kuyip tep giy gak. <sup>20-21</sup>Kun gek, gosimb chin niñiy aŋgnuk; nuk bi chinup Yisrel biynimb diy, kond mind-tep giniŋgamb aŋgiy niñnuk ak pen; biyomb Gor nup tap simboŋgep gok sek, bi minim tungasikep gok sek minim aŋg nan-giy, di Rom gapman biyomb anup ñeyak, nuk amiybi nuk gok kuyip ñek, dam mon kiros bak biyoŋ ñaŋgrimbik ayey kumak. Tap gak kun ak, ñin omiŋal pandikak. <sup>22</sup>Miñiy sekemb won ak, biyn tiwin chin bap, am nup komyak kawrumb bindoŋ niñiy, ap chinup tap yerip yerip gip ak aŋgñey, niñiy jiw dipun. <sup>23</sup>Kiyk apay, chip par ak ma mindamb. Enjol omiŋal ak apiy apiyr, ‘Nuk tikjakiy, kim mindip apiyr’ apay. <sup>24</sup>Kun aŋgey, bi chin gunap kawrumb bindoŋ amiy niñbay; biyn gok apay rek nep, mindamb aŋgrik.”

<sup>25</sup>Kiliyowpas kun aŋgek, Jiysis aŋgak, “Nirmiŋay gos tep ma niñbiyr. Bi Gor minim aŋgep gok minim aŋgyak ak, yenen niñind aŋgyak aŋgiy kasek ma niñbiyr. <sup>26</sup>Pen Gor aŋgak rek, Kiyŋ yomb key yimb ak yiwur yomb diy kumiy, tikjakiy mey, biynimb kuŋaynep diy kond mindeniŋgamb aŋgak.” <sup>27</sup>Kun aŋgiy, kuyipmiŋay Mosis; bi kiyŋ yomb key yimb ak nup, minim tikak ak sek, bi Gor minim aŋgep gunap, minim nup tikiyak ak sek maŋgiyseŋ aŋgñirep gak.

<sup>28</sup>Pen bi omiŋal kun ak, miñmon amerik maŋ kun siŋak amjakij, Jiysis kuyipmiŋay tawsak ay, amniŋg rek gek, <sup>29</sup>kuykmiŋay nup kilis giy aŋgrik, “Dunŋep day biy aswun. Kisyim winiŋg gisap nen, apey chirmiŋay yip amnun aŋgrik.” Aŋger, kiy miŋay yip amnak.

<sup>30</sup>Korip am mindiy, tap ñiŋniŋ, nuk biret ak diy, Gor nup tep aŋgiy, tipaŋg kuyipmiŋay ñakniŋ, <sup>31</sup>gosimb kuyipmiŋay ak paŋgyikek, ak Jiysis nep aŋgiy, aŋgrikniŋ, kapkap kurgak. <sup>32</sup>Kun gek, niŋiy aŋgrik, “Kinjeŋnamb okok apyiŋg, minim gunap aŋgñiyiŋg, Baybol buk tikyak minim kiŋiŋ ak aŋgñiyiŋg gamb, mindmaŋgiy chirup ak niŋind yimb limgamb aŋgrik.”

<sup>33</sup>Kun aŋgiy, won kun ak nep, tip andkind Jerusalem amiy niŋrik: Jiysis binuk onep aŋgip ak sek, bunŋiy kiyk gunap sek ap nan-giy mindeyak. <sup>34</sup>Amjakrikniŋ, kuyipmiŋay aŋgyak, “Niŋind yimb apun. Jiysis kumimb ak pen; tip ak tikjakij, ap Saymon mindamb siŋak misenŋ gamb, niŋimb aŋgyak.”

<sup>35</sup>Aŋgey, kiy pen aŋgrik, “Chirmiŋay kunep kinjeŋnamb okok amambur, Jiysis chirup namb pikamb, dand korip chirmiŋay ak amiy, tap ñiŋniŋg giy, nuk biret ak di Gor nup tep aŋgamb, ak Jiysis nep aŋgiy niŋbur aŋgrik.”

**Jiysis Binuk Gok Nup Misenŋ Niŋyak**  
(*Mat 28:16-20; Mak 16:14-18; Jon 20:19-23*)

<sup>36</sup>Minim kun ak aŋgrikniŋ, Jiysis mindeyak namb ak misenŋ giy aŋgak, “Nimb mindpim?” <sup>37</sup>Aŋgek, kiyk chip kawnan aŋgiy <sup>38</sup>pirikeyak, kuyip aŋgak, “Yenen, yip Jiysis aŋgiy ma niŋiy, gos kuŋay niŋsipim? <sup>39</sup>Nin tomb yip gok niŋim. Yand Jiysis nep. Chip kawnan rek, mumbwak tiŋiy sek ma mindembiniŋ; yand yipul sek, tiŋiy sek mindpiyn ak, yip diniŋim aŋgak.”

<sup>40</sup>Kun aŋgyiŋg, ñin tomb nuk gok kuyip yomek niŋiy, <sup>41</sup>kuyk miñmiñ giyiŋg, pen gospar ayiŋg, ak Jiysis nep akaŋ aŋgiy, gos kuŋay niŋeyak; kuyip aŋgak, “Tap ñiŋemb nimb gunap mindip akaŋ?” <sup>42</sup>Aŋgek, nup piys daŋgiy ayak ak ñiy, <sup>43</sup>niŋmindyakniŋ ñiŋak.

<sup>44</sup>Pen Jiysis kuyip aŋgak, “Nimb yip mindiy, yip gip ar ak, giniŋgamb aŋgiy nimbip aŋgñiyiŋgiŋpiyn. Mosis low minim aŋgiy tikak rek, bi Gor minim aŋgep aŋgiy tikyak rek, pen Baybol buk Sam ak minim aŋgiy tikyak rek, yip yerer giniŋgamb aŋgiy, maŋgiysek aŋgñiyiŋgiŋpiyn aŋgak.”

<sup>45</sup>Kun aŋgiy, minim nind tikyak ak niŋrep giyaŋ aŋgiy, gos tep yimb ak kuyip ñiy, <sup>46</sup>aŋgak, “Minim kun ak tikiy aŋgyak, ‘Kiyŋ yomb key yimb ak yiwur yomb diy kumek, komey, minek omiŋal nokom mindiy, tip ak tikjakniŋgamb. <sup>47</sup>Tikjakij mindeniŋgamb rek, minim nup ak miñmon Jerusalem kiŋiŋ giy aŋgiy, aŋg dand amiy, biynimb miñmon okok maŋgiysek aŋgñey amnakniŋ, biynimb tap siy tap timey

giniṅgambay gok, yenen kun gipun aṅgiy, nup chiṅgyakniṅ, gach kuyip ak wiykyokniṅgamb aṅgyak.’<sup>48</sup> Pen yip gak kun ak, windin nimb key niṅbim. <sup>49</sup> Pen Bapiy minim aṅgayak rek, nimbip giniṅgayn ak mey; dawin yomb Jerusalem biy mindiy, kond mindenimimb. Gor Kawnan ak, ap nimbip bak ayek, miṅmon okok keykey amnimimb aṅgak.”

**Jiysis Semb Biyoṅ Amnak**  
(*Mak 16:19-20; Ap 1:9-12*)

<sup>50</sup> Kun aṅgiy, kuyip poṅind Beteniy amiy, Gor kuyip kond minden aṅgiy, ṅin dand araniy, <sup>51</sup> Gor nup aṅgniṅakniṅ, nup dand aranjak semb biyoṅ amnak. <sup>52</sup> Kun gek, kuyip tep gakniṅ, yimb nup ak dand aranyiṅg, andkind Jerusalem amniyak. <sup>53</sup> Amiy, minek minek, Gor aṅgniṅep korip miṅgan ak amiy, Gor nup yimb ak dand aranyiṅgipay.